


SAFARI YANGU Na Mungu



MWL. DISMAS KAPINGU

YALIYOMO

UKURASA

DIBAJI iii

UTANGULIZI..... v

SURA YA KWANZA

ANZA NA MUNGU1

SIRI YA KUFUNGA MLANGO8

UMUHIMU WA KUUKOMBOA MUDA 15

SURA YA PILI

JARIBU NGUVU YA MAOMBI 25

BWANA NIWEKE HURU NA HISIA HASI 32

NEEMA YA BWANA YESU KRISTO, PENDO LA MUNGU,

NA USHIRIKA WA

ROHO MTAKATIFU 38

SURA YA TATU

KUTOKUWA NA MPANGO B 48

SIRI YA KUWAKA MOTO 53

UMUHIMU WA KUSAMEHE WAKATI WA HASIRA NA
UCHUNGU 57

SURA YA NNE

VITA YA KIONGOZI..... 66

BWANA, NIONYESHE JINSI YA KUDHIBITI MAWAZO YANGU
..... 74

NGUVU YA NENO LA MADHABAHU..... 79

SURA YA TANO

UTAJIRI NI CHOMBO CHA HUDUMA, SI KIPIMO CHA THAMANI YA MTU	84
WITO WAKO NI NINI?	92
AKILI ZA KIROHO (SPIRITUAL INTELIGENCE)	105

SURA YA SITA

BWANA, NISAIDIE KUSHINDA VISHAWISHI VYA UASHERATI, FEDHA NA UMAARUFU.....	112
TUMIA TUNDA LA ROHO KUIMARISHA MAHUSIANO YAKO	119
MTAKE BWANA NA NGUVU ZAKE	127
MAOMBI NA SHUKRANI	132
REJEA	133

DIBAJI

Ninamshukuru Mungu mwenye rehema kwa kunipa neema ya kuandika hiki kitabu, ambacho ni zao la maombi, tafakari, kusoma vitabu, kufuatilia mahubiri na mafundisho mbali mbali ya kiroho pamoja na ushuhuda wa maisha Yangu binafsi. Kitabu hiki kimeandikwa kwa lengo la kutia moyo, kufundisha na kuyafumbua mambo mengi ambayo yanahusu maisha ya kila siku ya kiroho na kimwili hususani katika kutembea na MUNGU kama msaada wa pekee katika SAFARI YA MAISHA ya wakristo hapa duniani.

Shukrani zangu za dhati ziwaendee familia yangu, mke wangu FARAJA pamoja na watoto wangu, wamekuwa na hamasa kubwa ya kukiona kitabu hiki kikikamilika tangu nilipowashirikisha wazo la uandishi wake na hivyo hamasa yao iliniongezea nguvu za kuandika. Pia shukrani za dhati ziende kwa wazazi wangu Baba na Mama (Bw. & Bi) J. KAPINGU kwa malezi, elimu na ushauri bora wanaonipatia mpaka kufika hatua hii.

Shukrani zingine maalumu ziende kwa uongozi wa kanisa la FPCT HIGHWAY – KIHONDA chini ya Askofu DR, LAMECK NGENZI pamoja na PASTOR GODFREY NSUNZA, viongozi wa idara na washirika wote kwa msaada wa kimawazo na ushauri mbali mbali walionipa katika kuhakikisha naandika kitabu chenye maadili sahihi ya Kikristo.

MWL. DISMAS KAPINGU ni mwana Theolojia, mwalimu na muhubiri wa injili ya **Yesu Kristo**. Ni msomi na mbobezi katika maswala ya Elimu, Theolojia, na Saikolojia ya Ushauri wa Kikristo (Christian counseling Psychology).

Hiki ni Kitabu cha kwanza ambacho kimeandikwa kwa kuzingatia misingi ya kikristo na uthabiti wa Neno la Mungu kwa lengo la kutia moyo, kufundisha na kuyafumbua mambo mengi ambayo yanahusu maisha ya kila siku ya kiroho na kimwili. Ni matuamini yangu kwamba, unaposoma kitabu hiki utapata maarifa mapya, msukumo wa kiroho na tumaini jipya lisilotetereka kwa Mungu. Uwe na safari njema katika kusoma kitabu hiki na Mungu wa Mbinguni akubariki sana.

**Hiki Kitabu Ni Maalumu Kwa Ajili Ya Marehemu Mama Yangu, Roho Yake Iendelee
Kupumzika Kwa Amani Mpaka Siku Tutakopoonana Tena Mbinguni. AMINA.**

UTANGULIZI

‘SAFARI YANGU NA MUNGU’ ni kitabu ambacho nilipata maono ya kukiandika kama sehemu ya ushuhuda wa maisha yangu ya kiroho na kimwili katika kumpenda na kumtumikia MUNGU. Masomo yanayopatikana ndani ya kitabu hiki kwa asilimia kubwa ni mambo ambayo nimejifunza, nimeyapitia na kufundishwa na Mungu kuanzia nilipookoka mpaka wakati huu. Maisha ni safari kama maandiko yanavyotukumbusha kwamba hapa duniani sisi ni wapitaji, hii ina maana kuwa tunahitaji muongozo sahihi wa neno la Mungu katika maisha yetu ya kila siku hapa duniani tukiwa kama wazazi, vijana, viongozi, wafanya kazi, wajasiliamali, watumishi wa Mungu, wakulima na watu wote wanaotazamia kuwa na maisha yenye furaha na mafanikio hapa duniani na mwisho kuupata uzima wa milele mbinguni.

Kitabu hiki kimeandikwa kwa watu wote wanaopendwa na YESU KRISTO nikiwa na Imani kwamba kitatumika kutia moyo, kufundisha na kufungua ufahamu wa kiroho kwa kila msomaji. Kitabu kimeandikwa kwa muundo wa sura ambapo kina jumla ya sura sita, kila sura ina masomo matatu. Mafundisho ya kiroho yanayopatikana ndani ya kitabu yamejengwa na neno la MUNGU hivyo, unaposoma utapata mwongozo sahihi wa kuomba kutokana na hitaji lako au hali unayopitia.

Ninamwamini Mungu kupitia msaada wa Roho Mtakatifu Kwa kusoma kitabu hiki utapata majibu na msaada kuhusu wito wako, mipango yako, maono yako, uchumi wako, vita zako, usimamizi wa familia, jinsi ya kufanya maamuzi, maswala ya ndoa, utakatifu, maombi na mambo mengine mengi.

Ukiwa katika maisha haya amini kwamba upo katika safari, usalama wa safari yako ni kutembea na YESU pekee, ndio maana Mungu amenipa jina la kitabu hiki **SAFARI YANGU NA MUNGU**.

Ni kitabu maalumu kwa ajili ya safari yako ya maisha katika kukua kiroho, kumjua Mungu na kumtumikia, kufanya kazi na kupata maendeleo, kujitunza na kutunza familia, kujithamini na kuwathamini wengine.

SURA YA KWANZA

1. ANZA NA MUNGU

Unaposoma biblia kitabu cha mwanzo utaona kwamba Mungu ndiye muumba wa vitu vyote pia yeye ni wa kwanza kabla ya vitu vyote. Lakini pia biblia inatuonesha kwamba kabla ya Mungu kumuumba mwanadamu alimuandalia mazingira kwanza! Aliumba bustani ya edeni, akaweka maji, akaweka anga, akaweka nuru, akaweka kila kitu kwa uzuri. Hata wakati Mungu anashirikisha wazo la kumuumba mtu alieleza sababu za kumuumba mtu, Mwanzo 1: 26 ‘’ Mungu akasema, Na tumfanye mtu kwa mfano wetu, kwa sura yetu; **wakatawale samaki wa baharini, na ndege wa angani, na wanyama, na nchi yote pia, na kila chenye kutambaa kitambaacho juu ya nchi.** Hii ina maana gani?..... *Mwaka 2019 ni mwaka ambao mimi na familia yangu pamoja na wazazi wangu tuliamua kumpa Yesu maisha yetu, kabla ya kuokoka tulikuwa watu wa dini na wenye msimamo mkali tukidhani kwamba tunajua kila kitu kuhusu Mungu. Wakati Fulani tulipita katika nyakati ngumu sana za magonjwa, uchumi na migogoro ya kifamilia, kitu cha kushangaza ni kwamba tulikuwa watu wa dini lakini hatukuweza kufanya chochote kubadilisha hali zetu kupitia dini yetu, hatukujua kuomba, hatukujua kupambana na shetani ingawa tulikuwa na sara ambazo ni za kukaririwa lakini hazikuweza kubadilisha maisha yetu.*

Mwishoni mwa mwaka 2019 Yesu alinifanya kuwa lango la wokovu wa familia yote, kwa wakati huo haikuwa vigumu sana kuwaeleza wazazi wangu na ndugu zangu wengine kwa sababu kila mmoja alikuwa amechoka na maonezi ya shetani ndani ya familia na hivyo tuliungana wana familia wote kuanzia baba, mama, dada zangu, mpaka wajukuu tukamkubari Yesu kuwa Bwana na Mwokozi wa maisha yetu, akatubadilisha kutoka kuwa watu wa dini mpaka kuwa watoto wa Mungu waliojazwa roho mtakatifu wenye uwezo wa kumpinga shetani kwa Jina la Yesu.

Katika maisha yangu siku zote huwa najiona kwamba mimi ni mali ya Bwana hivyo huwa namwambia Mungu ‘mimi sikujiumba bali uliniumba wewe hivyo ninajua kwamba wewe umepanga nile nini, nivae nini, niishi wapi na nifanye kazi gani kwa hiyo sitajisumbua kwa jambo lolote bali nataka kusikia sauti yako ikinipa maelekezo, ninaomba unifungue macho na akili yangu pia niweze kuona na kuelewa, kwa maombi haya mepesei nimekuwa nikimuona Mungu akinijibu na kuniongoza katika mambo yangu yote.

Maisha ni safari na safarai yetu lazima tuiweke mikononi mwa Mungu, Mungu anajua tunahitaji nini katika mwili na roho na hivyo tunatakiwa tusianze jambo lolote bila kumtanguliza Mungu.

*Mungu ametuumba na kuturuhusu tule, tuishi na kufanya kazi kwa kutumia miundo mbinu aliyotuwekea yeye mwenyewe tangu uumbaji. Yeye Mungu ametuchagulia mahali pa kuishi (Edeni) **MWANZO 2: 8** ‘ Bwana Mungu akapanda bustani upande wa mashariki wa Edeni, akamweka ndani yake huyo mtu aliyemfanya’’*

MWANZO 2:15 – 17 “ *Bwana Mungu akamchukua huyo mtu, akamweka katika bustani ya Edeni ailime na kuitunza.*¹⁶ *Bwana Mungu akamwagiza huyo mtu, akamwambia, “Waweza kula matunda ya mti wa wote uliomo bustanini, lakini matunda ya mti wa ujuzi wa mema na mabaya usiyale, kwa maana siku utakapokula matunda ya mti huo, hakika utakufa.”*”

Maandiko haya yanatupa ushahidi kwamba Mungu ametuweka duniani, ametuchagulia vyakula, ametuchagulia na kazi za kufanya; kwa hiyo tukiijua siri ya kuanza na Mungu kwa kila jambo tutakuwa tumejiunganisha katika miundo mbinu ya Mungu; Yeye atatuambia tule nini ili tuwe salama, tuishi wapi ili tupate Amani na tufanye kazi gani ili tuweze kufanikiwa.

Kondoo Anayemtegemea Mchungaji Wake

‘Bwana ndiye mchungaji wangu, sitapungukiwa na kitu. Katika malisho ya majani mabichi hunilaza, Kando ya maji ya utulivu huniongoza’ (ZABURI 23). Hii ni zaburi iliyotungwa na Mfalme Daudi akieleza tumaini lake kwa Mungu. Utaona Daudi ametumia neno mchungaji, lakini pia amesemea ‘katika malisho ya majani mabichi hunilaza’” Je, hii ina maana gani?...

- i. Daudi anajilinganisha yeye na mfugo kama kondoo, mbuzi au Ng’ombe.
- ii. Daudi anakili kwamba mfugo wowote au mnyama wa kufugwa anategemea kupata malisho kupitia uongozi wa mchungaji wake.

Wana wa Mungu wote wamepewa sifa ya kondoo na YESU anasema yeye ni mchungaji mwema anayeutoa uhai wake kwa ajilia ya kondoo. (YOHANA 10; 11). Kwa hiyo Mungu ametuita kondoo kwasababu hakutuumba ili tujitegemee bali tumtegemee yeye awezaye kufanya chochote kwa ajili yetu (kondoo). Usalama wa kondoo upo mikononi mwa mchungaji wake, yeyote atakaye mgusa kondoo amemgusa mchungaji wake... YEYOTE ATAKAYEMGUSA MTOTO WA MUNGU AMEMGUSA MUNGU MWENYEWE....

Hivyo kama mwana wa Mungu, unapaswa kuishi kwa kumtegemea Mungu na sio mwanadamu, fedha, kazi, wazazi au nguvu nyingine bali umtegemee Mungu pekee, usijiamini kwa jambo lolote kama maisha yako haujayakabidhi mikononi mwa Mungu.

❖ **Unapokubari kumtegemea Mungu fahamu mambo yafuatayo;**

1. Haijalishi una umri gani, mbele za Mungu wewe bado ni mtoto.
2. Kama mtoto wa Mungu lazima uwe na sauti inayokuongoza katika mambo yako yote na hiyo sauti ni Mungu mwenyewe. ‘Mtumaini BWANA kwa moyo wako wote, wala usizitegemee akili zako mwenyewe; Katika njia zako zote mkiri yeye, Naye atanyosha mapito yako’’ (Mithali 3;5 – 6)
3. Unapaswa kuwa na hofu ya Mungu wakati wote. ‘kumcha Bwana ndiyo chanzo cha maarifa’’

4. Ukimuheshimu Mungu Baraka zake zitakufuata wakati wote nawe utaitwa heri yaani mbarikiwa; '*wandaa meza mbele yangu, Machoni pa watesi wangu. Umenipaka mafuta kichwani pangu, Na kikombe changu kinafurika*' (ZABURI 23;5)
5. Unapojinyenyekeza mbele za Mungu, yeye atakupandisha.

Faida za Kumtanguliza Mungu Kwenye Kila Jambo

Kumtanguliza Mungu katika kila jambo la maisha yetu huleta mabadiliko makubwa kiroho, kihisia, na hata kimwili. Hapa kuna faida kuu za kumweka Mungu wa kwanza:

1. Mwongozo wa Hekima na Maamuzi Sahihi

Mungu anatupa hekima ya kufanya maamuzi sahihi tunapomtanguliza. Biblia inasema: "*Mtumainie Bwana kwa moyo wako wote, wala usizitegemee akili zako mwenyewe; katika njia zako zote mkiri yeye, naye atayanyosha mapito yako.*" (Mithali 3:5-6)

2. Amani ya Moyo na Utulivu wa Akili

Kumtanguliza Mungu hutufanya tuwe na amani hata katikati ya changamoto. Yesu alisema:

"Amani nawaachieni; amani yangu nawapa; Niwapavyo mimi sivyo kama ulimwengu utoavyo. Msifadhaike mioyoni mweny wala msiwe na woga." (Yohana 14:27)

3. Ulinzi na Ukombozi Dhidi ya Majaribu

Mungu anawalinda wanaomtegemea dhidi ya mitego ya adui na changamoto za maisha.

"Yeye aketiye mahali pa siri pake Aliye juu Atakaa katika uvuli wa Mwenyezi." (Zaburi 91:1)

4. Mafanikio ya Kweli na Baraka

Kila tunachogusa kinabarikiwa tunapomtanguliza Mungu. Zaburi 1:1-3 inasema mtu amchaye Mungu ni kama mti uliopandwa karibu na maji, huzaa matunda kwa wakati wake.

5. Mahusiano Bora na Watu

Tunapomtanguliza Mungu, tunajifunza kusamehe, kupenda, na kushirikiana na wengine kwa amani.

"Jitahidini kudumisha umoja wa Roho katika kifungo cha amani." (Waefeso 4:3)

6. Kuwa na Mwelekeo wa Milele

Tunapomtanguliza Mungu, tunatambua kuwa maisha haya duniani ni ya muda, na tunajiandaa kwa uzima wa milele pamoja na Yesu mbinguni.

"Lakini utafuteni kwanza Ufalme wa Mungu na haki yake, na hayo yote mtazidishiwa." (Mathayo 6:33)

Tangu nimjue Yesu sijawahi kujuta katika maisha yangu. Kila siku ninaona akitenda mambo makuu kwangu na familia yangu kuanzia pale tu tulipoamua kuyakabidhi maisha yetu kwake.

Ninakumbuka hata marehemu mama yangu alipokuwa anatuaga alisema; ***“ hapa nilipofika leo ni Mungu amenifikisha na nyie ninawaagiza musije mukamwacha huyu Mungu”***. Maneno hayo aliyasema sekunde chache kabla ya kumaliza pumzi yake ya mwisho, maisha yangu yote nimeheshimu hayo maagizo ndio maana siachi kumtumikia Mungu kwa nguvu zangu zoote.

Kumtanguliza Mungu katika kila jambo siyo tu wajibu wa kiroho bali ni msingi wa maisha yenye amani na mafanikio halisi. Wale wanaompa Mungu nafasi ya kwanza huishi maisha yenye mwelekeo, wakiwa na uhakika kwamba kila hatua yao inaongozwa na hekima ya kiungu. Mungu anapokuwa kipaumbele chetu, hofu inageuzwa kuwa imani, mashaka yanakuwa tumaini, na changamoto zinakuwa fursa za ukuaji wa kiroho.

Tunapomweka Mungu mbele katika maamuzi yetu, mahusiano yetu, na shughuli zetu za kila siku, tunajifunza kutembea kwa utulivu na ujasiri, tukijua kuwa Yeye ndiye nahodha wa maisha yetu. Hili ni chaguo ambalo huleta matunda mema, siyo tu katika maisha haya, bali pia katika uzima wa milele.

Kwa hiyo, tuazimie kila siku kumtanguliza Mungu—katika mawazo yetu, matendo yetu, na mipango yetu

2. SIRI YA KUFUNGA MLANGO

Miaka michache iliyopita, nilipitia kipindi kigumu sana maishani mwangu. Nilikuwa nimepoteza kazi yangu ghafla, pamoja na miradi midogo niliyokuwa nayo, hali yangu ya kifedha ilizorota kwa kasi. Wale niliowategemea kwa msaada walionekana kujitenga nami, na hata rafiki wa karibu walionekana kutoelewa uzito wa mateso yangu.

Kila siku ilizidi kuwa giza, na moyoni mwangu nilianza kujawa na mashaka. "Mungu kweli yuko wapi?" Nilijiuliza. Nilihisi kama ameniacha peke yangu kwenye dhoruba kali. Nilipokuwa nikisali, sikuweza kuhisi uwepo wake kama zamani. Kulikuwa na ukimya mzito—na huo ndio ulionitisha zaidi.

*Lakini ndani ya moyo wangu, nilikumbuka maneno ya **Zaburi 27:14: "Umngoje Bwana, uwe hodari, upige moyo konde, naam, umngoje BWANA."** Niliamua kufanya kitu tofauti. Badala ya kulalamika na kuhisi huzuni, nilijifungia mahali pa utulivu na nikaanza kumtafuta Mungu kwa maombi na kufunga.*

Siku ya kwanza ilionekana ngumu. Nilihisi kama nazungumza na ukuta. Lakini niliendelea. Nilijikumbusha kuwa imani ni zaidi ya hisia. Siku ya pili, niliendelea kusoma Neno la Mungu kwa bidii, hasa maandiko yanayohusu uvumilivu na imani. Nilianza kuhisi amani kidogo.

Kadri nilivyoendelea kumtafuta Bwana, nilihisi akianza kunijaza tena na tumaini jipya. Sauti yake haikuwa kwa radi au upepo mkali, bali katika utulivu wa moyo wangu. Akaniambia, "Sikuwahi kukuacha, ulikuwa tu huwezi kuniona kupitia machozi yako."

Ndani ya wiki chache, mambo yalianza kubadilika. Nilipata kazi mpya, nzuri zaidi ya ile ya awali. Lakini zaidi ya hayo, nilipata kitu cha thamani zaidi—ufahamu kuwa Mungu yuko hata wakati hatumhisi. Jaribu lile lilinifundisha kuwa katika ukimya wa Mungu, bado anafanya kazi kwa ajili yetu.

Tangu siku hiyo, nimejifunza kumtumaini Mungu hata katikati ya giza. Maana najua sasa kuwa giza haliwezi kuzima mwanga wa neema yake. Maombi yangu wakati ule yalinifundisha siri muhimu sana; SIRI YA KUFUNGA MLANGO; Yesu alinifundisha mahali pa kusali na jinsi ya kusali....

“Bali wewe, usalipo, ingia katika chumba chako cha ndani, na ukiisha kufunga mlango wako, usali mbele za Baba yako aliye sirini; na Baba yako aonaye sirini atakujazi.” (Mathayo 6:6)

Yesu Mwenyewe ndiye alisema maneno haya yenye Baraka; Yesu alipofundisha kuhusu maombi, alisisitiza sana **mahali pa siri**. Mfuasi wa Yesu yeyote anayekubali kusafiri na Yesu katika safari ya maisha lazima ajifunze maombi. Kwahiyo hivi ndivvo Yesu alifundisha kuhusu maombi, jambo la kwanza alilofundisha kuhusu maombi lilikuwa **umuhimu wa mahali pa siri**. Katika mistari inayofuata, angefundisha jinsi ya kuomba, lakini kwanza anafundisha mahali pa kuomba. Mathayo 6:6 ina siri yenye nguvu kuhusu mahali pa maombi, lakini kabla ya kushiriki siri hiyo, hebu niulize swali. *Je, mara kwa mara unahisi kutengwa na Mungu? Je, unahangaika kuhisi uwepo wa Mungu unapoomba? Je, Anaonekana kuwa mbali na wewe? Je, unatamani kujua kwamba Yeye yuko nawe?*

Ikiwa jibu lako kwa maswali hayo ni “Ndio,” basi nina habari njema sana kwako. Kuna njia ya uhakika ya kuingia katika uwepo wa Mungu;

- ❖ Ingia jinsi ulivyo – ukiwa na hofu, huzuni, wasi wasi, uchungu, woga, mzigo, ingia hivyo hivyo kwasababu Baba yako tayari yuko sirini, yupo chumbani anasubiri ukamwambie unachotaka au kinachokusumbua au kinachokufanya uwe hivyo ulivyo. Ukisoma injili ya *Mathayo 26:36-46* utaona jinsi ambavyo Yesu alikuwa akihangaiwa juu ya hisia alizokuwa nazo, saa ya mauti ilikuwa imefika mwili wake ukaingia woga wa kifo nafsi yake ikafadhaika lakini maandiko hayatuambii kwamba YESU alisubiri mpaka hiyo hali iishe ndipo aombe bali maandiko yanasema ***"Kisha akaendelea mbele kidogo, akaanguka kifudifudi, akasali akisema, Baba yangu, ikiwezekana, kikombe hiki kiniepuka; walakini si kama nitakavyo mimi, bali kama utakavyo wewe."*** huu ni mfano halisi kwamba tunatakiwa kuingia mahali pa siri tukiwa jinsi tulivyo yaani jinsi tunavyojisikia tusiigize bali tuwe na uhalisia wa hisia zetu mbele za Baba.
- ❖ Jiandae kuzungumza na kusikiliza – utakapoingia mahali pako pa siri ili useme na Baba yako hakikisha pia umejiandaa kusikia, wengi wetu tunaomba sana tuwapo kanisani, vyumbani mwetu, ofisini, au katika ibada zetu za familia na baada ya kuomba tunasema AMINA kisha tunafunga ibada na kuendelea na shughuli zetu tunasahau kwamba kuna Muda wa kusikiliza majibu kutoka kwa tuliyemsemesha. Maombi ni mawasiliano, utakapoingia mahali pako pa siri usifanye haraka kuondoka, utasema mambo yako yote kwa Baba yako mkiwa sirini na kisha subiri kwa kunyamaza kimya kwa muda wa kuridhisha ili usikie sauti ya Mungu ikikupa maelekezo na kisha utakuwa umekamilisha kuwasiliana. Yesu tayari yupo chumbani wewe na yeye mpo mahari pa siri usifanye kosa la Martha bali chukua tabia ya Mariamu! **(Luka 10:38-42)**

Kufunga mlango ni kujitakasa, kusamehe na kujisamehe, kuondoa picha za watu akilini mwako unaodhani wamekuumiza au wamekuudhi, ruhusu moyo wako unyamaze kwa Bwana, omba kwa kuwasiliana usiombe kwa kushitaki au kukemea kwa kutumia picha za watu ulionao akilini zungumza kuhusu hali, hisia au tatizo usizungumze kuhusu watu mfano; unaweza kuomba Mungu akupe mume/mke lakini usiombe mtu Fulani ndio awe mke wako au mume wako, unaweza kuomba kuhusu uchumi mzuri lakini hauwezi kuorodhesha vitu unavyotaka kuwa navyo ili ujione una uchumi mzuri ...Kumbuka kwamba jinsi uonavyo wewe sivyo aonavyo Mungu. MAWAZO YA MUNGU SIO SAWA NA MAWAZO YA MWANADAMU. (ISAYA 55:8-9)

Kuna njia ya hakika kabisa ya kupata ukaribu wa papo hapo na Baba, na Yesu Mwenyewe alitupa ufunguo. Yesu alitupa siri hii katika mstari huo wa Mathayo 6:6 aliposema, “Baba yako aliye mahali pa siri.” Yesu anasema, “Baba yako yuko tayari mahali pa siri. Ameenda mbele yako; ANAKUSUBIRI. Mara unapoingia mahali pa siri, uko katika uwepo wa papo hapo wa Baba yako.” Yesu alithibitisha ukweli huu mara mbili katika sura hiyo hiyo. Anasema tena katika Mathayo 6:18, “*...ili usionekane kwa watu kuwa unafunga, bali kwa Baba yako aliye mahali pa siri; na Baba yako AONAYE KWA SIRI atakupa waziwazi.*” Yesu alisema mara mbili kwa kusisitiza, ili tujue kwamba mahusiano yetu ya kifaragha na Mungu ni MUHIMU SANA.

Unapojenga maisha yako juu ya ukaribu uliojaa baraka wa uhusiano wa mahali pa siri na Mungu, unajenga juu ya mwamba.

Unaujenga msingi wako wa maisha mahali salama. Hili siyo tu wazo langu, bali ni mafundisho ya wazi ya Bwana wetu Yesu Kristo.

Kanuni ambazo Yesu alitoa katika Sura ya 5 hadi 7 ya Injili ya Mathayo zilikuwa zote zimetolewa wakati mmoja, katika mahubiri makubwa. Yesu alisema kwamba katika mahubiri haya alikuwa akiweka mawe ya msingi ya maisha ya wanafunzi. Hivi ndivyo alivyosema: “Kwa hiyo kila asikiaye maneno yangu haya na kuyafanya, nitamfananisha na mtu mwenye akili aliyejenga nyumba yake juu ya mwamba; mvua ikanyesha, mafuriko yakaja, na pepo zikavuma na kupiga nyumba ile, nayo haikuanguka, kwa kuwa misingi yake ilikuwa juu ya mwamba. Lakini kila asikiaye maneno yangu haya asiyafanye, atafananishwa na mtu mpumbavu aliyejenga nyumba yake juu ya mchanga; mvua ikanyesha, mafuriko yakaja, na pepo zikavuma na kupiga nyumba ile, nayo ikaanguka, na maangamizo yake yakawa makubwa.”
(Mathayo 7:24-27)

Ujumbe wa Yesu hauna shaka. Anasema, “Ukisikiliza na kufanya kile nilichokufundisha katika Mahubiri ya Mlimani, utaweka misingi katika maisha yako itakayostahimili dhoruba kali za maisha.” Na niamini, rafiki, dhoruba zitakuja bila shaka! Kuna dhoruba ambazo bado hazijagonga maisha yako. Swali ni, je, utakuwa na msingi wa kuhimili dhoruba hizo?

Moja ya vipengele muhimu zaidi vya msingi huo ni kuwa na maisha ya siri thabiti na Mungu. Wale wanaosikia neno hili na kulifanya siyo tu watapata ukaribu na Baba kila siku, bali pia watakuwa tayari kuhimili dhoruba kubwa—iwe zinatokana na ghadhabu ya kuzimu, usumbufu wa dunia, au milango ya baraka za mbinguni.

Je, unayo ratiba ya maombi ya faragha, ni changamoto gani zinakuzuia kuwa na muda wa faragha na Mungu?

Ninaelewa kwamba mara nyingi imekuwa ni vigumu kwetu sisi wakristo kupanga ratiba ya kudumu kwa ajili ya maombi. *Rafiki yangu mmoja aliwahi kuniaga kwamba hataonekana mahali popote kwa muda wa siku tano, nilipomuuliza unakwenda wapi akanijibu kwamba anakwenda mahali maalumu kwa ajili ya maombi na ratiba yake ilikuwa inaanza siku inayofuata baada ya siku anayoniaga, nilifurahi sana kuisikia ratiba yake nikamtia moyo na kumtakia neema ya Mungu. Lakini siku mbili baadae nikakutana nae mahali, nilistaajabu sana, hata yeye binafsi hakuwa katika hali ya kijiamini sana. Nilipomuuliza kuhusu ratiba yake ya kutoeka kwa ajili ya maombi alinijibu kwamba alishindwa kutekeleza ratiba yake kwani muda mchache tu tulipoachana alipokea taarifa za kumvunja moyo, mama yake mzazi alikuwa mgonjwa sana, shuleni watoto walifukuzwa ada, ni siku hizo hizo walikuwa wametangaziwa kazini kwao kwamba kuna changamoto kidogo za kiutawala hivyo mishahara yao itachelewa kidogo ingawa ni kwa muda usiojulikana.*

Ni wazi kwamba rafiki yangu alikosa utulivu wa kiakili kiasi cha kushindwa kuwa na mlengo mnyoofu (focus) katika maombi. Mambo kama haya yanatupata sisi sote, hata kama sio kwa kufanana lakini kila mmoja anacho kikwazo zaidi ya kimoja kinachokwamisha utekelezaji wa ratiba zetu za maombi. Lakini Yesu anatuongezea ushauri wa nini cha kufanya; **LUKA 18: 1** “**akawaambia mfano, ya kwamba imewapasa kumwomba Mungu siku zote, wala wasikate tamaa.**

Kwa hiyo Yesu bado anasisitiza kwamba pamoja na hali zetu zote bado tunapaswa kuweka maombi kama ni kipaumbele cha kwanza cha siku, “siku zote” maana yake ni kila siku. Msisitizo muhimu hapa ni kuhakikisha tunaomba kila siku kwasababu mambo yanayotuzunguka kila siku ndio hayohayo Yesu anataka twende nayo kwake “faragha” naye anayo majibu yake.

Siri ya muhimu kukumbuka ni FUNGA MLANGO WAKO!

3. UMUHIMU WA KUUKOMBOA MUDA.

Waefeso 5:15-16, *"Basi angalieni sana jinsi mnavyoenenda; si kama watu wasio na hekima, bali kama wenye hekima; mkiukomboa wakati kwa maana zamani hizi ni za uovu."*

Miongoni mwa mafunzo tunayoweza kupata kupita kifungu hiki cha barua ya mtume Paulo kwa waefeso ni;

1. **Kuwa waangalifu:** Waamini wanahimizwa kujiangalia kwa makini jinsi wanavyoishi ili maisha yao yaonyeshe hekima na ukweli wa Injili.
2. **Kuishi kwa hekima:** Badala ya kuishi kwa njia ya upumbavu au isiyozingatia mapenzi ya Mungu, tunapaswa kufanya maamuzi yanayoonyesha busara na kuelewa Neno la Mungu.
3. **Kukomboa wakati:** Tunahimizwa kutumia muda wetu vizuri, tukizingatia kwamba dunia ina changamoto nyingi na siku hizi zimejaa uovu.

Hayo ni mafunzo muhimu kwa mkristo yoyote; LAKINI nataka tuangalie kipengele kimoja tu katika hili andiko ambacho ni MUDA. Tumeshuriwa na mtume Paulo kuwa tuwe waangalifu na jinsi muda wetu unavyotumika na anatuambia kwamba zamani hizi yaani nyakati hizi au siku hizi ni za uovu.

Siku moja nikiwa Dar es salaam maeneo ya Mwenge, ilikuwa ni majira ya jioni nikizungumza na rafiki yangu Jua lilikuwa limeanza kupotea taratibu ghafla nikakumbuka kuangalia saa yangu na kugundua jambo la kutisha—ilibaki dakika ishirini tu kabla ya treni ya kuelekea Morogoro kuondoka kutoka Kituo cha Treni cha Magufuli! Moyo wangu ulianza kupiga kwa kasi. Nilijua wazi kuwa kutumia daladala ilikuwa sawa na kujichelewesha makusudi kutokana na foleni za Dar es Salaam, hasa wakati wa jioni. Hakukuwa na muda wa kupoteza!

Bila kusita, niliruka hadi barabarani na kumsimamisha bodaboda wa kwanza niliyemuona. "Kaka, natakiwa nifike Kituo cha Treni cha Magufuli haraka sana! Nina tiketi ya Morogoro, Tafadhali, fanya kila uwezalo ili niwahi!"

Dereva alinipima kwa macho kwa sekunde chache, kisha akatabasamu. "Shikilia vizuri, kaka. Safari hii si ya kawaida kwani ni kweli muda uliobaki ni mchache sana kabla uachwe!" alisema huku akivaa kofia yake ngumu na kupiga honi ndogo ya tahadhari.

Safari ilianza kwa kasi ya ajabu. Pikipiki ilichanja mbuga kupitia barabara za jiji kwa ustadi wa hali ya juu. Tulipenya kati ya magari yaliyokwama kwenye foleni, tukikata kona kwa umakini mkubwa huku upepo mkali ukinipiga usoni. Nilihisi kama nilikuwa kwenye mbio za magari, moyo wangu ukidunda kwa msisimko na hofu kwa wakati mmoja.

Dereva alizidisha mwendo kila baada ya sekunde, tuliruka matuta madogo barabarani, tukakwepa magari na mabasi yaliyokuwa yakijazana, na kila dakika iliyopita ilinifanya nihisi natembea kwenye mstari mwembamba kati ya kufa na kupona au kuwahi treni au kuchelewa.

Hatimaye, tuliingia eneo la Kituo cha Treni cha Magufuli, nikiruka haraka kutoka kwenye pikipiki kabla hata haijasimama vizuri. Nilimlipa dereva huku nikiwa bado natoa jasho, kisha nikakimbilia kwenye lango kuu.

Nilipoingia ndani mlinzi aliniambia kwa sauti kimbia! Nilimsikia mhudumu wa treni akitangaza kufunga milango sekunde kadhaa zijazo. Kwa hatua ndefu za haraka, nilifanikiwa kuruka ndani sekunde za mwisho kabla haijaondoka. Niliingia kwenye behewa tofauti na nililoandikiwa kwenye tiketi yangu, nikaanza kutembea kuelekea kwenye behewa huku treni likiwa limeshashika kasi yake, Nilipoketi kwenye kiti changu, nikavuta pumzi ndefu na kumshukuru Mungu.

Nilifanya yote haya kwa sababu nilijua thamani ya muda. Kama ningechagua daladala, foleni za Dar es Salaam zingekuwa mwiba mkali kwangu, na ningepoteza safari yangu ya kurudi Morogoro. Hii ilikuwa somo muhimu—wakati mwingine, ili kuukomboa muda, ni lazima uchukue hatua za haraka na maamuzi ya ujasiri!

Unaposafiri kuelekea mahali ni lazima utafikiria kuhusu muda utakaoutumia kwa safari na aina ya usafiri unaotaka kuutumia, ukitaka kufika kwa haraka utachagua usafiri wa haraka na ukitaka kufika kwa muda wa kawaida utatumia usafiri utakaoendana na malengo yako, kwa hiyo, hapa kuna vitu viwili yaani **muda wa safari** na **chombo cha usafiri**. *Je? Katika safari yetu ya maisha ya kila siku ya kiroho, kimwili, kielimu, kiuchumi, ndoa, kiafya na nakadharika tunasafiri kwa muda tuliopangiwa na Mungu? Na je, tunatumia usafiri tuliopangiwa na Mungu?*

Maswali haya yakupe kufikiria kwamba shetani anao uwezo wa kuzipotosha safari zetu za maisha kwa kuharibu muda wa safari na njia za kusafiri ndio maana mtume Paulo anasema zama hizi ni za uovu maana yake hila za shetani ziko dhahili juu ya kuharibu safari za maisha yetu.

Tujifunze kitu katika kitabu cha Mambo ya WALAWI SURA YA 15 na kitabu cha Marko sura ya 25. tutaona jinsi shetani anavyocheza na muda

Mambo ya Walawi 15 inazungumzia sheria na maagizo kuhusu **uchafu wa kimwili** unaotokana na utoaji wa majimaji kutoka mwilini, ambayo yalihesabiwa kuwa yanamfanya mtu asiwe safi kwa mujibu wa Sheria ya Agano la Kale. Hii ni mojawapo ya sura zinazozingatia usafi wa kiibada na jinsi ya kushughulikia uchafu unaoweza kumzuia mtu kushiriki ibada katika maskani ya Mungu.

Pia katika sura hii Mungu alielezea MUDA ambao mtu atatengwa kwa wakati ambao anatokwa na damu. **MAMBO YA WALAWI 15:19** ‘*Mwanamke ye yote, kama anatokwa na kitu, na kitu chake alichokuwa nacho mwilini mwake ni damu, ataketi katika kutengwa kwake muda wa **siku saba**; na mtu ye yote atakayemgusa atakuwa najisi hata **jioni**. Kila mmoja anafahamu kwamba hii ni desturi ya kawaida sana kwa mwanamke na siku saba si kitu kwa sababu hali hii haitokei kila siku, na hata mtu anayemhudumia mwanamke akiwa katika hali hii atakuwa najisi mpaka jioni kwahiyo kuvumilia mpaka jioni si kitu sana kwani hata hivyo wahudumiaji wanaweza kupokezana kwa wakati ambao yeye mwanamke mwenye kutokwa damu atavumilia ndani ya siku saba na kumaliza zamu yake kisha kuendelea na ibada na majukumu yake ya kila siku.*

Lakini ukiendelea kusoma Zaidi hii sura ya kumi na tano (15) utagundua jambo lingine kwamba huyu mwanamke hakupaswa kutoka nje, hakupaswa kujichanganya na watu, alipaswa kutengwa yeye pamoja na vitu vyake vyote lakini hata hivyo ni kwa SIKU SABA TU!

Utaratibu huu Mungu aliuweka na ni utaratibu wa kawaida tu, lakini SHETANI ni mwenye hila na tumejifunza kupitia Waefeso kwamba hizi ni zama za uovu ni zama za shetani kujidhihirisha na hila zake, Mungu anapopanga utaratibu wa maisha yetu shetani yeye anatafuta mpenyo wa kuharibu utaratibu au ratiba ya Mungu kwa lengo la kutupotezea muda kinyume na vile MUNGU alivyopanga, kutucheleweshwa na kututesa katika safari yetu ya maisha ya wokovu.

Hii tataliona kupitia Injili ya MARKO 5:25 *"Na alikuwapo mwanamke mmoja aliye na ugonjwa wa kutokwa damu kwa miaka kumi na mbili. Hii ni sehemu ya hadithi inayomhusu mwanamke ambaye alikua na ugonjwa wa kutokwa damu kwa muda mrefu, ukiangalia hadithi hii ukailinganisha na kile MUNGU alichosema katika MAMBO YA WALAWI 15;19 utaona kitu cha ajabu sana; MUNGU aliruhusu mwanamke kutokwa na damu kwa muda wa siku saba tu na baada ya hapo anakuwa amepona, ijapokuwa katika hizi siku saba mwanamke atapitia changamoto kidogo za kutengwa yeye na vitu vyake, kutojichanganya na watu na kutofanya ibada za pamoja lakini hali hii imewekewa ukomo wa siku saba tu.*

SHETANI, kwa kuijua hii sheria kuna kitu anakifanya, anamwacha mwanamke atokwe na damu kama MUNGU alivyosema lakini anabadilisha muda kutoka siku saba mpaka miaka kumi na mbili ya mateso biblia inatuambia huyu mwanamke alipita kwa matabibu wengi (madktari) lakini hakupata msaada, alipita kwa wataalamu mbali mbali lakini hakupata msaada, alitumia gharama kubwa, fedha zote alizokuwa nazo, na mali zake nyingi ziliuzwa ili kugharamikia matibabu lakini hakupata msaada badala yake aliendelea kuugua na kupoteza mali kwa miaka yote. Lakini ukumbuke kwamba MUNGU hakuifanya hali ya kutokwa damu kama ni ugonjwa bali ni desturi tu kwa mwanamke lakini shetani kwa kwa kuwa ni mwenye hila akageuza kuwa ni ugonjwa.

Kwa hiyo huyu mama alipoteza muda wa kutosha akiwa katika hali ya kuugua, alitengwa kwa miaka yote kumi na miwili, hakujichanganya na watu kwa muda wote wa miaka kumi na mbili hakufanya kazi yoyote kwa muda wa miaka kumi na mbili!.....

Hivi ndivyo shetani anacheza na muda, shetani huwa hazuii mtu kupanga mipango ila anazuia matokeo ya mipango, si mara zote atazuia usifanye kazi ila atazuia matokeo ya kazi unayofanya ndio maana wapo watu wengine wamekuwa kazini kwa muda mrefu lakini hawana maendeleo yoyote. Mtu mwingine anaweza akakushirikisha mipango yake na malengo aliyonayo mpaka ukaogopa lakini jambo la kushangaza utamuona mtu yule yule mwaka hadi mwaka yupo vile vile, wanaoingia kazini nyuma yake wanafanya maendeleo lakini yeye yupo pale pale na sana sana utasikia akilalamika kuhusu madeni aliyonayo na ugumu wa maisha unaomkabili.....

Mtume Paulo anasema tuangalie tunavyoenenda si kama watu tusio na hekima.... Lakini pia anashauri kuukomboa wakati

Kupitia somo hili anza kujiona kwamba una jukumu la kuukomboa muda wako, malengo uliyonayo yapo ndani ya muda ulionao hapa duniani, shetani hatakuzuia kupanga malengo ila atazuia muda wa malengo kutimia kwahiyo ukiwa unasoma kitabu hiki kumbuka mipango yote uliyopanga anza kuiombea, komboa wakati wa kutimia kwa mipango yako, kama MUNGU amepanga iwe ndani ya muda Fulani ombea huo muda ukifika mipango yako itimie shetani asizidishe wala kupunguza muda wako bali muda wako ubaki katika mipango ya Mungu.

Fahamu mbinu zingine 8 anazotumia shetani kukucheleweshwa kutimiza malengo na kusudi la Mungu.

1. Hofu na Mashaka

Musa alihisi hana uwezo wa kuongoza Waisraeli kutoka Misri kwa sababu alikuwa na kigugumizi (**Kutoka 4:10**). Yesu alimwambia Petro atembe jua ya maji, lakini Petro alipoanza kuogopa, alizama (**Mathayo 14:29-31**). Shetani hujaribu kupandikiza hofu na mashaka moyoni mwa mtu ili asiwe na **ujasiri** wa kuchukua hatua zinazohitajika kufanikisha ndoto zake. Miongoni mwa aina za hofu ambazo shetani anazitumia ni hofu ya kushindwa, hofu ya kukosolewa, au hofu ya kutojua kitakachotokea, kujiona una kasoro. Kama mkristo unahitaji kuwa na nguvu za uhakika na kuamini kwamba Mungu amekuchagua na yupo pamoja na wewe.

Muhubiri mmoja wa injili (Mama Imma) hupenda kusema *jione kwamba wewe ni mtu maalumu Mungu amekuamini hivyo hivyo ulivyo- jiamini!*

2. Uvivu na Kutochukua Hatua

Tabia hii ilingarimu sana Mfalme Farao, aliendelea kuahirisha kuwaruhusu Waisraeli waondoke Misri licha ya mapigo (**Kutoka 8:9-10**). Uvivu na kuhairisha mambo ni chembe chembe za kukosa utii. Shetani anawafanya watu waahirishe mambo muhimu kwa kisingizio cha kutokuwa tayari au kusubiri wakati mzuri zaidi.

3. Kuzungukwa na Watu Wasiostahili

Chunguza sana aina ya watu wanaokuzunguka, tabia zao na aina ya ushauri wanaokupa. Rehoboamu, mwana wa Sulemani, alipoteza ufalme kwa kusikiliza ushauri mbaya wa vijana wenzake badala ya wazee wenye hekima (**1 Wafalme 12:6-11**). Shetani anaweza kumzungushia mtu marafiki au washauri ambao hawana maono kama yake ili watumike kukatisha tamaa. Hii huchelewesha maendeleo kwa sababu mtu anaweza kupokea ushauri mbaya au kushawishika kuacha juhudi zake. Uwe na tahadhari na aina ya marafiki unaotumia muda nao mwingi pamoja.

4. Mawazo ya Kukata Tamaa na Kujihisi Hufai

Yumkini kuna jambo umejaribu mara kadhaa na kushindwa, isikufanye ufikiri na kuamini kwamba hautaweza kamwe, wazo hilo ni la shetani! Gideoni alijiona duni na mdogo sana kuongoza Waisraeli, lakini Mungu alimwambia, "Bwana yu pamoja nawe, wewe shujaa wa vita!" (**Waamuzi 6:12-15**). Shetani hutumia hali ngumu za maisha ili kuwafanya watu waone kama hawawezi kufanikiwa lakini ukifanya bidi na kujipa moyo utafanikiwa tu.

5. Majaribu ya Kidunia na Mambo ya Kupoteza Muda
Anaweza kutumia starehe za dunia kama vile mitandao ya kijamii, michezo ya kubahatisha, anasa, na burudani ili mtu apoteze muda badala ya kufanikisha malengo yake. Hii husababisha mtu kushindwa kuwa na muda wa kuwekeza katika maendeleo yake ya kiroho, kielimu, au kifedha. Kumbuka kwamba iko njia ionekanayo kuwa sawa machoni pa mtu, Lakini mwisho wake ni njia za mauti (**Mithali 14:12**). **Achana na mambo ya dunia hiyo ni mbinu ya Ibilisi kukudhoofisha!**

6. Kukufanya Utegemee Nguvu Zako Mwenyewe Badala ya Mungu

Kuamini kuwa unaweza kila kitu kwa akili na nguvu zako mwenyewe, bila kutegemea Mungu ni kujidanganya kabisa. Mungu humshusha mtu mwenye kiburi na majivuno. Mfalme Nebukadneza alijivunia utawala wake bila kumheshimu Mungu, na akapoteza ufalme wake kwa muda (**Danieli 4:30-33**). Kama mkristo, usiruhusu shetani akukosanishe na Mungu wako.

7. Mapambano ya Kiroho na Kuzuia Mafanikio

Hii ni mbinu ya vikwazo vya kiroho kwa kutumia roho za kushindwa, roho za madeni, vifungo vya kutofanikiwa, magonjwa ya muda mrefu au ya mara kwa mara. vizuizi vya kifamilia. Hii inaweza kufanya mtu aone kila anachojaribu hakifanikiwi licha ya bidii zake. Hata hivyo, bado tunayo nafasi ya kushinda endapo tutaiita damu ya Yesu.

8. **Kukufanya Usielewe Majira ya Mungu**

Shetani anaweza kumfanya mtu awe kipofu kwa wakati wa Mungu wa kuinuliwa, hivyo anapopewa fursa anashindwa kuitumia kwa sababu hajui kwamba huo ndio wakati wake wa kupaa. *Kulikuwa na kijana mmoja aliyekuwa na ndoto ya kuwa mfanyabiashara mkubwa. Alianza biashara ya kuuza mavazi, lakini kila alipopata faida, alitumia pesa zake zote kwa starehe na anasa, akiamini kwamba "bado ana muda mwingi" wa kujenga biashara yake. Miaka ilivyopita, marafiki zake waliokuwa wakifanya biashara pamoja walipanuka na kufanikiwa, lakini yeye alibaki pale pale, akihangaika kifiedha. Alikuwa kugundua kuwa alipuuzia wakati ambao Mungu alimpatia kuwekeza kwa hekima.*

Hii ni kama ilivyotokea kwa **Wana wa Israeli**, ambao hawakuelewa wakati wao wa kuingia Nchi ya Ahadi na wakakosa fursa hiyo kwa miaka 40 kwa sababu ya kutokuamini kwao (**Hesabu 14:33-34**). Mungu anapofungua mlango wa fursa, ni lazima tuuone na kuutumia ipasavyo kabla haujafungwa.

Ili kushinda hila hizi za Shetani **Omba na kufunga** – Mfano: Danieli (Danieli 9:3), **Soma Neno la Mungu** – Mfano: Yesu alitumia Neno kumpinga Shetani (Mathayo 4:1-11), **Epuka dhambi na mazingira mabaya** – Mfano: Yusufu alikimbia majaribu ya mke wa Potifa (Mwanzo 39:12), **Shikilia imani na kuwa na uvumilivu** – Mfano: Ayubu alipata baraka baada ya kuvumilia (Ayubu 42:10). Na Mungu atakusaidia.

SURA YA PILI.

1. JARIBU NGUVU YA MAOMBI

Katika ofisi moja ya biashara, wanaume wawili walikuwa wakifanya mazungumzo mazito. Mmoja wao, aliyekuwa akiteseka sana kwa sababu ya matatizo ya kibiashara na ya kibinafsi, alitembea huku na huko kwa wasiwasi, kisha akaketi kwa huzuni akiwa karibu na kukata tamaa. Alikuwa amemjia mwenzake kuomba ushauri, kwani mwenzake alijulikana kama mtu mwenye uelewa mkubwa. Kwa Pamoja walizungumza kuhusu tatizo hilo kwa kina lakini bila mafanikio yoyote ya kuona kwamba kuna msaada jambo ambalo lilizidisha hali ya kukata tamaa kwa mtu huyo aliyeteseka. "Nadhani hakuna nguvu yoyote duniani inayoweza kuniokoa," alisema yule kijana mwenye shida.

Mwenzake alitafakari kwa muda mfupi, kisha akasema kwa tahadhari. "binafsi nisingefikia hatua ya kusema hivyo. Naamini unakosea unaposema hakuna nguvu inayoweza kukuokoa. Mimi binafsi nimegundua kwamba kuna jibu kwa kila tatizo. Kuna nguvu inayoweza kukusaidia." Kisha, taratibu akauliza, **"Kwa nini usijaribu nguvu ya maombi?"**

Kwa mshangao kidogo, yule mtu aliyekata tamaa alisema, "Bila shaka naamini katika maombi, lakini sijui jinsi ya kuomba. Sikufukiria kuhusu maombi kama ni njia inayoweza kushughulikia tatizo langu la kibiashara.

Sijawahi kufikiria hivyo, lakini niko tayari kujaribu maombi ikiwa utanionyesha jinsi ya kufanya"

Alitumia mbinu ya maombi, na hatimaye akapata jibu lake. Shida zake zilimalizika na yeye akaridhika kabisa. Hii haimaanishi kwamba hakukutana na changamoto. Kwa kweli, alikumbana na wakati mgumu sana katika kipindi cha maisha yake, lakini mara zote alifanikiwa kujinasua kutoka kwenye matatizo hayo kwa njia ya maombi. Alikua na kukomaa katika hali hiyo mapka akafikia hatua ya kusema wazi wazi kwamba "Kila tatizo linaweza kutatuliwa, na kutatuliwa kwa usahihi, ikiwa utaomba." **SAFARI YA MAISHA YETU HAPA DUNIANI INAHITAJI MTU MWENYE BIDII YA KUOMBA KWA IMANI.**

Mwanasaikolojia mmoja alisema, "Maombi ni nguvu kubwa zaidi inayopatikana kwa mtu binafsi katika kutatua matatizo yake ya kibinafsi. Nguvu ya maombi ni nguvu inayostaajabisha nguvu ya maombi ni dhihirisho la nishati ya mbinguni inayoruhusu majibu katika ulimwengu wa Roho. Unaweza kupata mwongozo katika matatizo ikiwa maombi yatapewa nafasi ya kwanza ndani ya akili yako katika wakati wa hofu, kuchanganyikiwa na kukosa majibu ya kibinadamu.

Maombi yana uwezo wa kukuweka sawa na utapata miitikio sahihi na thabiti. Maombi yanapopenyenzwa kwa undani ndani ya akili, yanaweza kukufanya upya kabisa. Yanaachilia nguvu na kuhakikisha unasimama katika ufahamu sahihi.

Hawa vijana wawili waliamua kushikamana kuomba kwa muda mrefu juu ya mambo yao mbali mbali huku wakiwa na kanuni ya kibiblia kutoka katika (MATHAYO 18: 20) **Kwa maana walipo wawili watatu wamekusanyika kwa jina langu, nami nipo papo hapo katikati yao"** Walitumia pia kanuni nyingine, ambayo ni, **"Tena nawaambia, ya kwamba wawili wenu wakikubaliana hapa duniani kuhusu jambo lolote watakaloliomba, watapewa na Baba yangu aliye mbinguni"** (Mathayo 18:19).

Kanuni hizi mbili ziliwaongoza kushikamana kwa pamoja katika maombi; unaweza kushirikiana kuomba na mke/mume, rafiki zako kama vile Paulo na Sila walivyoomba na kuimba wakiwa gerezani mpaka milango ikafunguka (Matendo Ya Mitume 16:25 – 26) kilichowapa ushindi ni maombia ya bidi lakini Zaidi sana waliomba kwa kushikamana.

Jaribu Kutumia Kanuni Hizi Kupata Matokeo Bora Kwa Kuomba:

1. **Tenga dakika chache kila siku za kutafakari.** Usiseme kitu chochote. Tafakari tu kuhusu Mungu. Hii itafanya akili yako iweze kupokea kiroho. Zaburi 4:4 inasema *‘Mwe na hofu wala msitende dhambi, tafakarini vitandani mwenu na kutulia’*. Si kila wakati utaomba kwa kuzungumza mbele za Mungu, wakati mwingine inakuhitaji utenge muda wa kukaa kimya midomo yako ikiwa imefumba lakini ndani ya moyo unamtafakari MUNGU.

Jinsi Mungu anavyojibu au kuzungumza na wewe utahisi kama umepata wazo lenye nguvu sana akilini mwako na utasikia nguvu kuu ndani ya mwili kutekeleza wazo ulilopata.... HUYO NI ROHO MTAKATIFU AKIWA KAZINI

2. **Kisha omba kwa maneno ya mdomo, ukiwa na maneno rahisi ya kumwambia Mungu.** Unaweza kusema hivi ‘Roho mtakatifu najua ni wewe unayesema na mimi saa hii, unaweza kuthibitisha unachoniambia kwa ishara na mazingira tofauti, si kwamba nina mashaka na wewe bali napenda kusikia Zaidi kutoka kwako, Nipo tayari uniongoze. AMINA. Haya ni maombi rahisi yanayozungumzwa katika hali ya mahusiano yako na Mungu, wewe na Mungu ni marafiki, mahusiano yenu ni ya Baba na Mwanae. Mwambie Mungu chochote kilicho akilini mwako. Usifikirie kuwa lazima utumie misemo ya kidini isiyobadilika ama uliyoikariri. Zungumza na Mungu kwa lugha yako mwenyewe. Yeye anaelewa.
3. **Omba unapoendelea na shughuli zako za kila siku;** Hebu fikiria kama vile upo njiani unatembea ukiwa umeongozana na rafiki zako, mnatembea barabara ndefu au mko kwenye chombo cha usafiri au mmekaa mahali pa mapumziko, fikiria jinsi ambavyo urafiki wenu unachangamshwa kwa mazungumzo mafupi mafupi yenye kuwapa raha!

Tumia uzoefu ule ule kuzungumza na Mungu mahali popote ulipo zungumza naye kwa kumuuliza maswali, kuomba ushauri au kuelezea unavyojisikia. Tumia maombi mafupi kwa kufunga macho utahisi uwepo wa Mungu.

Kadri unavyofanya hivi kila siku, ndivyo utakavyohisi uwepo wa Mungu kwa karibu zaidi.

4. **Kila mara onyesha utayari kupokea mapenzi ya Mungu.** Kama mtoto wa Mungu lazima uwe na sauti inayokuongoza katika mambo yako yote na hiyo sauti ni Mungu mwenyewe. *‘Mtumaini BWANA kwa moyo wako wote, wala usizitegemee akili zako mwenyewe;*

Katika njia zako zote mkiri yeye, Naye atanyosha mapito yako’ (Mithali 3;5 – 6). Omba kile unachotaka, lakini uwe tayari kuchukua kile ambacho Mungu anakupa. Hiki kinaweza kuwa bora zaidi kuliko kile ulichoomba.

5. **Jizoeze mtindo wa kuweka kila kitu mikononi mwa Mungu.** Niliwahi kumsikia muhubiri mmoja wa kimataifa akisema yeye huwa hapangi ratiba yoyote kuhusu huduma yake badala yake kila siku anapoamka anamwambia Mungu leo nipo tayari kufanya kile utakachonielegeza nifanye, kisha baada ya maombi hayo ataendelea kuwepo tu akisubiri sauti ya maelekezo. Tafsiri yake ni kwamba hafanyi jambo lolote kwa akili yake na jinsi anavyojiskia badala yake Mungu ndiye anayeamua kwa ajili yake. Wakati nasikiliza huu ushuhuda nikakumbuka ZABURI 31: 15 *‘nyakati zangu zimo mikononi mwako; uniponye na adui zangu, nao wanaonifuatia.* Kumbe hatima za maisha yetu haziamuliwi kwa uzoefu tulio nao, tujifunze kwamba safari ya maisha yetu inamuhitaji kiongozi mmoja tu ambaye ni YESU. Hivyo tumkabidhi yeye mambo yetu yote kwa kuwa yeye hujishughulisha sana na mambo yetu. 1PETRO 5:7 *‘mtwikeni yeye fadhaa zenu zote, kwa maana yeye hujishughulisha sana na mambo yenu.*

6. **Usijiombe kila siku tenga muda maalumu kwa ajili ya shukrani.** ZABURI 136: 1 – 25 *‘Mshukuruni BWANA kwa kuwa ni mwema; Kwa maana fadhili zake ni za milele. Mshukuruni Mungu wa miungu; Kwa maana fadhili zake ni za milele. Mshukuruni Bwana wa mabwana; Kwa maana fadhili zake ni za milele. Yeye peke yake afanya maajabu makuu; Kwa maana fadhili zake ni za milele. Yeye aliyefanya mbingu kwa fahamu zake; Kwa maana fadhili zake ni za milele. Yeye aliyeitandaza nchi juu ya maji; Kwa maana fadhili zake ni za milele. Yeye aliyefanya mianga mikubwa; Kwa maana fadhili zake ni za milele. Jua litawale mchana; Kwa maana fadhili zake ni za milele. Mwezi na nyota zitawale usiku; Kwa maana fadhili zake ni za milele. Yeye aliyewapiga Wamisri kwa kuwaua wazaliwa wa kwanza wao; Kwa maana fadhili zake ni za milele. Akawatoa Waisraeli katikati yao; Kwa maana fadhili zake ni za milele. Mtunzi wa zaburi anaeleza sababu za kumshukuru Mungu, ni dhahiri kwamba shukrani kwa MUNGU ni jambo muhimu sana kwani inaonesha ukomavu wa kutambua kwamba Mungu amefanya mambo mengi kwenye maisha yako.*

Shukuru kwa ajili ya uumbaji wa dunia unayoishi, shukuru kuhusu watu wanaokuzungunguka, shukuru kuhusu afya yako, shukuru kuhusu kazi yako, shukuru kuhusu watoto wako, mume wako, mke wako.... utaungana na mimi kuamini kwamba maombi ya kushukuru ni mapana kuliko kuombea mahitaji kwasababu katika majaribu mengi unayopitia bado utagundua kwamba ziko rehema za Mungu zinazokufuata bado.

Amini kwamba hata sasa BWANA amekupendelea sana, hebu chukua sekunde kadhaa funga macho yako mahali ulipo nyamaza kimya kwa sekunde kadhaa, jiulize je unapaswa kumshukuru Mungu au kumlaumu? kumbuka mahali BWANA alipokutoa, mitihani aliyokuvusha kisha jiambie MOYONI kwamba hata hili litapita kama yale yalivyopita...

Usilalamike sana bali kumbuka kushuru.

2. BWANA, NIWEKE HURU NA HISIA HASI.

*Kuna wakati niliwahi kudhani kuwa kuishi na wasiwasi, huzuni, hofu, na kukata tamaa ni jambo la kawaida na ilikuwa ni sehemu ya maisha. Nilifikiri hivyo na nikaamini hivyo. Lakini nilipomjua YESU kama BWANA NA MWOKOZI WA MAISHA YANGU na kuanza kuishi kwa njia za Mungu, nilianza kuona kwamba mambo yote yanawezekana kwa yeyote anayemwamini na kumtii Mungu. Inawezekana hata kuishi **bila hisia hasi**. Mungu anaweza kuziondoa kwetu ikiwa tutamwomba na kumwamini.*

Je, umewahi kuhisi kana kwamba Mungu amekuacha? kama umewahi kuhisi hivyo, hauko peke yako. Si tu kwamba mamilioni ya watu wanahisi hivyo! bali hata Yesu alihisi hivyo wakati mmoja alipokuwa msalabani kama vile wewe unavyohisi Mungu amekuacha katika dhiki yako. Yesu alisema, "*Mungu wangu, Mungu wangu, mbona umeniacha?*" (Mathayo 27:46). Sote tunapitia nyakati ngumu—nyakati tunapojihisi peke yetu na tulitelekezwa. Lakini ukweli ni kwamba hatuko peke yetu. Mungu yupo pamoja nasi kutusaidia tunapomwita. Katika nyakati hizi, hatupaswi kutawaliwa na hisia zetu hasi. Tunaweza kuzishinda **kwa kuomba** na kujua ukweli wa kile ambacho Neno la Mungu linasema kuhusu hali zetu.

Njia Saba Nzuri za Kuachana na Hisia Hasi

1. Kataa kuwa na wasiwasi.

Haijalishi ni matatizo gani tunayo katika maisha yetu, Yesu ameyashinda yote. "*ulimwenguni mnayo dhiki; lakini jipeni moyo, mimi nimeushinda ulimwengu*" (Yohana 16:33).

Tunaweza kupata uhuru na kuondoa wasiwasi kwa kutumia muda pamoja Naye. *"Katika wingi wa mawazo ya moyoni meangu, faraja zako zaifurahisha roho yangu"* (Zaburi 94:19).

Unapokuwa na wasiwasi, inamaanisha kuwa humwamini Mungu kabisa. Lakini Yeye ataonyesha uaminifu Wake ikiwa utakimbilia Kwake. *"Ninyi msitafute mtakavyokula wala mtakavyokunywa, wala msifanye wasiwasi. Kwa maana hayo yote ndiyo watafutayo mataifa ya duniani, Lakini Baba yenu anajua ya kuwa mna haja na hayo. Bali utafuteni Ufalme wa Mungu, na hayo mtaongezewa"* (Luka 12:29-31). Mungu anasema hatupaswi kuwa na wasiwasi kuhusu chochote; tunachohitaji ni kuomba juu ya kila kitu.

2.Kataa Kutawaliwa na Hasira.

Tunapokubali hasira mara kwa mara, tunafunga njia za baraka zote ambazo Mungu ametuwekea Tunapoipa hasira nafsi ndani ya roho zetu, tunafungua mlango wa dhambi na kumruhusu ibilisi atuendeshe kinyume na mapenzi ya Mungu. Hasira inaathiri uwezo wa kufanya maamuzi ya haki na upendo kwa wengine, hasira inaleta uchungu wa kujichukia au kuwachukia wengine, hasira inazuia sauti ya Mungu kutuongoza. *" Mwe na hasira, ila msitende dhambi; jua lisichwe na uchungu wenu bado haujawatoka (Waefeso 4:26-27).* Mtu mwenye hasira huwaudhi watu wote walio karibu naye, na mara nyingi hufanya makosa makubwa. *"Mtu mwenye hasira huchochea ugomvi, na mtu mwenye ghadhabu hufanya dhambi nyingi"* (Mithali 29:22). Ni mara ngapi wanaume wenye hasira wamewadhulumu wake zao, hata kuwaua, na kuharibu maisha yao milele? Ni mara ngapi wanawake wenye hasira wameharibu mahusiano na familia zao, na kuacha hatima ambayo Mungu alikuwa amewaandalia?

"Usifanye haraka kukasirika rohoni mwako, Maana hasira hukaa kifuni mwa wapumbavu." (Mhubiri 7:9). Muombe Mungu akuondolee hasira ili uendelee kubaki kwenye mtiririko wa baraka zote ambazo Mungu amekupangia.

3. Kataa Kutoridhika.

Ni rahisi kuelekeza mawazo kwenye mambo hasi na kutafuta kila kitu kisichoenda sawa maishani mwako. Lakini tunapokuwa na hali ya kutoridhika kila mara na kukosa amani, si kwamba tu tunajitesa bali pia tunawafanya watu waliotuzunguka kuteseka. Hakuna ubaya kutaka mambo yawe tofauti pale inapohitajika, lakini ikiwa mtazamo huo unakuwa ndio mtindo wa maisha, tunatoa dhabihu ya amani yetu. Kila unapojihisi umekatishwa tamaa na hali zako, kumbuka maneno ya mtume Paulo:

"Najua kudhiliwa, tena najua kufanikiwa; katika hali yo yote, na katika mambo yo yote, nimefundishwa kushiba na kuona njaa, kuwa na vingi na kupungukiwa. Nayaweza mambo yote katika yeye anitiaye nguvu." (Wafilipi 4:11-13).

Mungu ameweka ahadi kwamba uso wake utakwenda pamoja nawe na kukupa raha. *"Basi, imesalia raha ya sabato kwa watu wa Mungu"* (Waebrania 4) Inawezekana kupata kuridhika, kupata pumziko, amani, na furaha katika hali yoyote. Mwambie Mungu kwamba unafanya hilo kuwa lengo lako na unamhitaji akusaidie.

4. Kataa kuwa na wivu.

Unapoyaangalia maisha ya mtu mwingine na kile alichonacho badala ya kumtazama Bwana na kile alichonacho, roho ya kutamani inakaribia kufanya maisha yako kuwa ya shida. *"maana hapo palipo wivu na ugomvi, ndipo palipo machafuko na kila tendo baya."*

Lakini hekima itokayo juu ni safi kwanza, tena ya amani, ya upole, tayari kusikiliza maneno ya watu, imejaa rehema na matunda mema, haina fitina haina unafiki" (Yakobo 3:16-17). Usiruhusu mawazo kama haya, "Laiti ningekuwa na nywele kama za yule, sura kama ya yule, mwili wake, mavazi yake, kipaji kama chake, karama kama zake, mume kama wake, watoto kama wale, utajiri kama ule..." Badala yake, elekeza mawazo yako kwa Yesu. Fikiria kuhusu uzuri wake, utajiri wake, vipaji vyake, asili yake, riziki yake, msaada wake, na nguvu zake. Mshukuru kwa urithi mwingi ulionao ndani Yake. Neno la Mungu linasema *Moyo ulio mzima ni uhai wa mwili; Bali husuda ni ubovu wa mifupa* (Mithali 14:30). Omba upendo wa Mungu ukae ndani yako na kupitia kwako kila wakati uwe na furaha na amani na watu wote.

5. Kataa kuwa na huzuni.

Kati ya hisia zote hasi, naamini huzuni ndiyo ambayo tunakubali kwa urahisi zaidi kama sehemu ya maisha yetu. Wengi wetu tunaishi na huzuni na kuikubali bila hata kutambua. Tunaona kuwa huzuni ni ya kawaida kwetu kwa sababu ni hali tunayoifahamu sana. *Lakini Mungu Hataki Tukubali Hisia Ya Huzuni Kana Kwamba Ni Mtindo Wa Maisha.*

Watu wengi katika Biblia walielewa jinsi huzuni ilivyo mbaya *"Nimechoka kwa kuugua kwangu; kila usiku nakielekeza kitanda changu; Nalilowesha godoro langu kwa machozi yangu. Jicho langu limeharibika kwa huzuni; limezeeka kwa sababu ya adui zangu wote"* (Zaburi 6:6-7). *"Kashfa imenivunja moyo, nami nimejaa huzuni; nilitazamia mtu wa kunionea huruma, lakini sikupata hata mmoja; na kwa wafariji, lakini sikupata hata mmoja"* (Zaburi 69:20). *"Nafsi yangu inayeyuka kwa huzuni; unitie nguvu kulingana na neno lako"* (Zaburi 119:28).

Maneno yote haya ya mtunzi yanaonesha kuchoshwa na hali ya moyo ulioinama. Habari njema ni kwamba Mungu hataki tuishi na hisia hizi. Anataka furaha ya Bwana izuke ndani yetu na kufukuza roho za huzuni. *"Ondokeni kwangu, enyi watenda maovu wote; kwa maana Bwana amesikia sauti ya kilio changu. Bwana amesikia dua yangu; Bwana atapokea sala yangu"* (Zaburi 6:8-9). **Mungu anataka tumlilie Yeye ili aweze kutuina kutoka katika huzuni.**

6. Kataa kuwa na uchungu. Uchungu huunguza mwili na roho yako kama vile tindikali inavyoyeyusha ngozi. Wakati mzizi wa uchungu unapokita katika maisha yako, unakumeza na kukutoa katika baraka za Mungu. *"Kwa maana nakuona u katika uchungu kama nyongo na tena u katika kifungo cha uovu"* (**Matendo 8:23**). Tunapokuwa na mawazo kama, *"lini nitafanikiwa, kwanini wengine wanafanya vizuri kuliko mimi, mbona mimi sipendwi? Hata lini adui yangu atatukuzwa juu yangu?"* (Zaburi 13:2), uchungu huanza kukua ndani yetu kama saratani. Lakini tunaweza kutambua mawazo hayo na kukataa kuyapa nafasi.

7. Kataa kukosa tumaini. Kukosa tumaini ni hali ya kufa polepole ambayo huanza kwa kuathiri afya ya mwili na roho yako. Lakini unapochagua kwa akili yako na kwa moyo wako kuweka tumaini lako kwa Bwana, Yeye atakutana na mahitaji yako yote na kuondoa hali ya kukosa tumaini.

Kama vile tunavyoweza kuchagua nini tule, wapi twende, nini tufanye kila siku, tunaweza pia kuchagua kuweka tumaini letu kwa Mungu.

Tunaweza kuulinda moyo wetu kwa kutafuta kuwa na Amani kupitia kumkiri YESU kuwa ni Bwana na Mwokozi pekee wa maisha yetu ‘*Kwa sababu, ukimkiri Yesu kwa kinywa chako ya kuwa ni Bwana, na kuamini moyoni mwako ya kuwa Mungu alimfufua katika wafu, utaokoka. Kwa maana kwa moyo mtu huamini hata kupata haki, na kwa kinywa hukiri hata kupata wokovu. Kwa maana andiko lanena, Kila amwaminiye hatatahayarika. Kwa maana hakuna tofauti ya Myahudi na Myunani; maana yeye yule ni Bwana wa wote, mwenye utajiri kwa wote wamwitao*’ (WARUMI 10: 9 – 11)

Kukosa tumaini ni kifo kwa roho zetu. Kataa kuishi bila tumaini. Haijalishi mambo yanaonekana kuwa mabaya kiasi gani maishani mwako, daima una tumaini kwa Bwana. Mwombe Mungu akupatie tumaini kwa ajili ya maisha yako ya baadaye na mtazamo wa shukrani kila siku ya maisha yako. Mungu akusaidie na kukubariki, ikiwa umeamua kuepukana na hisia hasi juu ya maisha yako. BWANA YESU ni mwaminifu Sana YEYE atakupa Amani na Raha moyoni mwako. Kwa jina la YESU pokea AMANI YAKO.

AMINA.

3. NEEMA YA BWANA YESU KRISTO, PENDO LA MUNGU, NA USHIRIKA WA ROHO MTAKATIFU.

Kuna siku moja katika maisha yangu ambayo siwezi kuisahau. Siku hiyo nilikuwa nimelemewa na mawazo mengi kutokana na mgogoro wa kifamilia uliokuwa ukinisumbua sana. Nilihisi nimechoka, sina amani, na mawazo yangu yalikuwa yakizunguka bila suluhisho.

*Katika hali hiyo ya kuchanganyikiwa, nilihudhuria ibada siku ya jumapii ambapo Askofu Dr. Lameck Ngezi alikuwa akifundisha somo: **Neema ya Bwana Yesu Kristo, Pendo la Mungu, na Ushirika wa Roho Mtakatifu.** Wakati naanza kumsikiliza, nilihisi kama ujumbe ule ulikuwa unaniendea moja kwa moja.*

*Kadri nilivyoendelea kufuatilia, nilianza kuelewa jambo la msingi—**kile nilichohitaji maishani mwangu si juhudi zangu pekee yangu, bali neema ya Mungu, upendo wa Yesu Kristo, na ushirika wa Roho Mtakatifu.** Nilipogundua hili, moyo wangu ulianza kupata faraja, nilihisi uzito wa mawazo yangu unapungua, na nilipata nguvu mpya ya kuendelea mbele.*

*Sikuishia tu kusikiliza somo hilo, bali nilihamasika kurudia kusoma mistari ile tena na tena. Kila niliposoma, nilihisi neno la Mungu likinijenga upya, likinipa uvumilivu, na kunipa hakikisho kwamba si mimi pekee ninayepambana—Mungu yuko nami! Leo hii, ninapoyakumbuka maneno haya: "**Neema ya Bwana Yesu Kristo, na pendo la Mungu, na ushirika wa Roho Mtakatifu ukae nanyi nyote.**" (2 Wakorintho 13:14),*

ninatambua kuwa maisha yetu yanahitaji zaidi ya jitihada binafsi; yanahitaji neema, upendo, na ushirika wa Mungu. Haya ndiyo yamenipa nguvu ya kusimama tena.

2 WAKORINTHO 13:14

“Neema ya Bwana Yesu Kristo, na pendo la Mungu, na ushirika wa Roho Mtakatifu ukae nanyi nyote”.

Haya ni maombi ya Mtume Paulo kwa kanisa la Korintho. Mtume Paulo alitambua kwamba maisha yetu hapa duniani yanahitaji tuwe na mambo matatu muhimu kama nguzo ya maisha yetu

❖ Neema ya Yesu, Pendo la Mungu na Ushirika wa Roho Mtakatifu.

Neema ni upendeleo, ni wema wa Mungu usiostahiliwa ambao mwanadamu hupokea bure kwa upendo na huruma ya Mungu. Tunapata neema ya Mungu kupitia Bwana wetu Yesu Kristo, neema hii ni udhihirisho wa rehema ya Mungu kwa wanadamu, ambalo halitegemei juhudi za mtu binafsi bali ni zawadi tu kutoka kwa Mungu. Neema ni kama mwamvuli wakati wa mvua au shuka wakati wa baridi. Ukikosa neema ya Mungu utajiona kama upo peke yako hasa wakati wa aibu., wakati wa msiba, wakati wa kuugua, wakati wa madeni mazito, wakati wa kudharaulika, wakati wa kukata tamaa. Lakini kama unampenda Yesu na kumtumaini yeye neema yake itakufunika tu. Mtume Paulo alilijua kanisa la korintho vizuri kwani lilikuwa ni kanisa lenye changamloto kubwa. Watu wa korintho walikuwa na migawanyiko walikosa umoja, walikuwa na maadili mabovu, walikuwa watu wa kushtikiana mahakamani, hawakuelewa uhuru wa kikristo,

walikuwa na matumizi mabaya ya karama za rohoni lakini pia hawakuelewa mafundisho kuhusu ufufuo wa baadae au uzima wa milele ndani ya kristo.

Changamoto na matatizo ya wakoritho ndio yale yale tuliyonayo katika maisha yetu ya kila siku, migogoro kwenye ndoa, matatizo ya malezi, washirika wa kanisa moja kuvunjana moyo, migogoro kazini, changamoto za uchumi katika hayo yote tunachohitaji ni neema ya MUNGU tu. Katika nyakati za mabaya tunatakiwa kuomba neema ya Mungu ilete ujasiri, ilete hekima, ilete kibali na nguvu za kuendelea Mbele. Neema ya Mungu haiagalii tabia zenu wala juhudi zetu bali ni upendeleo tu. Ni maombi yangu kwamba Mungu akupe neema katika changamoto zote unazopitia.

Maombi ya neema za Mungu yawe ni maombi yako kila siku, muombee neema mke wako au mume wako, waombee neema watoto, iombee neema kazi yako na mipango yako. Maisha yetu sio matakatifu kwani kama Mungu angehesabu maovu yetu hata sekunde moja hakuna ambaye angestahili kuishi, ndio maana mtume Paulo aliona umuhimu wa kuwaombea neema wakorintho ili Mungu asiwahukumu kwa matendo yao bali awape neema.

Pendo la Mungu, upendo wa Mungu haufanani na upendo wa mwanadamu. Mara nyingi sana Yesu alimfunua Mungu kwa wanafunzi wake kama Baba. Injili ya Yohana inatukumbusha kwamba upendo wa Mungu ulivuka viwango hata akamtoa mwanae wa pekee ili ulimwengu upate kumwamini na kuokolewa na dhambi (**Yohana 3:16**).

Kitendo cha kumwamini Yesu kama Bwana na mwokozi wa maisha yetu tayari tunakuwa tumeingia katika pendo la Mungu. Hata hivyo Mungu aliamua kutupenda pasipo masharti wala vigezo mfano; Mungu huwanyeshea mvua wema na wabaya, Mungu amegawawa siku na masaa sawa sawa kwa watu wa aina zote. Baba yangu wa Kiroho Askofu Dr. Lameck Ngenzi mara nyingi husema Mungu hana upendeleo anawapa mvua wema na wabaya, anawapa neema watu wote ili wema wazidi kuwa wema na wabaya wapate kutubu na kuacha mabaya. Mtume Paulo alipowaombea pendo la Mungu kanisa la korintho ni kwa sababu alijua kwamba Mungu humpenda mtu pasipo vigezo. Hivyo kwa namna jinsi walivyo na mienendo yao walistahili upendo tu.

****Kwanini tunahitaji Zaidi upendo wa Mungu? ****

Upendo huvumilia, hufadhili; upendo hauhusudu; upendo hautakabari; haujivuni; haukosi kuwa na adabu; hautafuti mambo yake; hauoni uchungu; hauhesabu mabaya; haufurahii udhalimu, bali hufurahi pamoja na kweli; huvumilia yote; huamini yote; hutumaini yote; hustahimili yote (1KORINTHO 13 1-8).

Tunahitaji upendo wa Mungu kwani ni Mungu pekee mwenye uwezo wa kutuchukulia jinsi tulivyo. Wakati Fulani kwenye maisha yangu niliishi na uchungu na hasira dhidi ya watu waliosababisha maisha yangu kuwa magumu nilipoamua kumshirikisha Baba yangu alinipa ushauri wa ajabu sana, aliniamnbia “chagua kusamehe na kuachilia, mwombe Mungu akupe Amani juu hao watu ukifanya hivyo itakuwa ni rahisi kwako kuendelea na maisha Mengine”.

Ushauri huu ulikuwa ni mgumu sana kwangui kwani niliona kwamba fedha nilizodhurumiwa ni muhimu sana kwangu kuliko kitu chochote na hivyo sikuupokea ushauri kwa wakati huo lakini siku chache mbele nilianza kujiuliza maswali... ni kweli nimedhurumiwa lakini nitawafanya nini walionidhulumu? hata nisipowasamehe nitawafanya nini? je, ni mangapi namimi Mungu amenisamehe? Nilikuwa mtu wa kulia na kulalamika mpaka pale nilipoamua kusamehe, kuachilia na kutokuzungumzia tena. Hivyo ndivyo Mungu alivojifunua kwangu kwamba ananipenda hasa pale ninapoonisha upendo, huruma na msamaha kwa watu wengine. Tangu hapo, Mungu wangu hakuwahi kuniacha wala kunipungukia mimi na familia yangu, Mungu amekuwa akinipandisha madaraja mwaka hadi mwaka. Ndugu Yangu katika Kristo ninakuombea upendo wa Mungu ukuzunguke Mungu akikupenda hautajuta kumwamini.

Watu wote wanaweza kukuacha lakini upendo wa Mungu hautakuacha, utajiri mkubwa katika maisha yako ni kulifahamu pendo la Mungu, usilaumu, usilalamike unapopitia changamoto tambua kwamba katika yote lipo pendo la Mungu.

Mtume Paulo aliona ni vyema sana kuwaombea wakorintho pendo la Mungu na mimi ninakuombea pendo la Mungu likuzunguke nyumbani kwako, kazini kwako, kwenye biashara yako, kwenye huduma yako, pendo la Mungu likupandishe cheo kazini, ndugu zako wakukumbuke, ndani ya Moyo ububujike kwa nyimbo za sifa za kumsifu Mungu. Sitakufa bali nitaishi, Nami nitayasimulia matendo ya BWANA (zaburi 118: 17). Amani ya Yesu Kristo na Nuru yake ikuangazie wakati wote. Amina.

Ushirika na Roho Mtakatifu ‘*Lakini mimi nawaambia iliyo kweli; yawafaa mimi niondoke, kwa maana mimi nisipoondoka, huyo msaidizi hatakuja kwenu; bali mimi nikienda zangu, nitampeleka kwenu. Naye akiisha kuja, huyo atauhikikisha ulimwengu kwa habari ya dhambi, na haki, na hukumu* (YOHANA 16:7-8). *Itakuwa siku za mwisho, asema Mungu, nitawamwagia watu wote Roho yangu, na wana wenu na binti zenu watatabiri; na vijana wenu wataona maono; na wazee wenu wataota ndoto. Naam, na siku zile nitawamwagia watumishi wangu wanaume na wanawake Roho yangu, nao watatabiri* (Mdo 2:17-18). Roho mtakatifu ni ahadi ya Bwana Yesu kwa kila mkristo. Mtume Paulo alitaka wakorinto wawe na ushirika na roho mtakatifu kwasababu yeye ndiye kiongozi na mshauri wa kweli ambaye kama tukijifunza kusikia sauti yake tutaweza kufanya kila kitu kwa uzuri pasipo kumkasirisha Mungu. Roho mtakatifu ni rafiki yetu, anakaa ndani yetu ili atusaidie katika hali zetu. Wakati wa hasira Roho mtakatifu atakupa hekima, wakati wa wasi wasi atakuambia nini cha kufanya, mara zote Roho mtakatifu huwa siyo mtulivulivu hupenda kutoa maelekezo na ushuri, sauti yake ni ya ndani sana...Je, umeshawahi kuisikia sauti ya Roho Mtakatifu? Nini kilitokea ulipopuza sauti ya Roho mtakatifu?

**** Jinsi Ya Kumsikiliza Roho Mtakatifu ****

Kumsikiliza Roho Mtakatifu ni sehemu muhimu ya maisha ya kiroho kwa Wakristo. Hapa kuna hatua na mwongozo wa kumsikiliza Roho Mtakatifu:

1. Kuwa na uhusiano wa karibu na Mungu, Kumsikiliza Roho Mtakatifu huanza kwa kujenga mahusiano ya karibu na Mungu kupitia sala, neno la Mungu, na ibada.

Soma Biblia mara kwa mara ili kujua mapenzi ya Mungu. *‘palikuwa na mtu kaisaria, jina Kornelio, akida wa kikosi kilichoitwa kiitalia, mtu mtauwa, mchaji wa Mungu, yeye na nyumba yake yote, naye alikuwa akiwapa watu sadaka nyingi, na kumwomba Mungu daima, Akaona katika maono waziwazi, kama saa tisa ya mchana, malaika wa Mungu, akimjia na kumwambia Kornelio! Akamtazama sana, akaogopa akasema, kuna nini, Bwana? Akamwambia sala zako na sadaka zako zimefika juu na kuwa ukumbusho mbele za Mungu. (Mdo 10:1-4).* Maisha ya Kornelio ni mfano mzuri wa mtu mwenye kutafuta kuwa na mahusiano mazuri na Mungu kwani hakujali cheo chake wala kazi yake badala yake siku zote aliiongoza familia yake yote kuwa na uhusiano mzuri na Mungu.

2. Tengeneza muda wa kimya na utulivu ili uweze kumsikiliza Roho Mtakatifu bila kelele za nje. Tafakari Neno la Mungu na uombe Mungu azungumze na moyo wako. Jitahidi usiwe mtu wa maneno mengi ya mizaha, jenga mazoea ya kukaa kimya hata ukiwa katikati ya kundi la wanaopiga kelele. *ZABURI 4:4 ‘Mwe na hofu wala msitende dhambi, Tafakarini vitandani mwenu na kutulia.*
3. Tambua Sauti ya Roho Mtakatifu, Roho Mtakatifu mara nyingi huzungumza kupitia Neno la Mungu (Biblia), Hali ya amani moyoni, Matukio au watu wengine, sauti ya ndani au mawazo yanayolingana na mapenzi ya Mungu.

Kondoo wangu waisikia sauti yangu; nami nawajua, nao wanifuata. Nami nawapa uzima wa milele; wala hawatapotea kamwe; wala hakuna mtu atakayewapokonya katika mkono wangu. Baba yangu aliyenipa hao ni mkuu kuliko wote; wala hakuna mtu awezaye kuwapokonya katika mkono wa Baba yangu. Mimi na Baba tu umoja (YOHANA 10:27-30). Utakapoisikia sauti ya Roho mtakatifu utakuwa na uhakika ya kuwa ni Mungu amesema na wewe na matunda ya utii wake yatakuwa ni mema.

4. Omba Maombi ya Uongozi wa Mungu, Omba kwa Mungu akupe hekima na uwezo wa kuelewa na kutambua sauti ya Roho Mtakatifu mfano wa maombi “Mungu, niongoze kwa Roho Wako Mtakatifu ili nifanye mapenzi yako. Nisaidie nitambue sauti yako na kuwa mtii.” Wakati Mungu anamuagiza Musa kurudi Misri kuwakomboa wana wa Isareli Musa aliomba muongozo wa Mungu jinsi ya kumtambulisha Mungu kwa wana wa Isareli KUTOKA 3: 13 – 14 ‘*Musa akamwambia Mungu, Tazama, nitakapofika kwa wana wa Israeli, na kuwaambia, Mungu wa baba zenu amenituma kwenu; nao wakaniuliza, Jina lake n’nani? Niwaambie nini? Mungu akamwambia Musa, MIMI NIKO AMBAYE NIKO; akasema, Ndivyo utakavyowaambia wana wa Israeli; MIMI NIKO amenituma kwenu. Omba mwongozo Mungu akufundishe kuijua sauti yake kupitia Roho mtakatifu, zipo sauti nyingi lakini sauti ya Roho Mtakatifu ni ya pekee.*

5. Kujifunza Kutofautisha Sauti, Sauti ya Roho Mtakatifu haipingani kamwe na mafundisho ya Biblia. Unapoona mashaka juu ya sauti uliyoisikia rejea katika neno la Mungu na maombi mpaka pale utakapopata kuthibitisha.
- Kama mkristo, Kujazwa na Roho Mtakatifu ni tukio muhimu kwa maisha yote hapa duniani, zipo faida nyingi kiroho, kimwili, na kihisia unapokuwa na ushirika na Roho mtakatifu. Kujazwa na Roho Mtakatifu humsaidia Mkristo kuwa na uhusiano wa kina na wa karibu zaidi na Mungu. Roho Mtakatifu hutusaidia kumwelewa Mungu na mapenzi yake zaidi. *"Kwa maana wote wanaoongozwa na Roho wa Mungu, hao ndio wana wa Mungu"* (Warumi 8:14). Kujazwa na Roho Mtakatifu huleta matunda ya kiroho katika maisha ya Mkristo, kama vile Upendo, Furaha, Amani, Uvumilivu, Fadhili, Wema, Uaminifu, Upole, kujizuia *"Lakini tunda la Roho ni upendo, furaha, amani..."* (Wagalatia 5:22-23).
 - Roho Mtakatifu hutoa mwongozo katika maamuzi ya kila siku, hekima ya kiroho, na kutusaidia kutambua haki na batili. *"Lakini huyo msaidizi, yaani Roho Mtakatifu, atakayemtuma Baba kwa jina langu, atawafundisha mambo yote"* (Yohana 14:26).
 - Wale waliojazwa na Roho Mtakatifu hupokea ujasiri wa kuhubiri Injili na kumtangaza Kristo kwa wengine. *"Nao wote walijazwa Roho Mtakatifu, wakanena neno la Mungu kwa ujasiri"* (Matendo 4:31).
 - Roho Mtakatifu hutusaidia kushinda majaribu na kutuwezesha kuishi maisha matakatifu. *"Endeni kwa Roho, wala hamtazitimiza kamwe tamaa za mwili"* (Wagalatia 5:16).

- Roho Mtakatifu ni mfariji ambaye hutuliza mioyo yetu katika nyakati za huzuni, majaribu, au changamoto. "*Nami nitamwomba Baba, naye atawapa Msaidizi mwingine, ili akae nanyi milele*" (Yohana 14:16).
- Kujazwa Roho Mtakatifu humpa Mkristo nguvu za kushinda dhambi, vishawishi, na changamoto za kiroho (Matendo 1:8).
- Mkristo anayeongozwa na Roho huwa na uwezo wa kutatua changamoto kwa hekima ya kiroho.

Roho mtakatifu amenisaidia sana katika safari yangu ya maisha, amenisaidia kuhubiri kwa ufasaha, amenisaidia kuomba, ananisaidia katika kazi na biashara, ananisaidia katika usimamizi wa familia. Mtume Paulo alimwelewa sana Yesu alifahamu kwamba Kristo ndiye neema ya pekee Kupitia kumwamini Kristo tunapokea zawadi ya USHIRIKA NA ROHO MTAKATIFU.

SURA YA TATU

1. KUTOKUWA NA MPANGO B.

(Only plan A must work!)

Moja ya siri kubwa za kuwa na ushirika wa karibu na Mungu ni kumjia Yeye kama chanzo pekee cha msaada na tumaini lako. *“Bwana, katika hali hii sina Mpango B—hakuna chaguo jingine la kutegemea ikiwa Hutanisaidia. Wewe pekee ndiwe unayeweza kunisaidia!”* Mungu anapenda tunapomtazama Yeye peke yake kwa ajili ya wokovu wetu. Kinyume chake pia ni kweli: wivu Wake huwaka tunapowapa wengine nafasi ya Mungu katika mioyo yetu. *Musa akamwambia Bwana, angalia wewe waniambia, Wachukue watu hawa; nawe hukunijulisha ni nani utakaye mtuma pamoja nami. Walakini umesema jina lako, nawe umepata neema mbele zangu. Basi, sasa nakuomba, ikiwa nimepata neema mbele zako, unionyeshe njia zako, nipate kukujua, ili nipate neema mbele zako, ukakumbuke ya kuwa taifa hili ndilo watu wako. Akasema, Uso wangu utakwenda pamoja nawe, nami nitakupa raha. NAYE (MUSA) AKAMWAMBIA USO WAKO USIPOKWENDA PAMOJA NAMI, USITUCHUKUE KUTOKA HAPA* (*Kutoka 33:12-15*).

Mwaka 2021 ni Mwaka ambao Mungu aliutumia kunifundisha sana kumjua yeye na sauti yake, Mungu alinifundisha kuhusu fedha, alinifundisha kuhusu familia, alinifundisha kuhusu kazi, alinifundisha kuhusu kumpenda yeye kwa NAFASI YA KWANZA NDANI YA MOYO WANGU. Ni kipindi ambacho maisha yangu hayakuwa mepesi nilikua nimepoteza kila kitu na kuanza upya maisha yangu tena nikiwa ugenini. Ilikuwa ni kipindi ambacho nilikuwa na nafasi ya kufanya chochote kibaya, ningeweza kurudi dhambini, ningeweza kuiacha Imani, ningeweza hata kuchanganyikiwa kwa mawazo.

Lakini kulikuwa na sauti moja iliyoniongoza, mara zote nilipoingia kwenye maombi ya kumlilia Mungu juu ya ugumu wa maisha yangu nilitumia maneno haya *‘Ee MUNGU nikumbuke mtoto wako, mbona mimi nimeokoka halafu naishi maisha magumu kiasi hiki! Niokoe Mwanao naaibika.* Maneno haya niliyatamka kwa uchungu sana na wakati huo nilikuwa na picha za watu kichwani ambao niliona Mungu anaweza kuwafanya kuwa msaada kwangu hata wakati mwingine nilipokutana na watu wenye furaha ya mafanikio ya maisha yao Roho yangu iliumia sana nikawa namwambia Mungu mbona hawa hawajaokoka lakini umewabariki namna hii je, mimi nina laana au wewe Mungu umeniacha? Katika hali zangu zote sauti ya Mungu ilikuwa ni moja tu **‘Dismas Endelea Mbele’**” ndivyo Mungu alikuwa akinijibu mara zote ninapoomba.

Namna Mungu anavyojibu maombi yetu huwa inastaajabisha sana. Nilianza kufanya mazoezi ya kutafakari kwanini Mungu kila ninapoomba ananijibu endelea mbele? Ndipo Roho mtakatifu alinisaidia kuelewa kupitia kitabu cha KUTOKA 33:12-15 mazungumzo ya Mungu na Musa, Musa anamwambia Mungu *‘Walakini umesema jina lako, nawe umepata neema mbele zangu. Basi, sasa nakuomba, ikiwa nimepata neema mbele zako, unionyeshe njia zako, nipate kukujua, ili nipate neema mbele zako, ukakumbuke ya kuwa taifa hili ndilo watu wako.* Kwa maneno Mengine Musa ni kama anamwambia Mungu kama wewe ndiye uliyeniletea wokovu huu basi mambo yote nitafanya kwa kuwezeshwa na nguvu zako mwenyewe.

Ukiendelea kusoma mistari ya mbele utaona Mungu anafanya agano na Musa *‘‘Uso wangu utakwenda pamoja nawe, nami nitakupa raha’’* maana yake Mungu anamtia Moyo MUSA kwamba ukiendelea kuwa na msimamo wa kunitumaini mimi pekee niliyekuita kwa kazi hii utapata wokovu.

Habari ya kufurahisha ni kwamba Musa naye alimwelewa sana Mungu akamhakikishia kwamba anamtumaini yeye tu kiasi kwamba ikiwa Mungu hatakuwa pamoja naye basi na yeye hatafanya chochote **NAYE AKAMWAMBIA USO WAKO USIPOKWENDA PAMOJA NAMI, USITUCHUKUE KUTOKA HAPA.** *Hivi ndivyo Mungu alinifundisha kwamba magumu ninayopitia ni ya muda tu kama nitavumilia kwa kumtumaini BWANA.*

Mungu anataka tusiwe na mpango B (plan B) katika kumwamini yeye, usiseme Mungu asiponijibu nitafanya hivi au nifanya vile badala wewe endelea tu kukaa ndani yake. Tunaweza kuwa na mapango B katika mambo mengine lakini hata hivyo ni lazima tuwe tumeongozwa na Roho mtakatifu, vinginevyo usiondoke kwenda mahali popote ikiwa Mungu hajasema nenda, usiamue jambo lolote ikiwa hujasikia Amani ya Mungu moyoni mwako. Yapo mashinikizo mengi sana kwenye mazingira yetu kila siku lakini siri ya safari ya maisha yako iwe ni moja tu **MTUMAINI BWANA PEKEE YEYE HANA MBADALA** katika mambo mengi unayotaka akutendee endelea kuomba, endelea kumshukuru, endelea kuvumilia, endelea kumwamini saa yako ikifika utaona majibu ya Mungu tambua kuwa kuna **MAPENZI YA MUNGU na KUNA SAA YA MUNGU.** Ni maombi yangu Bwana Yesu akupe moyo wa kumngoja BWANA pasipo kugeuza nia yako. **AMINA.**

Watu wa tamaduni za Magharibi wameweka matumaini katika vyanzo ambavyo huvikimbilia kwa msaada wakati wa shida au uhitaji. Mifano ni kama ifuatayo:

- Pesa
- Bima ya afya
- Matibabu/dawa za hospitalini
- Pensheni
- Mikopo
- Madawa ya kulevya/pombe
- Burudani/michezo
- Ngono
- Marafiki
- Washauri
- Mahakama
- Wanasiasa

Kuweka tumaini katika vitu hupofusha uwezo wa kiroho wa kuona kwamba yupo Mungu muweza wa yote, tumaini katika vitu linapokomaa hufikia kiwango cha juu cha mtu kuanza kuviabudu vitu au watu badala ya Mungu. Ni rahisi kuanza kuvipa heshima na kuvisifu vitu ndio maana maandiko yanasema “ *Mtu mwema katika hazina njema ya moyo wake hutoa yaliyo mema, na mtu mwovu katika hazina mbovu ya moyo wake hutoa yaliyo maovu; kwa kuwa mtu, kinywa chake hunena yale yaujazyo moyo wake.* (LUKA 6:45)

Kitu cha kipekee hutokea katika roho yako unapovikataa vyanzo hivi vya msaada na kusema, “*Hapana! Mungu, Wewe pekee ndiwe Mkombozi wangu!*” Sio tu kwamba roho yako inakuwa laini na ya upendo kwa Mungu, bali pia mwitikio wa Baba kwa namna anavyogusa moyo wako huwa wa ajabu sana.

Waabudu Mungu ni wale wanaomjia Mungu kwanza wakati wa shida. Wanamtafuta uso Wake na kungoja kwake ili kupokea maelekezo ya hatua za kuchukua. Mara kwa mara, Roho atakuambia, *“Katika hali hii, nataka uningojee mimi peke yangu na usimame kwa imani hadi nitakapoingilia kati kimamlaka katika hali yako.”* Wakati Mungu anakupa neno hili, funga mkanda wako! UKO TAYARI KWA SAFARI YA MAISHA YAKO. UMEINGIA KATIKA ENEO LA MUNGU. HAPA NDIPO TUNAPOPATA MIUJIZA.

Daudi alijua siri hii ya utukufu wa Mungu. *"Ee nafsi yangu, ngoja kwa utulivu kwa Mungu peke yake, maana matumaini yangu yanatoka kwake. Yeye pekee ni mwamba wangu na wokovu wangu; ndiye ngome yangu; sitatikisika. Katika Mungu kuna wokovu wangu na utukufu wangu; mwamba wa nguvu zangu, na kimbilio langu, ni kwa Mungu. Mtumainini Yeye wakati wote, enyi watu; mwaga moyo wako mbele Yake; Mungu ni kimbilio letu. Selah."* (Zaburi 62:58).

Kwa hivyo, wakati dhoruba inakuja, kimbia mahali pa siri, uweke roho yako imara, na useme kwa tumaini lisilotetereka, “Wewe pekee ndiwe matumaini yangu.” Mungu wetu anapenda kujionyesha kuwa mwenye nguvu kwa wale wasiokuwa na miungu mingine mbele Yake.

2. SIRI YA KUWAKA MOTO

Siku moja, timu yetu ya maombi tuliamua kuwa na mtoko wa chakula cha pamoja. Tulikusanyika kwa upendo na furaha, tukifurahia ushirika wa ndugu huku tukizungumza kuhusu huduma yetu na safari yetu ya kiroho. Katika mazungumzo yetu, mmoja wetu akauliza swali ambalo lilitufanya sote kutulia na kutafakari kwa kina:

“Hivi moto tulionao sasa ni sawa na ule wa mwanzo?”

Kulitawala kimya kizito. Kila mmoja wetu alitafakari safari yake ya kiroho. Tuligundua kuwa, kwa namna fulani, ule moto wa awali – moto wa uponyaji, moto wa miujiza, moto wa kunena kwa lugha, moto wa kutiisha mamlaka za kuzimu – ulikuwa umepungua. Hatukujua sababu zake zote, lakini ukweli ulikuwa dhahiri: hatukuwa tunaungua kwa kiwango kile cha kwanza.

Hisia za kurudi kwenye moto wa mwanzo zilitutawala. Ndipo kwa pamoja, kwa moyo mmoja na shauku mpya, tukafanya uamuzi wa kurudi kwa Bwana kwa maombi ya nguvu. Tuliamua kutenga siku maalum, kwenda mahali pa siri, na kumlilia Mungu kwa maombi ya kurudisha moto wa kiroho. Moto wa upako! Moto wa upentekoste!

Je, na wewe unajiona kuwa umepoa? Je, bado unawaka kwa nguvu ile ile uliyokuwa nayo mwanzoni? Kama jibu lako ni hapana, basi huu ndio wakati wa kuamka! **Tunahitaji kuwaka moto tena! Upentekoste ni MOTO!**

UFUNUO 3:15 *Nayajua matendo yako, ya kuwa hu baridi wala hu moto; ingekuwa heri kama ungekuwa baridi au moto;*

Ni ujumbe wa Yesu kwa kanisa la Laodikia, Yesu alililaumu kanisa la Laodikia kwa kuwa na vuguvugu si moto wala si baridi hali ya uvuguvugu tafsiri yake ni kukosa bidi katika kumwamini kristo na kuzitenda kazi zake, Yesu alisema *‘Amin, amin, nawaambieni, Yeye aniaminiye mimi, kazi nizifanyazo mimi, yeye naye atazifanya; naam, na kubwa kuliko hizo atafanya, kwa kuwa mimi naendna kwa Baba (YOHANA 14:12).* Yesu alituachia moto, moto wa kumwamini, moto wa kuzitenda kazi alizofanya yeye. Katika safari ya wokovu ni sahihi kuamini kwamba tumepata neema ya wokovu kwa ajili ya kazi maalumu ya kuhubiri injili, kuutangaza ufamle wa Mungu Duniani, kuomba na kuombea wengine na kuyafanya mapenzi ya BABA yetu aliyeko sirini. Ni mahali pa siri panapowasha moto wetu, panapotufanya kuwaka. Nazungumzia bidii ya moto wa upendo kwa Yesu na kwa mambo yanayohusu ufalme Wake. Yesu alikuja kuleta moto duniani (Luka 12:49) ili kutuwasha kwa tamaa na shauku ya utumishi kwake Mwenyewe. Ili moto huu udumu kwa nguvu zake, lazima uendeleo kuchochewa kwa maombi, mafundisho na utendaji maana imeandikwa *‘iweni watendaji wa neno’*

Umeumbwa kuwa moto usikubali kuzimika. Mtume Paulo katika Warumi 12:6-8 Anashauri kwa habari ya kuchochea karama *‘Basi kwa kuwa tuna karama zilizo mbalimbali, kwa kadri ya neema mliyopewa; ikiwa unabii, tutoe unabii kwa kadri ya Imani; ikiwa huduma, tuwemo katika huduma yetu; mwenye kufundisha, katika kufundisha kwake; mwenye kuonya, katika kuonya kwake; mwenye kukirimu, kwa moyo mweupe; mwenye kusimamia kwa bidi mwenye kurehemu, kwa furaha.* **Nilipo tafakari maneno haya ya mtume Paulo yalitia nguvu katika kuandika hiki kitabu kwani Roho yangu huwa haitulii ninapokuwa sina jukumu la kufanya kwa ajili ya Bwana.**

Hivi ndivyo Roho Mtakatifu alivyonisaidia kukua kwa kufanya bidii, kuchochea karama, kuwa Moto kwa ajili ya Yesu. Una kitu cha kuishi nacho kwa sababu una kitu cha kufa nacho. Unatamani kuwa mshumaa wa utakatifu, ndiyo maana hutatosheka na Ukristo wa kawaida.

Neno la Mungu ni moto (Yeremia 23:29), na uwepo Wake umezingirwa na moto (Ezekieli 1:4, 27; Danieli 7:9). Unapomkaribia Mungu, unajikuta unakaribia tanuru kubwa la moto. Ili kuwashwa moto, lazima umkaribie Mungu. Unapojihisi baridi, mbali, na “nje ya hali” kiroho, ni wakati wa kujificha faraghani, kuweka nafsi yako mbele ya mahali pa moto wa Neno Lake, na kuruhusu nguvu za uso Wake kurejesha ari yako.

Siri ya kubaki ukiwaka moto kwa ajili ya Yesu si kuitikia wito wa kumtumikia na kufanya bidii, si kwa mtu kukuwekea mikono na kukuombea (ingawa ni halali); si kwa kusikiliza mafundisho mazuri au nyimbo mpya za sifa; bali Zaidi ya hayo ni kupitia kujitoa kwa uthabiti, nenda kila mahali ambapo Roho Mtakatifu anakushudia kwenda, fanya kila kazi ya Bwana kwa utukufu wa jina lake ndipo utaona matunda ya kazi ya mikono yako, Bwana ataikumbuka afya yako kwa ajili ya kazi yake, atailinda familia yako, atakuvisha atakulisha, uso wako hautapauka wala mavazi yako hayatachakaa.

Bwana anasema *‘Mtu akinitumikia, na anifuata; name nilipo, ndipo na mtumishi wangu atakapokuwapo. Tena mtu akinitumikia, Baba atamheshimu* (Yohana 12:26). Je, umeanza kusikia shauku moyoni kwa ajili ya Bwana? Hebu funika ukurasa huu wa kitabu kwa sekunde chache kisha ingia mahali pa siri? Mkaribishe Roho Mtakatifu, awashe mwali wa milele wa wivu Wake mkali maishani mwako.

Maandiko yanasema, “Roho akaaye ndani yetu hututamani kwa wivu” (Yakobo 4:5). Ajenda ya wivu huu ni kwamba Kristo aweze kuwashwa moto wa kudumu ndani yangu na ndani yako. Unaweza kuomba haya maombi, “**Roho Mtakatifu, acha wivu Wako na moto wako uteketeze maisha yangu ya mwili wa nyama, teketeza kila shauku ya miungu ya uongo ndani yangu, ondoa kila chembe chembe za uovu, nifikishe kwenye hatima ya utakatifu na shauku ya kutumika mbele za Bwana wangu Yesu Kristo.** Yohana Mbatizaji alikuwa mtu aliyewaka kwa ajili ya Mungu! Mungu alimchukua Yohana kwenye upweke wa jangwani ili kuwasha moto wa mbinguni ndani yake. Alipoachiliwa kuingia kwenye huduma, alikuwa mwali wa moto hai. Yesu alisema watu hawakwenda kwa Yohana kusikia tu, bali kuona. Yesu alimtaja Yohana kama “taa iliyowaka na kung’aa” (Yohana 5:35).

Je, unataka kufanyika taa inayowaka kwa ajili ya Mungu? Jitenganishe na wengine, nenda mahali pa siri na Mungu kwa maombi. Unapochukua hatua sahihi za kukubali kumtumikia Mungu utaona moto wa Mungu ukijaa ndani ya kifua chako endelea kunyenyekea na kujifunza mambo yahasuyo huduma yako. Moto wa Mungu utaondoa kila kitu kiovu maishani mwako, hadi pale kinachobaki ni upendo wako kwa Yesu tu. Huyu ndiye Mungu wetu, “Awafanyao watumishi Wake kuwa mwali wa moto” (**Waebrania 1:7**).

Atafanya hivyo kwako, ikiwa utamruhusu.

3. UMUHIMU WA KUSAMEHE WAKATI WA HASIRA NA UCHUNGU.

Kisa cha Wanandoa

Katika kijiji kidogo cha Milimani, waliishi wanandoa waliokuwa wamefunga ndoa kwa miaka kumi, Anna na Daudi. Ndoa yao ilianza kwa furaha kubwa, lakini miaka ilivyoendelea, matatizo ya kawaida ya ndoa na changamoto za maisha zilianza kuleta mgogoro kati yao. Siku moja, Daudi alikosea vibaya. Alifanya maamuzi yasiyo ya busara na kutumia fedha za familia kwa jambo lisilo na manufaa, na kusababisha familia yao kukosa pesa za kugharamia mahitaji muhimu. Anna aliumia sana, akihisi kusalitiwa na kutopewa heshima kama mke. Hasira, uchungu, na maneno makali yalitawala nyumba yao kwa muda.

Daudi alijua amekosea. Kwa unyenyekevu, alikiri makosa yake na kumuomba Anna msamaha. Alisema, "Najua nimekuumiza, na najuta sana. Tafadhali, nisamehe. Nitabadilika na kuhakikisha haya hayatokei tena." Lakini Anna, akiwa bado amejeruhiwa moyoni, alihisi ugumu kumsamehe mara moja. Akaenda kwa mchungaji wa kijiji, mtu mwenye hekima na uzoefu wa kusuluhisha migogoro. Mchungaji akamsikiliza kwa makini na kisha akamwambia, "Anna, kumbuka jinsi Mungu anavyotusamehe kila tunapokosa. Msamaha sio kwa ajili ya Daudi peke yake, bali ni kwa ajili yako pia. Ukibeba mzigo wa uchungu, utaendelea kuumia. Achilia na upate amani."

Mchungaji alimshauri Anna kuomba kwa ajili ya hekima na moyo wa msamaha. Anna alifanya hivyo, na kwa muda, alianza kuona moyo wake ukibadilika. Akatambua kuwa Daudi alihitaji nafasi ya pili, kama vile yeye mwenyewe amewahi kupewa na Mungu nafasi ya pili mara nyingi. Anna alirudi nyumbani, akamwambia Daudi, "Nimekosea kwa kushikilia uchungu kwa muda mrefu. Nakusamehe, lakini pia tunapaswa kujifunza kutokana na hili. Tujenge upya uaminifu wetu."

Daudi, akiwa na machozi, alimshukuru Anna na akaanza kubadilika kwa vitendo. Alianza kuwajibika zaidi, kupunguza matumizi ya pesa ya kupita kiasi, na kuonyesha upendo wake kwa vitendo kila siku. Mwaka mmoja baadaye, ndoa yao ilikuwa imara zaidi kuliko ilivyowahi kuwa. Walijifunza kuwa msamaha hauhitaji ukamilifu, bali moyo wa upendo, uvumilivu, na kumtegemea Mungu.

Msamaha katika ndoa ni daraja la kuunganisha upya uhusiano uliovonjika. Ni tendo linalohitaji unyenyekevu, toba ya kweli, na upendo wa dhati. Kama Mungu anavyosamehe dhambi zetu bila masharti, ndivyo wanandoa wanavyopaswa kusameheana ili kudumisha amani na furaha. "*Mkiwa na sababu ya kunung'unikiana, sameheaneni; kama vile Bwana alivyowasamehe, nanyi fanyeni vivyo hivyo.*" **(Wakolosai 3:13)**

Kusamehe ni sehemu muhimu ya maisha ya kiroho, kijamii, na kihisia. Kusamehe ni tendo linaloleta amani ndani ya mtu na kujenga mahusiano bora na wengine.

Katika muktadha wa Kikristo, kusamehe ni msingi wa maisha ya kiroho, kwani ni kielelezo cha upendo wa Mungu kwa wanadamu na amri muhimu kutoka kwa Yesu Kristo. Bwana Yesu alisema; Hayo nimewaambieni mpate kuwa na amani ndani yangu. Ulimwenguni mnayo dhiki; lakini jipeni moyo; mimi nimeushinda ulimwengu (YOHANA 16:33). Kama wakristo tunaomgoja Bwana ni lazima tukubaliane na makwazo ya ulimwengu huu kwamba hayana budi kuwepo lakini Bwana wetu Yesu Kristo aliushinda ulimwengu hivyo na sisi lazima tuwe washindi kwa kujifunza kutoa msamaha kwa wengine. ‘Kusamehe kunahusiana moja kwa moja na wokovu wetu na mahusiano yetu na Mungu na wengine.

Mambo muhimu ya kufahamu kuhusu msamaha.

1. Kusamehe ni Amri ya Mungu - Kusamehe si hiari kwa Mkristo, bali ni agizo kutoka kwa Mungu. Yesu alifundisha kuwa tunapaswa kuwasamehe wengine kama Mungu anavyotusamehe dhambi zetu. *''Kwa maana mkiwasamehe watu makosa yao, Baba yenu wa mbinguni atawasamehe ninyi pia.''* (Mathayo 6:14-15) Kusamehe wengine kunaonyesha utiifu kwa Mungu na ni sehemu ya maisha ya upendo ambayo Wakristo wanaitwa kuishi.
2. Kusamehe haimaanishi kusahau au kuhalalisha makosa ya mwingine, bali ni kuachilia hasira, maumivu, na chuki.

Ni tendo la hiari kwa ajili ya utulivu wako mwenyewe. *"Msiilipe mtu ovu kwa ovu; jitahidini kufanya yaliyo mema machoni pa watu wote."* (Warumi 12:17)

3. Kusamehe ni kujikumbusha Kwamba Sisi Sote Tunakosea -Hakuna aliye mkamilifu; kila mmoja hukosea kwa njia moja au nyingine. Tukikumbuka jinsi tunavyotegemea msamaha kutoka kwa wengine na kwa Mungu, tunapata nguvu ya kuwasamehe wengine. *"Msameheane ninyi kwa ninyi kama Bwana alivyowasamehe ninyi."* (Wakolosai 3:13)
4. Kusamehe ni kupata Uhuru wa Nafsi - Kusamehe kunakusaidia kuachilia mzigo wa maumivu na chuki, ambavyo vinaweza kudhuru afya yako ya kihisia na kimwili. Kusamehe ni kujikomboa wewe mwenyewe kutoka kifungoni mwa uchungu. *"Acha hasira, uache ghadhabu; usikasirike, maana hasira huleta maovu."* (Zaburi 37:8)
5. Kusamehe ni kujifunza kuwa na Moyo wa Huruma - Kusamehe ni tendo la huruma. Ni kuamua kuwa na moyo wa upendo, hata kama mwingine hajali au hatambui makosa yake. Mara nyingi, kusamehe kunaweza kuwa kugumu. Hivyo, kumwomba Mungu msaada kupitia Roho Mtakatifu na neno lake ni muhimu. *Kwa maana mkiwasamehe watu makossa yao, na Baba wenu wa mbinguni atawasamehe ninyi.* (Mathayo 6:14).

Nini Ufanye Unaposhindwa Kusamehe?

Kushindwa kusamehe ni hali ya kawaida, hasa unapokumbana na maumivu makubwa au dhuluma. Hata hivyo, ni muhimu kuelewa kuwa msamaha ni mchakato unaohitaji muda, bidii, na mara nyingi msaada wa Kiroho au Kisaikolojia.

Ikiwa unajikuta unashindwa kusamehe, hapa kuna hatua unazoweza kuchukua:

1. Kubaliana na Hisia Zako - Tambua kuwa ni sawa kuhisi hasira, uchungu, au huzuni. Hisia hizo ni sehemu ya maumivu, na kuzikanusha hakuleti uponyaji, watu wengine hujaribu kuukana uhalisia wa maumivu waliyonayo, katika mchakato wa kupona kihisia usijaribu kuficha au kuzikataa hisia zako. Andika hisia zako kwenye shajara au zungumza na mtu unayemwamini ili kuelewa mzizi wa hisia hizo.

2. Tafuta Msaada wa Mungu kwa Maombi - Ukisikia kushindwa kusamehe, mwombe Mungu akupe nguvu za neema na moyo wa huruma. Maombi kama: *“Bwana, ni vigumu kwangu kusamehe. Naomba unipe uwezo wa kuachilia maumivu haya mikononi mwako.”* Soma maandiko yanayohimiza msamaha kama **Waefeso 4:32**, *“Iweni wema kwa kila mmoja, wenye huruma, mkisameheana kama Mungu alivyowasamehe ninyi katika Kristo.”*

3. Tambua Faida za Kusamehe - Tafakari jinsi ambavyo kushikilia chuki kunavyokuathiri, chuki huongeza msongo wa mawazo, huzuni, na hata matatizo ya kiafya. Elewa kuwa kusamehe ni zaidi ya kuwasaidia waliokukosea—ni njia ya kujikomboa mwenyewe kutoka kwenye mzigo wa maumivu.

4. Jifunze Kuitafakari Hali kwa Mtazamo Mpya - Jaribu kuelewa kwanini mtu huyo alikukosea. Wakati mwingine, watu hufanya makosa kwa sababu ya udhaifu wao au hali ambazo hawawezi kujidhibiti. Si lazima ukubali makosa yao, lakini kuwafikiria katika hali ya huruma kunaweza kusaidia kupunguza hasira.

5. Kumbuka Msamaha wa Mungu Kwako - Tafakari juu ya jinsi ambavyo Mungu amekusamehe dhambi zako licha ya uzito wake. **Kolosai 3:13** inasema: *“Vumilieni na msameheane kama yeyote ana sababu ya kumshtaki mwenzake. Msamehe kama vile Bwana alivyowasamehe ninyi.”* Hii inakukumbusha kuwa kusamehe ni tendo la kiroho na utiifu kwa Mungu.

6. Tafuta Ushauri wa Kiroho au Kisaikolojia - Ikiwa maumivu ni makubwa mno, zungumza na mshauri wa kiroho, mchungaji, au mwanasaikolojia. Wanaweza kukusaidia kufungua moyo wako na kuachilia uchungu hatua kwa hatua. Kumbuka kuwa Yesu ni mshauri wa ajabu, unapozungumza na mshauri wa kiroho au kisaikolojia Yesu atawatumia kukupa hekima ya kuvuka kwenye uchungu na hasi

Kumbuka, msamaha wa kweli ni safari, si tukio la mara moja. Mungu anatembea nawe kila hatua. Tafuta amani na usisahau kwamba wewe mwenyewe pia ni mpokeaji wa neema na rehema za Mungu.

Je mtu anaweza kusamehe pasipo kufanya upatanisho na aliyemkosea?

Ndiyo, mtu anaweza kusamehe pasipo kufanya upatanisho, Msamaha ni zawadi unayojipa mwenyewe, kusamehe ni hatua ya kujiponya mwenyewe ili uwe huru na maumivu, huzuni na ghadhabu; upatanisho ni hatua ya ziada inayotegemea mazingira na nia ya pande zote mbili, inawezekana kusamehe pasipo kurudisha nafasi ya awali papo kwa papo kwasababu upatanisho unahitaji muda, maamuzi, makubaliano, kiujumla upatanisho ni mchakatao. *Tujifunze kwa kuzingatia maana ya msamaha na maana ya upatanisho;*

1. Msamaha:

- Msamaha ni mchakato wa ndani wa mtu kuachilia hasira, kinyongo, au chuki dhidi ya mtu aliyemkosea.
- Msamaha hauhitaji ushiriki wa mtu mwingine. Ni uamuzi wa kibinafsi ambao unaweza kufanyika hata kama mtu aliyemkosea hataki au hawezi kutubu.
- Lengo la msamaha mara nyingi ni kumletea amani mtu anayesamehe, badala ya kulipiza kisasi au kulazimisha marekebisha ya uhusiano.

2. Upatanisho:

- Upatanisho ni mchakato wa kurejesha uhusiano kati ya watu wawili au zaidi.
- Ni mchakato ambao unahusisha ushirikiano wa pande zote zinazohusika. Kisa cha Kikristo kinachotoa mfano wa upatanisho ni hadithi ya **Mwana Mpotevu** kutoka Injili ya Luka 15:11-32.

- Hadithi hii inaelezea upatanisho wa kindugu na upendo wa Baba wa Mbinguni kwa watoto wake, na inaweza pia kutumika kama mfano wa upatanisho kati ya watu waliokosana. Mtu aliyekosea lazima atambue makosa yake, ajutie, na awe tayari kuchukua hatua za kurekebisha uhusiano.
- Bila nia ya pamoja, upatanisho hauwezi kutokea.

Msamaha Pasipo Upatanisho:

Mfano wa **msamaha pasipo upatanisho** katika Biblia unaweza kuonekana katika kifo cha **Stefano**, shahidi wa kwanza wa Ukristo, kama ilivyoandikwa katika **Matendo ya Mitume 7:54-60**. Stefano alikuwa akihubiri injili kwa ujasiri, lakini viongozi wa dini wa wakati huo walikasirika na kuamua kumpiga mawe hadi kufa. Stefano, akiwa katika maumivu makali, aliomba kwa Mungu: *"Bwana, usiwahesabie dhambi hii."* (Matendo 7:60). Hakukuwa **na Upatanisho kwasababu** wale waliompiga mawe hawakuonyesha toba wala nia ya kusuluhisha. Hata hivyo, Stefano aliwasamehe moyoni mwake na kumuachia Mungu hukumu ya mwisho.

Ingawa hakukuwa na upatanisho wa moja kwa moja, tukio hili linaonyesha kuwa "msamaha unaweza kufungua mlango wa mabadiliko ya kiroho". Mfano wa hili ni Sauli (baadaye Paulo), ambaye alikuwepo wakati wa tukio hilo na hatimaye akabadilika na kuwa mtume mkubwa wa Yesu Kristo.

Mtu anaweza kusamehe ili kuondoa mzigo wa kihisia bila kufanya upatanisho na aliyemkosea, hasa ikiwa:

- Mtu aliyemkosea hataki kubadilika au hata anakataa kwamba alikosea.
- Mazingira hayawezekani, kwa mfano, mtu aliyekosea hayupo au hafikiki.
- Upatanisho ungeleta madhara zaidi, kama vile kuhatarisha usalama wa mtu anayesamehe.

Kwa mfano, mtu anaweza kumaliza maumivu yake ya ndani na kupata utulivu wa moyo kwa kusamehe, lakini asichague kurudisha uhusiano na mtu huyo kwa sababu hali bado si salama au si ya kuaminika.

Msamaha ni zawadi unayojipa mwenyewe; upatanisho ni hatua ya ziada inayotegemea mazingira na nia ya pande zote mbili. Msamaha pasipo upatanisho ni tendo la neema na unyenyekevu, ambalo halitegemei mwitikio wa upande wa pili. Inahusisha kumwachia Mungu kazi ya kushughulika na moyo wa mkosaji, huku msamaha ukiwa njia ya kutunza amani na uzima wa kiroho wa anayesamehe.

“Kama wakristo tunaomngoja Bwana ni lazima tukubaliane na makwazo ya ulimwengu huu kwamba hayana budi kuwepo lakini Bwana wetu Yesu Kristo aliushinda ulimwengu hivyo na sisi lazima tuwe washindi kwa kujifunza kutoa msamaha kwa wengine. ‘Kusamehe kunahusiana moja kwa moja na wokovu wetu na mahusiano yetu na Mungu na wengine. ’”

.....

SURA YA NNE

1. VITA YA KIONGOZI

Je, wewe ni kiongozi? una maono ya kuwa kiongozi? unakutana na vita za aina gani katika nafasi unayoitumikia? Una hofu ya kuwa kiongozi katika familia, kanisa, serikali au jamii?

Kiongozi ni mtu anayepewa jukumu la kuongoza wengine kuelekea lengo fulani. Katika safari ya uongozi, kuna changamoto nyingi zinazoweza kuchukuliwa kama vita. Vita hizi zinaweza kuwa za ndani, kama mashaka binafsi, hofu ya kushindwa, dhambi, uchovu wa kihisia, kupoteza maono, upweke au vita za nje, kama upinzani kutoka kwa wengine.

Mimi ni mtoto wa nne kuzaliwa katika familia yenye watoto sita—wanawake wanne na wanaume wawili. Katika nafasi yangu ya kuwa kaka mkubwa kwa wanaume, nimekuwa na nafasi maalum ndani ya familia, nafasi ambayo Mungu ameijenga kupitia madaraja aliyoniinua kiroho na kielimu.

Katika safari ya familia yetu, tumepitia vipindi mbalimbali, baadhi vikiwa vyenye furaha, na vingine vikijaa changamoto. Hali hii imenifanya nisiwe tu ndugu wa kawaida bali pia mchungaji wa familia, mwalimu wa familia, na mshauri mkuu. Ingawa sina uzoefu mkubwa katika mambo yote, naamini Mungu amenijalia hekima ya kuwa msaada kwa ndugu zangu. Kila wanaponishirikisha shida zao, mara nyingi wanapata amani kupitia msimamo, ushauri, na mwongozo ninaowapa.

*Hata hivyo, majukumu haya yameambatana na vita kubwa. Familia inapopitia migogoro—iwe ni matatizo ya ndoa, shida za kiafya, au changamoto za kiuchumi—najikuta nikibeba mzigo wa hisia nzito: **huzuni, hofu, majonzi, na hatia**. Wakati mwingine ninapokuwa nimechoka au ninapokosa uwezo wa kifedha kusaidia, bado najikuta nikihitajika kusimama kama tegemeo.*

Kuna nyakati napaswa kuficha hisia zangu; badala ya mimi kulia, inanibidi nimfariji anayelia. Wakati ninapohitaji ushauri, ninajikuta nikitoa ushauri kwa wengine. Na hata pale ambapo malengo yangu binafsi hayajatimia, inanibidi niweke kando mahitaji yangu ili kusaidia wengine kuyatimiza yao.

*Hii ni moja ya vita kubwa za kiongozi—vita zinazoweza kunitoa katika utulivu wa maombi, kunisukuma kwenye uchovu wa kihisia na kimwili, na hata kunivuruga katika majukumu yangu mengine. Lakini katika yote, naamini kwamba kila kiongozi aliyeteuliwa na Mungu lazima apitie majaribu haya. **Swali ni: Je, tunawezaje kupigana vita hizi na kushinda?***

Katika somo hili la *Vita za Kiongozi*, nitashirikisha kanuni za kiroho na mbinu za kimatendo ambazo kiongozi anapaswa kutumia ili kushinda vita kama hizi. Mungu hakutuita tu kubeba mizigo, bali pia **kupata ushindi ndani ya vita**.

Vita yako kama kiongozi ni sehemu ya safari ya uongozi. Kupitia nguvu ya neno la Mungu ya kibiblia wewe kama kiongozi utapata nguvu ya kuendelea na **SAFARI YAKO YA UONGOZI**, Mungu anatupatia uwezo wa kushinda changamoto, hata zile ambazo zinaonekana kuwa kubwa kuliko uwezo wetu wa kibinadamu.

Daudi alipokabiliana na Goliathi, alitegemea nguvu ya Mungu, si silaha kubwa (**1Samweli 17:45**). Kama kiongozi wa familia, kanisa, idara au jamii amini kwamba hiyo nafasi ni Mungu amekupa, usifikirie kukata tamaa na kujiuzuru bali Mwombe Mungu akupe hekima kuingia na kutoka kwa watu wako, usichoke kwasababu umebeba kusudi la Mungu la kuwavusha watu walio nyuma yako kuiona ng'ambo, jaribu kufikiri kama YESU asingekamilisha safari kuelekea Golgotha nini kingetokea?

Uongozi si safari rahisi, lakini ni nafasi ya kipekee ya kutumikia wengine pamoja na Mungu kwa ujasiri, unyenyekevu, na hekima. Mungu huandaa viongozi wake kwa kazi kubwa, na ni jukumu letu kujiamini na kumtegemea katika kila hatua.

Tarajia Vita Hizi Kama Kiongozi Uwe Tayari Kukabiliana Nazo Na Kushinda.

1. **Vita vya Kiroho:** Vita vya kiroho ni mapambano yasiyoonekana ambayo yanahusisha roho ya mtu dhidi ya nguvu za giza au majaribu yanayolenga kumzuia mtu kufanikisha mapenzi ya Mungu. Vita hivi vinaweza kuathiri maisha ya kiimani, kiakili, kihisia, na hata kimwili. Elewa kuwa vita hizi ni kwa ajili ya kukufanya usitimize mapenzi ya Mungu. Biblia inatufundisha kuwa maisha ya kila Muumini ni sehemu ya uwanja wa vita vya kiroho. Viongozi mara nyingi hukutana na changamoto zinazojaribu imani yao.

Mfano Yesu aliyekabili majaribu jangwani, ambapo shetani alikuwa amelenga kukwamisha mpango wa Mungu kuukomboa ulimwengu, alipambana kutaka kumtoa Yesu katika Mapenzi ya Mungu. (Mathayo 4:1-11). Vita vya kiroho vinaanzia kwenye ulimwengu wa kiroho ambapo kuna mvutano kati ya nuru (Mungu) na giza (ibilisi). **Efeso 6:12** inasema: *“Kwa maana kushindana kwetu si juu ya damu na nyama, bali ni juu ya falme, mamlaka, na wakuu wa giza hili, na majeshi ya pepo wabaya katika ulimwengu wa roho.”* **Kushinda vita hivi kunahitaji nidhamu ya kiroho, imani thabiti, na kujitolea kwa Mungu.**

2. **Vita vya Kihisia:** Mashaka binafsi na hofu ya kushindwa ni changamoto kubwa kwa viongozi. Musa alihisi hana uwezo wa kuongoza Waisraeli kutoka Misri (Kutoka 3:11). Vita vya kihisia ni mapambano yanayotokana na hali za ndani kama hofu, wasiwasi, hasira, huzuni, au uchovu wa kihisia. Haya ni mapambano ya ndani yanayoweza kumzuia kiongozi kufikia uwezo wake kamili na kusimamia majukumu yake kwa mafanikio.

Mara nyingi, vita hivi vinaweza kuwa changamoto kubwa zaidi kuliko changamoto za nje, kwa sababu vinaathiri jinsi kiongozi anavyofikiri, kuhisi, na kufanya maamuzi. Vita vya kihisia ni sehemu ya maisha ya kila kiongozi, lakini vinaweza kushindwa kwa kutegemea Mungu, kutumia hekima ya neno la Mungu, na kuwa na msaada wa kiroho na kihisia. Kila changamoto ya kihisia ni fursa ya kukua na kuimarika zaidi katika imani na uongozi.

- 3. Vita vya Kijamii:** Upinzani kutoka kwa watu walioko karibu, kama Nehemia alivyokutana na Sanbalati na Tobia walipokuwa wakimdhihaki wakati wa ujenzi wa ukuta wa Yerusalemu (Nehemia 4:1-3). Ni changamoto zinazotokea kutokana na maoni ya watu, mtazamo wao binafsi, upinzani wa kijamii, mifumo ya kidini au kisiasa, na matarajio makubwa ya jamii kwa kiongozi. Wakati mwingine, nia yako kama kiongozi inaweza kuchukuliwa vibaya na watu na kusababisha watu kukupinga au kutokuunga mkono Mfano: Musa alikumbana na malalamiko ya Waisraeli jangwani, wakidai kuwa aliwatoa Misri kuwaleta kufa jangwani (**Kutoka 16:3**). Vita vya kijamii ni changamoto ya kawaida kwa viongozi wa kila aina, lakini vinaweza kushindwa kwa unyenyekevu, uvumilivu, na imani thabiti kwa Mungu. Ushindi wa vita hivi si tu unaleta maendeleo, bali pia huimarisha uaminifu wa kiongozi na jamii yake.
- 4. Vita vya Kimwili:** Hali za kimwili kama vita halisi au magumu ya kiuchumi yanaweza kuathiri uongozi. Mfano ni Daudi alipokabiliana na Goliathi (**1Samweli 17**). Vita vya kimwili ni mapambano yanayohusisha changamoto za moja kwa moja zinazoweza kutishia uhai, usalama, au mali za kiongozi na wale anaowaongoza. Vita hivi ni halisi, vinaweza kujumuisha mashambulizi ya moja kwa moja, au hali ngumu za mazingira ambazo kiongozi anapaswa kushughulikia ili kuhakikisha ulinzi na ustawi wa watu wake. Kiongozi anahitaji kufanya maamuzi mazito ambayo yanaweza kuwa na athari kubwa kwa watu wake. Si kila vita vinapaswa kupiganwa. Kiongozi mwenye hekima huchagua vita vinavyolingana na maono ya Mungu.

Jinsi ya Kushinda Vita za Uongozi

Kushinda vita vya uongozi wa kiroho ni mchakato unaohitaji ufahamu wa kina kuhusu imani, maadili ya kiroho, na uwezo wa kuwaongoza watu katika hali ya kiroho ya juu zaidi. Fanya yafuatayo kushinda vita zote;

1. **Usikivu wa Kiroho:** Jifunze kusikia sauti ya Mungu kupitia maombi na neno lake (Zaburi 119:105). Ni uwezo wa kuzingatia na kujibu sauti ya Mungu au mwongozo wa kiroho, kwa umakini na uaminifu. Ni hatua ya kiroho ambayo inahitaji unyenyekevu, utulivu, na hali ya kutafuta ukweli na mapenzi ya Mungu. Usikivu huu haujumuishi tu kusikiliza kwa masikio ya kimwili, bali pia kusikiliza kwa roho kuweza kuelewa na kutambua sauti ya Mungu katika hali ya kiroho. Usikivu wa kiroho unahitaji ustahimilivu. Wakati mwingine, inachukua muda na uvumilivu ili kugundua sauti ya Mungu. Mtu anapaswa kuwa na uvumilivu, hasa wakati wa majaribu, na kuendelea kusikiliza kwa usikivu hata wakati hali inakuwa ngumu.
2. **Maombi na Kutafuta Hekima:** Omba hekima kama Sulemani alivyofanya (1 Wafalme 3:9). Maombi ni njia ya kuwasiliana na Mungu, ambapo mtu anafungulia moyo wake kwa Mungu ili kumweleza matamano, mahitaji, shukrani, na hofu zake. Ni wakati ambapo mtu anapata nafasi ya kutafuta msaada, kuelewa, na kupata nguvu ya kiroho. Katika maombi, mtu anaweza kutoa shukrani kwa Mungu, kutubu, na kutafuta msaada. Ni pia wakati wa kufanya maamuzi, kwa kuzingatia mapenzi ya Mungu. Maombi ni muhimu katika kutafuta hekima, kwani Mungu anasema kuwa atatoa hekima kwa watu wanaomwomba kwa imani (Yakobo 1:5).

3. **Kujifunza na Kutumia Mikakati:** Tumia mbinu za uongozi bora, kama Nehemia alivyofanya kwa kupanga na kuwahamasisha watu wake (Nehemia 2:17-18). Biblia ni chanzo kikuu cha mikakati ya kiroho. Kila kifungu cha Maandiko kinatoa mwongozo juu ya jinsi ya kuishi kwa mujibu wa mapenzi ya Mungu. Kwa mfano, Neno la Mungu linasema kwamba **"Ndipo utakapofahamu haki na hukumu, Na adili, na kila njia njema."** (Mithali 2:9). Hekima hii ni mikakati ya kiroho ambayo inatusaidia kufanya maamuzi sahihi. Roho Mtakatifu ni msaidizi wetu wa kiroho, ambaye hutufundisha na kutuongoza kwenye kweli yote (Yohana 14:26). Mtu anapojitahidi kusikiliza na kuzingatia mwongozo wa Roho Mtakatifu, anapata mikakati ya kiroho ambayo inamletea ushindi katika maisha yake.
4. **Uvumilivu:** Uvumilivu ni silaha muhimu katika kushinda changamoto za uongozi (Warumi 5:3-4). Ni sifa muhimu ya kiroho ambayo inahusu uwezo wa kustahimili changamoto, maumivu, au majaribu bila kukata tamaa au kujibu kwa hasira. Katika muktadha wa kiroho, uvumilivu unahusiana na uvumilivu katika imani, kukabiliana na magumu kwa amani, na kuendelea kutenda mema hata wakati wa majaribu. Uvumilivu ni sehemu muhimu ya ukuaji wa kiroho na ni kipengele kinachotufundisha kuwa na subira na kutegemea Mungu. **Yakobo 1:2-4:** *"Ndugu zangu, hesabuni ya kuwa ni furaha tupu, mkiangukia katika majaribu mbalimbali; mkifahamu ya kuwa kujaribiwa kwa Imani yenu huleta saburi. Saburi na iwe na kazi kamilifu, mpate kuwa wakamilifu bila kupungukiwa na neno."*
5. **Ushirikiano:** Shirikiana na wengine kwa hekima, kama Musa alivyowashirikisha viongozi wa makabila kusaidia katika kazi ya kuongoza (Kutoka 18:13-26).

Ushirikiano ni sifa muhimu ya kiroho na kijamii ambayo inahusisha kufanya kazi pamoja kwa kushirikiana na wengine ili kufikia malengo ya pamoja, kulingana na mapenzi ya Mungu. Ushirikiano unahusisha ushirikiano, msaada wa pamoja, na kuungana kwa nguvu na rasilimali ili kuleta mabadiliko chanya katika jamii, familia, au kanisa. Katika muktadha wa kiroho, ushirikiano ni muhimu katika huduma, uongozi, na maisha ya kiroho, kwani Mungu alikusudia watu wake kuishi kwa ushirikiano na kusaidiana. **1 Wakorintho 12:12-14** inasema, "Maana kama vile mwili ni mmoja, lakini una viungo vingi, na viungo vyote vya mwili, ingawa vingi, ni mwili mmoja, ndivyo ilivyo na Kristo. Kwa maana kwa Roho mmoja sisi sote tulibatizwa katika mwili mmoja...

Hii inaonyesha jinsi viungo vya mwili vinavyoshirikiana ili kuleta umoja na kazi moja. Vivyo hivyo, waumini wanapaswa kushirikiana kwa umoja ili kutimiza mapenzi ya Mungu.

Vita vya uongozi ni changamoto kubwa lakini zinazoweza kushindwa kwa msaada wa Mungu. Kama kiongozi wa familia, kanisa, taasisi, serikali, au jamii unahitaji nguvu za kiroho, mikakati ya kibiblia, na imani thabiti ili kushinda vita hivi. Licha ya mapambano, tunajua kuwa Mungu yuko pamoja nasi, na kwa msaada wake, tunaweza kushinda na kuendelea kuongoza kwa njia inayomtukua.

Katika Mambo Yote Tutashinda Na Zaidi Ya Kushinda.

AMINA.

2. BWANA, NIONYESHE JINSI YA KUDHIBITI MAWAZO YANGU

Maria alikuwa mwanamke mchanga wa Kikristo aiyeokoka siku za karibuni, aliyejitahidi kumfuata Mungu kwa moyo wote. Alijulikana kwa furaha yake kanisani, lakini nyuma ya tabasamu hilo, Maria alikabiliana na mapambano makubwa ya ndani. Mawazo yake mara nyingi yalikuwa uwanja wa vita visivyoonekana. Kila siku, Maria alipambana na mawazo ya kushindwa, hofu, na hukumu. Aliamini kwamba hakuwa mzuri wa kutosha mbele za Mungu, kwamba maisha yake hayakuwa na thamani, na kwamba kila mtu alimwona kama mtu asiye na maana. Mawazo haya yalizidi kuwa makali, hasa wakati wa usiku, Maria alipojaribu kulala lakini akili yake ikawa kama redio isiyo zimika.

Siku moja, Maria alihudhuria mkutano wa maombi uliokuwa umehudhuriwa na waumini wa kanisani kwake. Wakati wa maombi, kiongozi alisema, "**Mungu ananena na mtu aliye hapa. Anasema, 'Usiruhusu mawazo ya uongo yakuendeshe. Yateke mateka kwa jina la Yesu, na utapata amani.'**" Maneno hayo yalimgusa Maria moja kwa moja. Alitambua kuwa alikuwa ameruhusu mawazo yasiyofaa kumiliki akili yake. Hakufanya lolote kuyazuia; badala yake, aliyakubali na kuyasikiliza kana kwamba yalikuwa ukweli.

Baada ya mkutano, Maria alizungumza na mchungaji wake. Alielezea mapambano yake na jinsi mawazo yake yalivyokuwa yakimzuia kuishi kwa furaha. Mchungaji alimshauri kusoma **2Wakorintho 10:5**, ambapo tunahimizwa "kuyateka mawazo yote yamtii Kristo." Pia alimwambia afanye maombi ya kila siku ya kumkabidhi Mungu akili yake na kujifunza kutambua sauti ya uongo wa adui.

Maria alianza safari mpya ya kiroho. Kila mara wazo hasi lilipoingia kichwani mwake, alisimama na kusema kwa sauti, **"Ninakataa wazo hili kwa jina la Yesu. Mawazo yangu ni mali ya Kristo."** Alianza kujaza akili yake kwa kusoma Neno la Mungu na kumsifu Mungu kwa nyimbo za ibada. Kadri siku zilivyozidi kwenda, alihisi mabadiliko. Mawazo ya uongo yalipungua nguvu, na amani ya Mungu ikaanza kutawala maisha yake.

Miaka miwili baadaye, Maria alisimama mbele ya kanisa kutoa ushuhuda. Alisimulia jinsi alivyokuwa mfungwa wa mawazo yake mwenyewe na jinsi Neno la Mungu lilivyomuokoa. Alisema, **"Nilijifunza kwamba si kila wazo linalokuja akilini mwangu linastahili kusikilizwa. Nilipompa Mungu akili yangu, nilipata uhuru wa kweli."**Kupitia ushuhuda wake, wengi waliopitia hali kama hiyo walipata tumaini. Hadithi ya Maria iliwakumbusha waumini wote kwamba mawazo mabaya ni sehemu ya mapambano ya kiroho, lakini kwa msaada wa Mungu, ushindi ni hakika. Mara nyingi shetani huleta hali ambayo watu wengi huwa tunaona ni jambo la kawaida na pengine ni jambo la kiakili tu, hali hii ni ile ya kufikiria kila kitu kibaya kuhusu maisha binafsi, na hali hiyo mara nyingi huleta ushawishi wa kukata tamaa, kuogopa, kujilaumu na kujiona huna maana ya maisha.

Mfano ni wakati unapojilinganisha na wengine wenye maendeleo Zaidi yako, unapoikumbuka historia duni ya familia yako, unapokumbuka mali ulizopoteza, unapowakumbuka watu wako wa karibu waliokufa. Mawazo kama hayo yaliwahi kunitesa sana wakati Fulani.

Lakini ukweli ni kwamba wakristo wanaopitia hali kama hizi ni wengi sana, kupitia kusoma Neno la Mungu nilikutana na ujumbe Muhimu sana katika **2Wakorintho 10:5** inayosema *‘tukiangusha mawazo na kila kitu kilichoinuka, kijiinuacho juu ya elimu ya Mungu; na tukiteka nyara kila fikira ipate kumtii Kristo.’*”

Nikajifunza kuwa kumpinga adui wa nafsi zetu kunahitaji kudhibiti mawazo yetu. Biblia inasema lazima tujifunze kuyateka mawazo yote (2 Wakorintho 10:5). Kwa hiyo sina haja ya kukubali kila wazo linalokuja akilini mwangu. Nina chaguo la kuamua kuyakubali au kuyakataa. Adui hutumia ujanja mwingi kutufanya tuamini uongo wake, lakini tunaweza kujihami kwa Neno la Mungu.

******NINI CHA KUFANYA?**

Biblia inatupa ushauri...” huku mkimtwika yeye fadhaa zenu zote, kwa maana yeye hujishughulisha sana kwa mambo yenu.” (1Petro 5:7). Huu ni ushauri mzuri kwa watu wa wakati wote. Tunapaswa kuacha kukasirika na kusumbuka na badala yake tuwe na imani ikiwa tunataka kuwa na nguvu ya kuishi kwa ufanisi basi tumkabidhi Yesu hali zetu yeye ndiye mwenye nguvu za kushughulikia hofu zetu, mawazo yetu na mahitaji yote. Mawazo hasi yana nguvu ya kukusahaulisha upendo wa Mungu unavyokuzungunguka lakini ukijifunza kuyaangusha mawazo hasi na kuyateka ili yamtii Kristo utaona hofu na huzuni na mashaka zikiondoka na kukuacha huru.

Labda umekuwa haufanyi vizuri katika mambo mengi kwenye maisha yako. Labda unaposimama tayari kupambana na jaribu lako unashindwa kufikia malengo. Unakosea mara kwa mara, na unajilaumu sana kwa kushindwa kufanya vizuri.

Nataka nikupe ushauri wa mbinu ya kutumia ili kushinda hiyo hali ya ndani. Ninakuhakikishia kwamba utafanikiwa endapo utaitumia kwa Imani.

Anza kusoma biblia yako kwa makini, chagua vifungu kumi na mbili ambavyo unaona kwamba vinasema na wewe moja kwa moja kuhusu hali uliyonayo, ikiwa vinatoa ushauri, vina kusahihisha, vinakufariji, au vinakupa maelekezo na kukuongezea imani, Kisha ziandike kwenye daftari lako la nukuu yakumbuke yote. Ruhusu maneno yote yaingie katika akili yako. Yaseme tena na tena, hasa kabla ya kulala usiku na asubuhi unapotoka. Kwa kurudia rudia mara kwa mara maneno hayo yatakaa kwenye akili yako na kwa muda yataweza kubadilisha na kurekebisha mtindo wako wa mawazo. Mchakato huu utakubadilisha kuwa mtu mwenye imani, mwenye matarajio, na mara unapokuwa hivyo, hatimaye utakuwa mwenye mafanikio.

Maandiko yanayoweza kukusaidia kudhibiti mawazo.

- **ZABURI 23:1-6** ‘BWANA ndiye mchungaji wangu, Sitapungukiwa na kitu. Katika malisho ya majani mabichi hunilaza, Kando ya maji ya utulivu huniongoza. Hunihuisha nafsi yangu; na kuniongoza Katika njia za haki kwa ajili ya jina lake. Naam, nijapopita kati ya bonde la uvuli wa mauti, Sitaogopa mabaya; Kwa maana Wewe upo pamoja nami, Gongo lako na fimbo yako vyanifariji. Waandaa meza mbele yangu, Machoni pa watesi wangu. Umenipaka mafuta kichwani pangu, Na kikombe changu kinafurika. Hakika wema na fadhili zitanifuata Siku zote za maisha yangu; Nami nitakaa nyumbani mwa BWANA milele.’

- **Wafilipi 4:8** "Hatimaye, ndugu zangu, mambo yoyote yaliyo ya kweli, yoyote yaliyo ya staha, yoyote yaliyo ya haki, yoyote yaliyo safi, yoyote yenye kupendeza, yoyote yenye sifa njema; ukiwapo wema wo wote, ukiwapo sifa nzuri yo yote, yatafakarini hayo."
- **2 Wakorintho 10:5** "Tukiangusha mawazo, na kila kitu kilichoinuka, kijiinuacho juu ya elimu ya Mungu; na tukiteka nyara kila fikra ipate kumtii Kristo."
- **Isaya 26:3** "Utamlinda kabisa yeye ambaye moyo wake umekutegemea; kwa kuwa anakutumaini Wewe."
- **Zaburi 19:14** "Maneno ya kinywa changu, na mawazo ya moyo wangu, yapate kibali mbele zako, Ee Bwana, Mwamba wangu, na mwokozi wangu."
- **Mathayo 6:34** "Basi, msisumbuke kwa ajili ya kesho; kwa maana kesho itajisumbukia yenyewe. Yatosha kwa siku maovu yake."

Kuzingatia na kutafakari maandiko haya kunaweza kusaidia kudhibiti mawazo na kuleta utulivu wa kiroho na kiakili.

Roho mtakatifu akusaidie kupata utulivu wa mawazo uwe mtu imara na mwenye mafanikio kwa Jina la Yesu. AMINA

3. NGUVU YA NENO LA MADHABAHU

Katika maisha ya Mkristo, madhabahu yamekuwa sehemu muhimu ya ibada na mawasiliano kati ya mwanadamu na Mungu. Madhabahu sio tu mahali pa kutoa dhabihu, bali pia ni chanzo cha nguvu na baraka. Neno linalotamkwa kutoka kwenye madhabahu linaathiri maisha ya watu, kama ilivyoonyeshwa kupitia historia ya Yoshua na Kalebu. Tafakari mfano wa **Yoshua 14:6-15**, ambapo Kalebu alijitokeza kwa ujasiri kuomba milki yake ya mlima (Hebroni), akitegemea baraka za kiongozi wa madhabahu.

6 Ndipo wana wa Yuda wakamkaribia Yoshua huko Gilgali, naye Kalebu mwana wa Yefune, Mkenizi, akamwambia, **"Wewe wajua neno alilomwambia Bwana Musa, mtu wa Mungu, katika habari zangu mimi na wewe huko Kadesh-Barnea."** 7 **"Nalikuwa mtu wa miaka arobaini, hapo aliponituma Musa mtumishi wa Bwana kutoka Kadesh-Barnea ili nipeleleze nchi; nami nikamletea habari kama ilivyokuwa moyoni mwangu."** 8 **"Walakini ndugu zangu waliopanda nami waliyeyusha mioyo ya watu; bali mimi nalimfuata Bwana, Mungu wangu, kwa moyo wangu wote."**9 **"Naye Musa akaniapia siku ile, akisema, 'Hakika nchi ile uliyokanyaga kwa miguu yako itakuwa urithi wako na wa watoto wako hata milele, kwa sababu umemfuata Bwana, Mungu wangu, kwa moyo wako wote.'"** 10 **"Na sasa, tazama, Bwana amenihifadhi hai, kama alivyosema, miaka hii arobaini na mitano, tangu siku ile Bwana**

aliposema neno hili na Musa, hapo Israeli walipotembea jangwani; na sasa, tazama, leo, mimi ni mtu wa miaka themanini na mitano.

"11 "Mimi leo ningali hodari kama vile nilivyokuwa siku ile Musa aliponituma; kama nguvu zangu zilivyokuwa wakati ule, ndivyo zilivyo leo, kwa vita, na kwa kutoka, na kwa kuingia."12 "Basi sasa unipe mlima huu, ambao Bwana alisema siku ile; kwa maana wewe ulisikia siku ile kwamba Waanaki walikuwako huko, na miji yao ilikuwa mikubwa na yenye maboma; labda Bwana atakuwa pamoja nami, nami nitawafukuza, kama alivyosema Bwana."13 Ndipo Yoshua akambariki, akampa Kalebu, mwana wa Yefune, Hebroni kuwa urithi wake.14 Kwa hiyo Hebroni ikawa urithi wa Kalebu, mwana wa Yefune, Mkenizi, hata leo, kwa sababu alimfuata Bwana, Mungu wa Israeli, kwa moyo wake wote.15 Basi jina la Hebroni hapo kwanza lilikuwa Kiriath-Arba; naye Arba alikuwa mtu mkuu katika Waanaki. Na nchi ikawa na amani bila vita.

Kalebu, mmoja wa watu wawili pekee walioamini kwamba wanaweza kuingia katika nchi ya ahadi, alikua na ujasiri wa kuwasilihi Yoshua na wengine kuiendea nchi ya ahadi. *Alijua kuwa baraka zilizokuwa ndani ya neno la Yoshua zingemwezesha kumiliki mlima wa Hebroni akamtaka Yoshua kama kiongozi wake ampe kibali cha kuuendea mlima akautawale, hata ingawa ulikuwa na majitu yaliyokuwa na nguvu.* Yoshua anasimama kama kiongozi wa madhabahu, Kalebu aliona umuhimu wa kudai haki yake kupitia neno la madhabahu akamwambia Yoshua **“basi sasa unipe mlima huu”**.

Wakati Kalebu alipoomba apewe Mlima Hebroni, eneo hilo lilikuwa linaishi watu wa kabila la Anaki, ambao walikuwa maarufu kwa kuwa majitu yenye nguvu na tishio kubwa miongoni mwa Waisraeli. Katika Kalebu aliomba mlima huo kwa sababu alikuwa na imani kuwa Mungu angemsaidia kuwashinda wenyeji wa eneo hilo.

Hii ilikuwa ni ahadi ya Mungu kupitia Musa kwamba Hebroni ingekuwa sehemu yake kwa sababu ya uaminifu wake wakati wa upelelezi wa nchi ya Kanaani.

Ingawa Kalebu alijua kwamba kumilki Hebroni ilikuwa ni ahadi kutoka kwa Mungu kupitia mtumishi wake Musa, muda ulipofika kalebu hakufanya haraka kuuendea mlima badala yake alirudi tena kwenye madhabahu kutaka Baraka kwa kiongozi wake (Yoshua). Hivi ndivyo tunavyotakiwa kuheshimu mamlaka ambazo Mungu ameziweka, tunahitaji kuonesha heshima kwa viongozi wetu wa kiroho kwa kutofanya makosa kama kuwadharau, kuwakashifu kwa kigezo cha kupokea wito kutoka kwa Mungu. Haijalishi una nguvu kiasi gani au upako kiasi, endelea kunyenyekea chini ya viongozi ambao Mungu amewapa kazi ya kutulea ili tufike kwenye viwango vya mbali zaidi.

Baada ya kupata baraka kutoka kwa Yoshua, Kalebu alienda kupigana na kuwafukuza wana wa Anaki, akiwemo Ahimani, Sheshai, na Talmai, waliokuwa wakiishi huko. Hivyo, Hebroni haikuwa tupu wakati huo, bali ilikuwa inakaliwa na watu wenye nguvu na wenyeji wa zamani. Lakini kwa neno la madhabau Kalebu akaumiliki mlima Hebroni **Yoshua 14:13** inasema "*Basi Yoshua akambariki, akampa Kalebu mwana wa Yefune Hebroni kuwa urithi wake.*"

Kiongozi Wa Madhabahu Na Nguvu Ya Neno La Madhabahu

Kiongozi wa madhabahu, kama Yoshua, alikuwa na mamlaka iliyotokana na Mungu. Baraka zake kwa Kalebu zilikuwa na nguvu ya kubadilisha maisha ya Kalebu. Alipomwambia "Hakika, nitakupa Hebroni," Yoshua alithibitisha kwamba neno lake lilikuwa na nguvu ya kuleta mabadiliko. Neno la kiongozi ni la kuinua na kuimarisha. Hali kadhalika, neno linalotolewa na viongozi wa kiroho leo lina uwezo wa kuimarisha imani zetu na kutuongoza katika njia za Mungu.

Katika Biblia, kuna matukio mengi ambapo neno la madhabahu limeleta mabadiliko makubwa. Mfano mwingine ni Eliya, ambaye kwa neno lake, alileta mvua baada ya miaka mitatu ya ukame. Katika nyakati zetu za kisasa, tunaweza kuona jinsi viongozi wa kiroho wanavyotangaza baraka na matukio ya kushangaza yanapotokea.

Maana ya Kuheshimu Neno la Madhabahu

Heshima kwa neno la kiongozi wa madhabahu ni muhimu sana. Waumini wanapaswa kuelewa kuwa neno linalotolewa linaweza kuwa na athari kubwa katika maisha yao. Kutokuruhusu neno la madhabahu litubariki ni kuacha baraka nyingi na mabadiliko muhimu yanayoweza kutokea katika maisha yangu. Tunaiteka idadi kubwa ya baraka na nguvu zinazotokana na neno linalotamkwa kutoka kwenye madhabahu. Kila mkristo anakaribishwa kuchukua hatua ya **kutafuta, kuheshimu, na kutenda kwa kuzingatia neno linalotoka kwenye madhabau.**

Wakati nilipopata wazo la kuanza kuandika kitabu hiki nilimwomba Mungu aniongoze kuandika mafundisho yatakayofaa kwa watu wake, hata hivyo sikuishia kuomba tu niliitumia kanuni ya Kalebu ya kutafuta Baraka za kiongozi wa madhabahu mahali ninapoabudu. Nilimfuata mchungaji wangu Dr, Ngenzi kumshirikisha wazo na kuomba mwongozo wake kwakuwa yeye ni mzoefu katika Theolojia na uandishi wa vitabu, namshukuru Mungu sana kwa ajili yake, aliniombea kwa mzigo mkubwa, alinipa ushauri na maarifa ambayo kwa sehemu kubwa yalinipa hamasa ya kuhakikisha naandika kitabu chenye maisha halisi ya kikristo.

Hivi ndivyo nguvu ya Neno la madhabahu inavyofanya kazi. Mungu anathibitisha neno lake kupitia kinywa cha mtumishi wa madhabahu yake.

Maombi yangu ni kwamba tuwe na moyo wa kuzingatia, ili tuweze kupokea baraka na nguvu ambazo Mungu ametupatia kupitia maneno ya viongozi wetu. AMINA.

SURA YA TANO

1. UTAJIRI NI CHOMBO CHA HUDUMA, SI KIPIMO CHA THAMANI YA MTU.

Msemo huu unaonyesha mtazamo wa kiroho na wa kijamii kuhusu utajiri na thamani ya binadamu. Utajiri ni chombo cha huduma inamaanisha kuwa mali au rasilimali ambazo mtu anazo zinapaswa kutumiwa kwa hekima ili kusaidia kuboresha maisha ya wengine.

Siku kadhaa zilizopita, nilikutana na kijana mmoja ambaye kwa mtazamo wa macho tu, niliona akiwa amedhoofu na kuchoka sana. Alikuwa amekaa akizungumza na mwenzake, akimsimulia jinsi alivyopitia wakati mgumu, hasa kutokana na hali yake ya kuumwa kwa muda mrefu. Ugumu wa maisha uliofuata kutokana na ugonjwa wake ulimfanya ashindwe kufanya kazi yoyote, huku akilazimika kutumia dawa kali sana. Hali yake ilipelekea familia yake kuishi katika shida kubwa, kiasi kwamba hata kupata mlo mmoja kwa siku ilikuwa ni mtihani mkubwa kwao.

Niliposikiliza mazungumzo yao kwa kina, huruma ilijaa moyoni mwangu. Nilikatisha mazungumzo yao kwa upole na kumuuliza, "Brother, samahani, una simu?" Aliponijibu kuwa anayo, nikamwomba anitajie namba yake. Baadaye, nilimtafuta na nikapata nafasi ya kumtembelea nyumbani kwao, ambapo nilimkuta akiwa na mke wake na mtoto wao wa kwanza. Mke wake pia alikuwa ni mjamzito. Tulianza mazungumzo yetu juu ya upendo wa Kristo, nikawafundisha kuhusu kujenga tumaini jipya ndani ya Yesu.

Kwa neema ya Mungu, waliamini maneno yangu, wakakubali kumpokea Yesu kama Bwana na Mwokozi wao. Niliwaongoza sala ya toba, na tangu siku hiyo maisha yao yalianza kubadilika.

Kuanzia hapo, Mungu alinipa mzigo mkubwa wa kuihudumia familia hii. Nilijikuta siwezi kula wala kufanya jambo lolote kabla ya kuhakikisha kuwa wao wamekula. Kila kunapokucha, wazo la kwanza lililojaza mawazo yangu lilikuwa ni hali yao. Upendo wa Mungu ndani yangu ulinisukuma kuwahudumia kwa kila hali. Kiasi kwamba kila aliyesikia habari hii alishangaa na kujiuliza mimi ni mtu wa aina gani. Lakini ukweli ni kwamba si kwa uwezo wangu, bali ni nguvu ya Mungu iliyokuwa ikinisukuma kuhakikisha watoto wake wapya wanauona upendo wake kupitia mimi.

Nilihakikisha wanapata malezi ya kiroho, niliwafundisha kuomba, kusoma Neno la Mungu, na kuishi kwa kumfuata Kristo kwa moyo wao wote. Huduma hii ilidumu kwa muda mrefu, tukiendelea kushiriki katika maombi kwa uaminifu. Jambo la kufurahisha ni kwamba Mungu aliitikia maombi yetu! Kijana huyu aliponywa magonjwa yake yote, mke wake alijifungua salama, na baadaye akaweza kufanya kazi na kuingiza kipato cha kuisimamia familia yake.

Kupitia ushuhuda huu, nilijifunza jambo moja kuu: **Pesa ni kitendea kazi cha huduma ya Mungu.** Si kila huduma inahitaji pesa, lakini mara nyingi, Mungu hutuwezesha kifedha ili tuweze kuleta mabadiliko katika maisha ya wengine. Upendo wa Kristo ni wa kweli na wenye nguvu, na anapokamata moyo wa mtu, hakuna kinachoweza kumzuia kufanya kazi yake!

Huu ni mwito wa kutambua kuwa utajiri unakuja na jukumu la kuwahudumia wale walio na mahitaji, familia, jamii, au hata kusaidia miradi ya maendeleo.

Kwa upande mwingine, si kipimo cha thamani ya mtu inasisitizwa kuwa thamani ya mtu haipimwi kwa kiwango cha mali au pesa alizonazo. Utajiri ni wa muda na unaweza kupotea, lakini utu wa mtu, tabia yake, na athari yake kwa jamii ni mambo yenye thamani ya kudumu. Hii inaonyesha kuwa mtu maskini hana thamani ndogo kwa sababu tu ya ukosefu wa mali, na vilevile, tajiri hana thamani zaidi kwa sababu ya utajiri wake.

Kwa ufupi Utajiri unapaswa kuwa chombo cha kutenda mema na kusaidia wengine. Thamani ya mtu inatokana na maadili yake, matendo mema, na mchango wake kwa dunia, si mali alizonazo. Huu ni mwito wa kuishi kwa unyenyekevu, kushirikiana, na kutambua utu wa kila mtu bila kujali hali yake ya kifedha. Neno la Mungu na mafundisho ya Kikristo yanasisitiza maadili na misingi inayopatikana katika Biblia kuhusu utajiri na thamani ya mtu.

Katika mafundisho ya Kikristo, utajiri unatakiwa kutumiwa kwa utukufu wa Mungu na kwa faida ya wengine. Biblia inasema: **1Timotheo 6:17-18:** *"Waagize matajiri wa ulimwengu huu wasijivune, wala wasiutumainie utajiri ambao si wa hakika, bali wamtumaini Mungu, atupaye vitu vyote kwa wingi ili tufurahi. Waagize watende mema, wawe matajiri kwa kutenda mema, wawe tayari kutoa, wawe wakarimu."*

Hii inaonyesha kuwa utajiri ni zawadi kutoka kwa Mungu inayopaswa kutumiwa kwa kusaidia wengine, si kwa kiburi au kujifurahisha tu.

Kwanini Wateule wa Mungu Mara Nyingi wanapitia katika kipindi cha umaskini?

Tunapochunguza maisha ya wale wanaohisi wamechaguliwa na Mungu kufanya kazi yake hapa naongelea wachungaji, walimu, maaskofu, wainjilisti na wateule wa maeneo mengine mara nyingi tunagundua jambo kwamba hali zao kiuchumi huwa ni za mashaka sana (changamoto za kifedha). Hata hivyo, changamoto hizi zinaweza kuwa ishara ya mchakato wa kuandaliwa kwa lengo kubwa zaidi. Kwa wale waliotiwa alama kwa wito wa kipekee, majaribu ya kifedha yanakuwa ukumbusho wa kumtegemea Mungu badala ya utajiri wa kidunia.

Kuelewa kwa nini changamoto hizi zinakuja na jinsi zinavyochangia ukuaji wa kiroho ni muhimu kwa kutembea kwa uaminifu katika njia hii. Hizi hapa ni sababu kadhaa kwa nini wateule mara nyingi wanakumbana na changamoto za kifedha.

1. Ni hatua muhimu ya Kusafishwa kwa ajili ya wito Mkubwa

Kila mtu aliyechaguliwa hupitia majira ya kusafishwa, na mara nyingi kusafishwa huku kunakuja kwa njia ya ukosefu wa kifedha. Kama vile dhahabu inavyosafishwa kwa moto, nyakati hizi za changamoto za kifedha Mungu huzitumia kuondoa uchafu, zikifunua nguvu na tabia zinazohitajika kwa safari ya utumishi mwema. Mchakato huu hufundisha uvumilivu, subira, na imani ya kudumu kwa Mungu, ukikumbusha wateule kuwa thamani yao haipimwi kwa utajiri bali kwa kusudi la kiungu.

2. Ni kipindi cha Kujifunza Kumtegemea Mungu Kikamilifu.

Mungu anapomchagua mtu kwa kazi maalum, mara nyingi huondoa vyanzo vya usalama, hasa kifedha, ili kumfundisha utegemezi kamili kwake. Bila pesa, wateule hujifunza kutegemea kupokea kutoka kwa Mungu. Hatua hii ya utegemezi huimarisha imani yao, huku wakiiona mikono ya Mungu ikitoa kwa njia za kimiujiza.

3. Ni hatua ya Kuandaliwa Kusimamia Utajiri kwa Hekima

Changamoto za kifedha mara nyingine hutumika kama maandalizi ya kushughulikia utajiri wa baadaye kwa hekima na unyenyekevu. Wale waliotiwa alama kwa kusudi la kipekee mara nyingi hupitia vipindi vya dhiki na umasikini ili kujifunza thamani halisi ya rasilimali. Wanapopata utajiri, wanakuwa bora zaidi katika kuutumia kwa njia inayomheshimu Mungu, wakitambua mahitaji ya wengine na umuhimu wa kutoa.

4. Kukuza Huruma na Mshikamano

Kukuza Huruma na Mshikamano" ni sehemu muhimu ya maisha ya kiroho na mafundisho ya Yesu Kristo. Huruma na mshikamano ni maadili yanayochukua mizizi katika upendo wa Mungu na agizo kuu la kupenda jirani kama nafsi yako (Mathayo 22:37-39). Changamoto za kifedha huwafanya wateule wa Mungu kukuza huruma kwa wengine wanaopitia magumu. Huruma hii inakuwa nyenzo muhimu katika wito wao, kwani wanakuwa na uwezo wa kuwahudumia wengine kwa uelewa wa kina. Kwa kuwa wamepitia magumu, wanatoa mwongozo na faraja kwa uhalisia zaidi.

Huruma ya Kikristo inahusisha kutoa msaada kwa wahitaji bila kujali hali zao, kama Yesu alivyosema, “*Na Mfalme atajibu, akiwaambia, Amin, nawaambia, kadiri mlivyomtendea mmojawapo wa hao ndugu zangu walio wadogo, mlinitendea mimi.* (Mathayo 25:40).

5. Kuondolewa kwenye Vifungo vya Kidunia

Wakristo wanaitwa kujikana nafsi na kumfuata Kristo (Mathayo 16:24). Hili linajumuisha kuachilia tamaa binafsi ambazo zinakinzana na mapenzi ya Mungu. Mungu hutumia changamoto za kifedha kuondoa vifungo vya ulimwengu wa mali.

Katika nyakati hizi, wateule wanakumbushwa kuwa hawajaitwa kufuatilia utajiri bali kutafuta kwanza ufalme wa Mungu. Tunapaswa kutopenda sana mali, anasa, au mamlaka ya kidunia, ambayo mara nyingi huvuruga uhusiano na Mungu. Yesu alisema, “*Kwa maana moyo wako utakapokuwa, ndipo na hazina yako itakapokuwa*” (Mathayo 6:21).

6. Kujenga Imani Kupitia Kutokuwa na Uhakika

Mungu anatumia njia hii ili kuwafundisha wateule wake kumtegemea Mungu hata wanapokabiliwa na hali za kutokuwa na uhakika. Ni hatua muhimu katika ukuaji na ukomavu wa kiroho, kwa kuwa zinawasukuma Wakristo kuamini uongozi wa Mungu badala ya kutegemea akili zao wenyewe. Safari ya wateule kupitia msimu wa kutokuwa na uhakika wa kifedha huchochea imani isiyoyumbishwa. Bila usalama wa kifedha, wanajifunza kuamini wakati wa Mungu na namna anavyofanya njia.

7. Kukuza Roho ya Shukrani

Shukrani ni sehemu muhimu ya maisha ya Kikristo, inayojengwa juu ya msingi wa kumtambua Mungu kama chanzo cha kila baraka. Shukrani sio tu hali ya kusema "asante" bali Shukrani inahusiana na kumtambua Mungu kama Muumba na mpaji wa kila kitu kizuri (**Yakobo 1:17**). Shukrani ni sehemu ya ibada. Mtume Paulo alisema, *"Mshukuruni Mungu kwa kila jambo; maana hayo ni mapenzi ya Mungu kwenu katika Kristo Yesu"* (**1Wathesalonike 5:18**). Changamoto za kifedha hujenga moyo wa shukrani kwa kila mteule wa Mungu hata kwa baraka ndogo.

8. Kujifunza Kuishi kwa Kanuni za Ufalme wa Mungu.

Kanuni za Ufalme wa Mungu zinatufundisha jinsi ya kuishi kwa haki, upendo, unyenyekevu, na utiifu kwa Mungu, huku tukitazamia ufalme wake wa milele. Ukosefu wa kifedha huwafundisha wateule kuishi kwa kanuni za kiroho, wakiweka imani yao katika uchumi wa Mungu badala ya mfumo wa ulimwengu. Kanuni za Ufalme zinalenga kubadilisha tabia ya Mkristo kwa nguvu ya Roho Mtakatifu (**Wagalatia 5:22-23**). Ni pale ambapo mapenzi ya Mungu yanatawala mioyo na maisha ya wateule wake. (**Mathayo 6:10**).

9. Kujenga Nguvu ya Ndani na Uvumilivu

Kupitia changamoto za kifedha, wateule hujenga nguvu ya ndani na uvumilivu unaowaandaa kwa changamoto za wito wao. Ni daraja muhimu katika maisha ya kiroho na kiakili, unaowasaidia Wakristo kushinda changamoto za maisha huku wakidumu katika imani, matumaini, na amani.

Hii ni safari ya kukuza uwezo wa ndani wa kustahimili majaribu na kudumu katika matumaini, huku tukitegemea nguvu ya Mungu na kuishi sawa sawa na neno lake. Nguvu ya kweli ya ndani hutoka kwa Mungu. Paulo alisema, "*Nayaweza mambo yote katika yeye anitiaye nguvu*" (**Wafilipi 4:13**). Ayubu alionyesha uvumilivu mkubwa wakati wa mateso yake, na mwishowe alibarikiwa mara dufu kwa uaminifu wake (Ayubu 1:20-22; Ayubu 42:10).

10. Kujifunza Furaha ya Kuridhika

Changamoto za kifedha huwafundisha wateule furaha ya kuridhika, kufurahia hali yake, kumshukuru Mungu kwa baraka zake, na kuishi maisha yenye amani hata bila kuwa na kila kitu kinachotamaniwa. Kuridhika ni maamuzi ya moyo yanayopatikana kwa kumtegemea Mungu, badala ya kuangalia hali au mazingira. Unanapojifunza kuridhika na kidogo, unaruhusu Mungu kuachilia Baraka ya vitu vikubwa. Kuridhika hutokana na kumjua Mungu na kuamini uaminifu wake. Paulo alisema, "*Najua kudhiliwa, tena najua kufanikiwa; katika hali yo yote, na katika mambo yo yote, nimefundishwa kushiba na kuona njaa, kuwa na vingi na kupungukiwa. Nayaweza mambo yote katika yeye anitiaye nguvu*". Kwa maana nimejifunza kuwa na kuridhika katika hali yoyote niliyo nayo" (**Wafilipi 4:12 - 13**).

Mungu hutumia changamoto za kifedha kuwaandaa wateule wake kwa wito wa kipekee alioweka juu yao. Kila jaribu huwasafisha na kuwakaribisha zaidi kwa Mungu, huku likiwasaidia kutimiza wito wao kwa utukufu wa Mungu. Mafundisho ya Kikristo yanatufundisha kuwa utajiri ni chombo cha kutenda mema na kuwa baraka kwa wengine, si sababu ya kiburi au kipimo cha thamani ya mtu.

2. WITO WAKO NI NINI?

Kabla ya kukubali kufanya kazi kama mtumishi wa Mungu, ni lazima uhakikishe wito wako umetoka kwa Mungu. Wito ni nini pengine unajiuliza na haujui nini maana ya wito. Wito ni mwaliko kutoka kwa Mungu kwa mtu ili kutimiza kusudi fulani maishani mwake. Mwito huu mara nyingi unahusiana na kujitoa kwa Mungu kwa ajili ya huduma, kumtumikia, au kuishi kwa namna inayozingatia mapenzi yake. Kila mkristo ana eneo lake ambalo amepewa na Mungu kulishughulikia.

Mara nyingi, wito huu huanza kwa hatua ndogo za utii na kuzaa matunda makubwa kwa wakati. Lakini si kwamba kila mwenye kupokea wito atatokewa na mwanga ama ataona kijiti kikiwaka Moto kama Musa au atasikia sauti ikimwita kama Samweli, Mungu anazo njia nyingi sana za kuingiza wito ndani ya Moyo wa Mtu. *Nilipokuwa mdogo nilikuwa napenda sana kusikiliza mahubiri ya kilokole niliyokuwa nayasikia kupitia mikutano ya injili iliyokuwa inafanyika maeneo ya karibu na nyumbani kwetu, wakati huo tulikuwa hatujaokoka lakini mahubiri yalikuwa yananivutia kiasi kwamba nilikua najiona kama mimi niwe kama mtu yule anavyohubiri na kufundisha, nilikuwa navutiwa zaidi na jinsi wahubiri walivyoyaamuru mapepo na nguvu za giza kuwaachilia watu.*

Miaka kadhaa baadae baada ya kuokoka sikuwa mtu wa kutamani kuhubiri na kufundisha bali nilianza kutaka kufanya hivyo kutokana na msukumo mkubwa uliokuwa ndani yangu, Mungu alinisaidia kuanza kuchukua hatua kwa kujifunza, kusoma, kufanya mazoezi na hatimaye nimekuwa mhubiri, mwalimu na mshauri.

Hivyo naweza kusema nimetambua wito wangu ni kuhubiri injili ya Yesu, kufundisha na kutoa ushauri wa kikristo (Christian counseling), kwasababu mbali na kuutambua wito bali niliona Mungu akinitengenezea mazingira ya kuuendeleza wito wangu, nilijiunga na shule ya biblia, baadae nikajiunga na chuo cha Saikolojia ya Ushauri wa Kikristo kutoka ngazi stashahada mpaka astashahada hata sasa bado nina maono ya kusoma mpaka ngazi ya PhD.

Hivyo, ushuhuda huu unaweza kukusaidia kujigundua una wito gani ambao Mungu amekupa, wengine wameitwa katika utoaji, kuwa viongozi, kutatua changamoto, kuhurumia wengine, kuwa waaminifu, kushuhudia, kuombea, kupatanisha, kushauri, kuchunga, kuhubiri, kuimba na kadharika. **Je, una wito gani?**

Wito wa Mungu ni jambo maalumu kwa kila mkristo kuzingatia. Tangu mwanzo, Mungu amekuwa akiwaita wanaume na wanawake kutimiza kazi Yake ulimwenguni. Kila kitu ambacho Mungu aliumba kina nafasi yake katika kazi ya Mungu. Katika kitabu cha Mwanzo, neno la Mungu linasema kuwa Mungu aliumba aina mbili za mwanga: mwanga mkubwa kutawala mchana, na mwanga mdogo, pamoja na nyota, kutawala usiku (**MWANZO 1:16**).

Vivyo hivyo, wewe pia una nafasi yako katika kazi na huduma ya Mungu. Mwito wa Mungu ni wa kukuweka mahali ambapo Mungu alikuumba kuwa, ili kutimiza kusudi Lake kwa maisha yako. **Mwito wa Mungu ni hatima yako.** Ni jambo la msingi linalopaswa kuchukuliwa kwa uzito, kwa sababu ndiyo sababu ya uwepo wako ulimwenguni. Hata hivyo, watu wengi wana dhana potofu kuhusu jambo hili.

Wengine hujaribu kuepuka mwito wa Mungu kwa sababu ya maslahi yao binafsi na tamaa za kidunia. Kutojua ukweli huu huwafanya waepukane na kutimiza hatima yao.

Mwito wa Mungu ndicho kitakachokuwezesha kutimiza kusudi la Mungu maishani mwako. Hii ndio hatima yako. Kila kitu kingine unachofanya ambacho hakihusiani na kile ambacho Mungu amekuita kufanya ni adui wa moja kwa moja wa hatima yako, hata kama umefanikiwa katika eneo hilo.

Unaposikia Wito Wa Kumtumikia Mungu Fahamu Haya Mambo Mawili Muhimu

1. UMRI SI KIKWAZO

Umri si kikwazo kwa mwito wa Mungu. Katika umri ulionao sasa, unayo nafasi katika mpango na mwito wa Mungu. Tofauti na kazi za kidunia ambapo umri mara nyingi huwa kikwazo au changamoto, mwito wa Mungu unahusisha watu wa rika zote. Hii inamaanisha kwamba, katika umri wako wa sasa, wewe si mzee sana au mchanga sana kutambua na kuitikia mwito wa Mungu.

Mfano **wa** **Musa**
Maisha ya Musa yaligawanyika katika awamu tatu za miaka arobaini. Miaka ya kwanza arobaini alitumia akijifunza hekima na elimu ya Wamisri. Miaka arobaini iliyofuata, alikuwa mchungaji katika nyumba ya Yethro, mkwe wake. Alipofikisha miaka themanini, Mungu alimwita kuikomboa Israeli kutoka utumwani Misri.

Musa alitimiza huduma yake kwa miaka arobaini ya mwisho, akihitimisha kila kitu akiwa na umri wa miaka mia moja na ishirini. Tukijifunza kwa Musa tutaona kwamba wito wa Mungu una hatua kadhaa za kupitia ambazo hazizuiliwi na ukubwa au udogo wa umri wako.

Mfano **wa** **Yesu**

Yesu alijua utume wake kabla hata hajaja duniani. Alipofikisha umri wa miaka kumi na miwili, tayari alikuwa na hekima na maarifa ya kuwashangaza mafarisayo na waandishi wa sheria. Hata hivyo, hakuanza huduma yake ya hadharani hadi alipofikisha miaka thelathini. Katika muda wa miaka mitatu na nusu tu, Yesu alikamilisha kazi Yake, na hadi leo ulimwengu wote umejaa vitabu na maoni juu ya maisha Yake.

Mfano **wa** **Ibrahimu**

Ibrahimu alihitimu mwito wa Mungu akiwa na umri wa miaka sabini na mitano. Alikuwa tayari mzee, lakini Mungu alimwita kuishi maisha ya imani na utiifu ambayo yamebaki kuwa mfano bora wa uhusiano kati ya waamini na Mungu. Ibrahimu na Sara, ingawa walikuwa wazee na dhaifu, walikuwa na imani ambayo imeandikwa milele katika rekodi ya Mungu.

Mfano **wa** **Yeremia**

Yeremia alihitimu mwito wa Mungu akiwa chini ya umri wa miaka ishirini. Wakati ambapo vijana wengi walikuwa wakijishughulisha na tamaa za kidunia, Yeremia alikubali mwito wa Mungu na kujitosa katika utume wa kiroho. Umri wako hauwezi kuwa kikwazo kwa kazi na mapenzi ya Mungu. Mungu anaweza kukuita ukiwa mchanga, ukiwa na nguvu nyingi, au hata ukiwa umri wa uzeeni.

Vijana wanaweza kutumia nguvu zao kwa ajili ya utume wa Mungu, na wazee wanaweza kuonyesha mfano wa maisha ya imani na kuwa nguzo za maombi na maombezi. Haijalishi umri wako, Mungu anaweza na yuko tayari kukuinua kwa ajili ya utukufu Wake.

Usijiondoe kwenye mpango wa Mungu kwa sababu ya umri wako – Mungu hutumia wote wanaomkubali.

2. HISTORIA YAKO SI KIKWAZO

1 Korintho 1:26 – 31 *Maana, ndugu zangu, angalieni mwito wenu, ya kwamba si wengi wenye hekima ya mwilini, si wengi wenye nguvu, si wengi wenye cheo walioitwa; bali Mungu aliyachagua mambo mapumbavu ya dunia awaabishe wenye hekima; tena Mungu alivichagua vitu dhaifu vya dunia ili aviaibishe vyenye nguvu; tena Mungu alivichagua vitu vinyonge vya dunia na vilivyodharauliwa, naam, vitu ambavyo haviko, ili avibatilishe vile vilivyoko; mwenye mwili awaye yote asije akajisifu mbele za Mungu. Bali kwa yeye ninyi mmepata kuwa katika Kristo Yesu, aliyefanywa kwetu hekima itokayo kwa Mungu, na haki, na utakatifu, na ukombozi; kusudi, kama ilivyoandikwa, Yeye aonaye fahari na aone fahari juu ya Bwana.*

Ingawa hukuweza kuchagua aina ya historia au mazingira uliyokuwa nayo kabla ya kuzaliwa, unaweza kubadilisha chochote usichokipenda kuhusu historia yako kupitia maombi na bidii. Historia si kikwazo cha kumtumikia Mungu kwa uaminifu. Katika kila nyanja za maisha ya binadamu, Mungu amekuwa akiwatumia watu kutimiza mapenzi Yake. Historia yako ipo jinsi ilivyo kama sehemu ya Mungu kukuandaa na kukutumia kwa ajili ya wito Wake maishani mwako.

Mifano kutoka kwenye Maandiko

- **Daudi** alikuwa mchungaji wa kondoo. Mungu alimwita kuwa kiongozi wa kundi Lake la watu wa Israeli.
- **Musa** pia alikuwa mchungaji na alipokea mwito wa Mungu kuwaongoza watu Wake kutoka utumwani Misri.
- **Amosi** alikuwa mchungaji na Mungu alimwita kuwa nabii wa kutangaza makusudi Yake kwa watu.
- **Petro** alikuwa mvuvi wa samaki, lakini aliitwa na Mungu kuwa mvuvi wa watu.
- **Mathayo** alikuwa mkusanya kodi, na alipokea mwito wa Mungu kuhubiri injili ambayo ingewasaidia watu kutoa roho zao kwa Mungu kama kodi kwa uhai wao duniani.
- **Paulo** alikuwa mwanasheria na Farisayo, lakini aliitwa kuwa mtetezi wa kweli wa injili ya Kristo.
- **Luka** alikuwa tabibu (daktari), na aliitwa na Mungu kuwaokoa watu kwa ajili ya uzima wa milele. Historia yako ya kikazi, kitaaluma, au kijamii si kikwazo kwa mwito wa Mungu maishani mwako. Badala yake, Mungu hutumia kile ulichopitia na ujuzi wako kama maandalizi ya kutimiza kusudi Lake. Usikubali historia yako iwe kisingizio cha kutoitikia mwito wa Mungu. Badala yake, muamini Mungu na ruhusu historia yako iwe daraja linalokupeleka kwenye hatima yako ya kiungu. Mwito wa Mungu unaweza kufikia kila mtu, bila kujali historia au mazingira aliyotoka.

SIFA ZA MWITO WA MUNGU

Mwito wa Mungu una sifa za kipekee zinazoufanya utofautiane na miito mingine yote. Hizi ndizo sifa kuu:

1. **Nguvu**

Mwito wa Mungu ni wenye nguvu. Unapokuja, hautaweza kutilia shaka kwa sababu unakuja kwa nguvu na msukumo mkubwa. Njia yoyote ambayo Mungu atatumia kuwasiliana mwito Wake kwako, utaona kwamba ni wa nguvu na wenye mamlaka. Sifa hii ya kipekee inafanya watu wasiweze kuupinga au kuukataa Yeremia anasema” *Utawezaje kutulia, Ikiwa BWANA amekupa agizo? Juu ya Ashkeloni na juu ya pwani, Ndipo alipoyaamuru hayo*” (Yeremia 47:7).

2. **Udhihirisho wa Kiroho (Supernatural)**

Mwito wa Mungu huambatana na matukio ya kiroho au udhihirisho usio wa kawaida, Musa aliona kichaka kinachowaka moto bila kuteketea, na kisha akasikia sauti ikizungumza naye. Gideoni aliongea na malaika uso kwa uso, malaika aliyempa ujumbe wa Mungu (Waamuzi 6:11 – 18). Mwito wa Mungu daima una udhihirisho wa ajabu ambao uacha kumbukumbu ya kudumu kwa mtu.

3. **Hauna makossa (Unmistakable)**

Huwezi kuchanganya mwito wa Mungu na kitu kingine chochote. Ingawa unaweza kuwa mchanga kiroho au kutoelewa vizuri mwanzoni Mungu anapokuita, mwito huo utaendelea kukufuatulia na kukuhamasisha mpaka utakapoelewa. Mungu alipomwita Samweli, Samweli alikua akiitika kwasababu alisikia jina lake ila hakujua sauti inayomwita inatoka kwa nani.

Mungu aliendelea kuita tena na tena mpaka Samweli alipoelewa kwamba sauti ni ya Mungu wala si ya kuhani Eli (1Samweli 3:1-18). Hiki ndicho kinachotokea kwa watu wangu wanapoitwa kufanya kazi ya Mungu, wengine huitika haraka sana na kuanza majukumu pasipo kujiandaa na kuandaliwa na hivyo makossa yanakuwa mengi wakati wa mwanzoni lakini kazi ya Mungu haina makosa kwahiyo Mungu ataendelea kumchonga pole pole mpaka pale mwitikio wa huduma unapokuwa sahihi.

4. **Hausahauliki(Unforgettable)**

Mwito wa Mungu hauwezi kusahaulika. Katika huduma yake yote, Paulo hakuwahi kuacha kuzungumza juu ya tukio la ajabu alilokutana nalo njiani kwenda Dameski. Tukio hilo lilikuwa la kipekee na lisilosahaulika maishani mwake (Matendo 9;1- 19). Mwito wa Mungu si wa kawaida, ni wa kipekee, wenye nguvu, na hauwezi kusahaulika. Ikiwa umepokea mwito wa Mungu, kumbuka kwamba ni tukio la kiroho na la muhimu sana, linalohitaji kuitikiwa kwa moyo wa utii na unyenyekevu.

KUWATAMBUA WATU WALIOITWA NA WENYE UPAKO MAALUM WA MUNGU

Watu walioteuliwa maalum na kutiwa mafuta na Mungu kwa ajili ya kazi Yake wana sifa za kipekee zinazowatofautisha na wengine. Zifuatazo ni sifa kuu:

- | 1. Ni | Adimu | Sana |
|---|-------|------|
| Watu wenye wito maalum wa Mungu ni wachache sana. Wanapojumuishwa kati ya waumini wote waliookoka, idadi yao ni ndogo sana. Katika kila kizazi, hawapatikani kwa wingi. | | |

Wakati wa huduma ya Yesu hapa duniani, alikuwa na wanafunzi wengi, lakini ni kumi na wawili tu waliitwa kuwa mitume. **Luka 6:13:** *"Hata kulipokucha aliwaita wanafunzi wake; akachagua kumi na wawili miongoni mwao, ambao pia aliwaita mitume."*

2. **WenyeNguvuSana**

Biblia inaonyesha wazi kwamba watu walioteuliwa na Mungu kwa wito maalum mara nyingi walidhihirisha nguvu za kipekee za kiroho. Ushahidi huu unapatikana kupitia maisha yao na kazi za kiungu walizotimiza, ambazo mara nyingi ziliambatana na ishara na maajabu. **Musa** aliitwa na Mungu kuwaongoza Waisraeli kutoka utumwani Misri. Mwito wake ulidhihirishwa kwa nguvu za kiroho kupitia ishara na miujiza, kama kugawa Bahari ya Shamu na kugonga mwamba ili kutoa maji. **Kutoka 14:21-22:** *"Musa akaunyosha mkono wake juu ya bahari; Bwana akaifanya bahari irudi nyuma kwa upepo wa nguvu wa mashariki usiku kucha, akageuza bahari kuwa nchi kavu, na maji yakagawanyika. Wana wa Israeli wakaenda katikati ya bahari pakavu."* **Elia** Kuleta Moto Kutoka Mbinguni, Elia alikuwa nabii wa Mungu aliyeonyesha nguvu za kipekee za kiroho kwa kushusha moto kutoka mbinguni kama uthibitisho wa wito wake wa kiungu. **1 Wafalme 18:36-38:** *"Ikawa wakati wa kusongeza sadaka ya jioni, Eliya nabii akakaribia, akasema, Ee Bwana, Mungu wa Ibrahimu, na wa Isaka, na wa Israeli, na ijulikane leo ya kuwa Wewe ndiwe Mungu katika Israeli... Ndipo moto wa Bwana ukashuka, ukateketeza sadaka ya kuteketezwa, na kuni, na mawe, na mavumbi."*

3. **Wenye** **Ufanisi** **Sana**

Watu walio na wito maalum wa Mungu ni wenye ufanisi mkubwa katika kutimiza kusudi lao. Mfano mzuri ni Filipo, ambaye mwanzoni aliteuliwa kushughulikia masuala ya chakula katika kanisa la kwanza. Baadaye Mungu alimpa wito maalum wa kuwa mwinjilisti. Alikwenda Samaria na, peke yake, aligeuza mji mzima kwa Yesu.

Matendo 8:5: *"Filipo akatelemka mpaka mji wa Samaria, akawahubiri Kristo."* Petro alihubiri kwa mara moja tu jumla ya watu elfu tatu wakamwamini kristo. Kwa ujumla kazi za watu walioitwa na Mungu huwa na matokeo makubwa ingawa si mar azote mazingira ya kuleta matokeo makubwa yanakuwa ni rahisi.

4. **Hawaishi** **Kwa** **Muda** **Mrefu**

Kwa masikitiko, baadhi ya watu hawa wenye wito maalum hawadumu kwa muda mrefu maishani, kulingana na makusudi ya Mungu. Yohana Mbatizaji, aliyekuwa mtangulizi wa Yesu, aliishi maisha mafupi. Yesu mwenyewe alimaliza huduma Yake ya miaka mitatu na nusu akiwa na umri wa miaka thelathini na tatu tu. Vivyo hivyo, wapo wapentekoste wengi ambao tumeshahudia wakifanya kazi nzuri ya Mungu lakini maisha yao duniani hayakuwa marefu wengi wameondoka wakati ambao bado ulimwengu ungewahitaji. Mungu huwatoa watu hawa maalum kulingana na mapenzi Yake mwenyewe.

Watu walio na wito maalum wa Mungu ni hazina adimu katika kila kizazi. Wanahusika katika kazi kubwa za kiroho, zinazoonyesha nguvu za kiungu na ufanisi usio wa kawaida. Hata hivyo, maisha yao yanaweza kuwa mafupi, lakini athari zao katika ufalme wa Mungu ni za kudumu. Hii inasisitiza kwamba maisha yao ni kwa ajili ya utukufu wa Mungu na si kwa mapenzi yao binafsi. Unaposikia wito wa Mungu usiogope, kubali kufanya kazi kwa zamu yako ili mwisho wa siku ushiriki sherehe ya ushindi pamoja na Bwana Yesu mbinguni.

AMINI KWAMBA MUNGU ATAKUWA PAMOJA NA WEWE KATIKA HUDUMA YA WITO WAKO.

Mungu hawaachi kamwe wale Anaowaita kwa kazi Yake. Katika maandiko, tunaona mifano mingi ya jinsi Mungu alivyowaunga mkono na kuwasaidia watu waliotii mwito Wake:

- 1. Danieli: Mungu Alifunga Vinywa vya Simba**
Danieli alipoingia katika tundu la simba kwa sababu ya uaminifu wake kwa Mungu, Bwana alifunga vinywa vya simba hao na kumlinda. Adui zake walipowekwa katika tundu hilo hilo, simba hao waliwatafuna mara moja.
Danieli 6:22-24: *"Mungu wangu alituma malaika wake, akafunga vinywa vya simba, nao hawakunidhuru; kwa kuwa mbele zake mimi nalionekana kuwa sina hatia... Na wale watu waliomshitaki Danieli wakatupwa katika tundu la simba; simba wakawashambulia na kuwavunja mifupa yao yote."*

2. **Daudi: Mungu Alimsaidia Kumshinda Goliathi**
Daudi, kijana mchanga asiye na uzoefu wa vita, alimshinda Goliathi kwa msaada wa Mungu.
3. Ushindi wake ulikuwa ushuhuda wa nguvu ya Mungu kwa wale Anaowaita. **1 Samweli 17:45-47:** *"Daudi akamwambia Mfilisti, Wewe unanijia mimi na upanga, na mkuki, na tandari; bali mimi ninakujia wewe kwa jina la Bwana wa majeshi... Vita ni vya Bwana, naye atakutia nguvu wakati wa mapambano yako.*
3. **Musa: Mungu Aligawanya Bahari ya Shamu**
Mungu alimwita Musa kuwaongoza Waisraeli kutoka Misri, na alidhihirisha uwezo Wake wa kiungu kwa kugawanya Bahari ya Shamu, akawapa Waisraeli njia ya kupita. **Kutoka 14:21-22:** *"Musa akaunyosha mkono wake juu ya bahari; Bwana akaifanya bahari irudi nyuma kwa upepo wa nguvu wa mashariki usiku kucha... na maji yakagawanyika."*

Mungu Atakupa Ushindi

Kwa kuwa ni Mungu aliyekuita hakuna haja ya kuogopa kubali mwito wa Mungu. Kama alivyomhimarisha Danieli, Daudi, na Musa, atakufanikisha katika kazi Yake. Usiruhusu hofu au kutojiamini kukuzuie. Mungu ni mkuu na anaweza kufanya zaidi ya unavyoweza kufikiri. **Isaya 41:10:** *"Usiogope, maana mimi ni pamoja nawe; usifadhaike, maana mimi ni Mungu wako; nitakutia nguvu, naam, nitakusaidia; naam, nitakushika kwa mkono wa kuume wa haki yangu."*

‘Ikiwa unataka kutimiza hatima yako na kuukubali mwito wa Mungu juu ya maisha yako, andaa moyo wako kutimiza kusudi hilo kwa uaminifu na utiifu’.

GALATIA 6:9

Tena tusichoke katika kutenda mema; maana tutavuna kwa wakati wake, tusipozimia roho.

AMINA.

3. AKILI ZA KIROHO (SPIRITUAL INTELLIGENCE)

Mara nyingi sana Neno la Mungu na mahubiri ya watumishi wa Mungu mbali mbali yanafundisha kuhusu kumtegemea Mungu, kumwamini Mungu na Kumwomba Mungu kwa kila jambo. Hayo ni mafundisho sahihi kabisa kwa kila mkristo kwani maisha yetu yote yanapaswa kuwa chini ya uangalizi wa Mungu. Hebu tuangalie kwa upande mwingine neno la Mungu linasemaje kuhusu akili, **Mithali 3:5-6** inasema *“Mtumaini Bwana kwa moyo wako wote, Wala usizitegemee akili zako mwenyewe; katika njia zako zote mkiri yeye, Naye atayanyosha mapito yako”*. Neno la Mungu linasema **“usizitegemee akili”** lakini haimaanishi kwamba usizitumie akili. Kila mtu ameumbwa kuwa na akili, matumizi mazuri ya akili yanaweza kuleta matokeo mazuri na matumizi mabaya ya akili yanaweza kuleta matokeo mabaya. Hivyo, kila mkristo anapaswa kuwa na akili, ndiyo! Ninamaanisha akili za kiroho. **Nini maana ya akili za kiroho?**

Maana ya Akili za Kiroho

Akili za kiroho ni uwezo wa kuelewa mambo ya kiroho, hekima ya Mungu, na mapenzi yake kwa njia inayozidi akili ya kibinadamu. Akili hizi haziwezi kufikiwa kwa njia za kawaida kama elimu ya kidunia; badala yake, hutolewa na Roho Mtakatifu kwa mtu aliyemwamini Yesu Kristo. Akili ya kiroho ndio chanzo cha hekima na maarifa kwenye biashara, elimu, kazi, fani, ndoa, huduma na miingiliano mbali mbali ya kijamii.

Akili ya kiroho itakupa majibu na ufumbuzi wa mambo ambayo wengine wameshindwa, tujifunze kwa Danieli ambaye alipata uwezo wa kutafsiri ndoto ya mfalme Nebukadneza wakati waganga, wachawi, wenye elimu na hekima ya kila namna wameshindwa, neno la Mungu linasema *“Basi Danieli akaingia, akamwomba mfalme ampe muda, kisha yeye atamwonyesha mfalme tafsiri ile. Ndipo danieli akaenda nyumbani kwake, akawapasha habari kina Hanania, na Mishaeli na Azaria wenzake; ili waombe rehema kwa Mungu wa Mbinguni kwa habari ya siri hiyo, ili kwamba Danieli na wenzake wasiangamizwe pamoja na wenye hekima wa Babeli; Ndipo Danieli alipofunuliwa siri hiyo katika njozi ya usiku, Basi Danieli akamhimidi Mungu wa mbinguni (Danieli 2:16 -20).*

Danieli alipoingia kwa mfalme hakukurupuka kuongea mambo mengi badala yake aliomba Muda, hii ni akili ya hali ya juu ambayo Mungu alimpa Danieli kwani hakuwa na maneno mengi mbele za mfalme, alitafuta kwanza utulivu wa kuomba ili apate hekima sahihi ya kuzungumza na mfalme kuhusu ndoto aliyoota mtu mwenye akili za kiroho si mtu wa kukurupuka na kuzungumza mambo mengi hasa yasiyotokana na hekima ya Mungu.

Maana nyingine ya akili za Kiroho ni uwezo wa kujua wakati sahihi wa kuchukua hatua Fulani kwa kuongozwa na Roho wa Mungu badala ya kuongozwa na hisia au mazingira. Danieli hakuruhusu tamko kali la mfalme la kuuawa wenye hekima wote wa Babeli liwe shinikizo kwake kutoa majibu ya haraka bali aliongozwa na Roho wa Mungu kutaka muda wa kuomba kwanza pamoja na wenzake ili atakayo yasema kwa mfalme yawe yametoka kwa Mungu.

Ilikuwa siku ya Jumamosi jioni, nikiwa nimechoka baada ya shughuli nyingi za wiki nzima. Nilipokea simu kutoka kwa rafiki yangu, tuliyekuwa tunaaminiana sana aliniomba nimkopeshe pesa kwa dharura. Alidai kuwa mama yake alikuwa mgonjwa na alihitaji hela za matibabu haraka. Bila kufikiria sana, nilichukua kiasi cha pesa ya biashara na kumtumia.

Baada ya siku mbili, nilipompigia simu kuuliza hali ya mama yake, alijibu kwa mkato na kunikatia simu ghafla. Nilihisi kuna jambo si sawa. Nilipomfuatilia kwa marafiki wengine, niligundua kuwa hakuwa na mgonjwa yeyote nyumbani kwao—alikuwa ametumia pesa hizo kwa anasa na starehe. Nilijawa na hasira, huzuni, na majuto makubwa.

Nilijiambia, "Kama ningepata muda wa kufikiri kabla ya kufanya uamuzi huu, nisingefanya makossa ya kutuma pesa"

Majuto hayakurudisha pesa zangu, lakini yalinifundisha somo kubwa: **kamwe usifanye uamuzi wa haraka bila kutafakari kwa kina.** Tafuta kuongozwa na Roho wa Mungu katika matumizi yako ya fedha, katika maamuzi yako, katika elimu, yako, katika uongozi, unapojizuia kukurupuka na kusubiri uongozi wa Mungu tunasema una akili za Kiroho. Bila shaka mpaka hapa somo hili limeanza kueleweka!...

Taifa la Israeli na akili za kiroho.

Israeli mara nyingi imechukuliwa kuwa taifa lenye akili sana, hasa kutokana na historia yake, mafanikio yake ya kisayansi, na sifa yake ya kipekee katika Biblia. Hii inaweza kuhusishwa na sifa kuu zifuatazo;

1. Ni taifa teule la Mungu (Sifa ya Kiroho)

Katika Biblia, taifa la Israeli linatajwa kama "watu wa Mungu waliochaguliwa" (Kumbukumbu la Torati 7:6). Mungu aliwapa hekima ya kipekee kupitia sheria, unabii, na maagizo.

Hii iliwafanya wawe na nafasi ya kipekee kati ya mataifa. Sulemani, mfalme wa Israeli, alitambuliwa kama mtu mwenye hekima ya kipekee, ambayo iliwakilisha baraka ya Mungu kwa taifa hilo. **Katika mazingira mengine neno hekima linaweza kutumika kufafanua akili**, Israeli ni taifa teule la Mungu, **kila mkristo ni taifa teule la Mungu maarifa na akili za Kiroho zinapatikana kupitia sheria (Neno la Mungu), unabii kutoka kwa Mungu, na maagizo ya Mungu**, Mungu anamwambia Yohana *'kitabu hiki cha torati kisiondoke kinywani mwako, bali yatafakari maneno yake mchana na usiku, upate kuangalia kutenda sawasawa na maneno yote yaliyoandikwa humo; maana ndipo utakapoifanikisha njia yako, kisha ndipo utakapositawi sana''* (Yohana 1: 8).

2. Elimu na Maarifa

Katika historia ya kisasa, Waisraeli wana kiwango cha juu sana cha elimu. Taifa la Israeli limewekeza sana katika elimu, na watu wake wanajulikana kwa viwango vya juu vya kusoma, utafiti, na uvumbuzi. Israeli ni moja ya mataifa yenye idadi kubwa zaidi ya washindi wa Tuzo ya Nobel ikilinganishwa na idadi ya watu wake, hasa katika nyanja za sayansi, uchumi, na fasihi.

(Tuzo za Nobel ni tuzo za kimataifa zinazotolewa kila mwaka kwa watu binafsi au mashirika ambayo yamefanya mchango mkubwa wa pekee kwa binadamu katika nyanja mbalimbali kama fizikia, kemia, tiba na fiziolojia, Amani, teknolojia. Wana uwezo mkubwa kwa kuwa Mungu amewawezesha kufikia viwango vya juu vya akili itokanayo na maarifa kutoka mbinguni (**Isaya 60: 11 – 12**).

3. Ubunifu na Teknolojia

Israeli ni maarufu kwa kuwa "nchi ya kuanzisha biashara" (Start-Up Nation). Nchi hii imekuwa na uvumbuzi mwingi wa kiteknolojia, ikiwa ni pamoja na uvumbuzi katika sekta za matibabu, kilimo, usalama wa mtandao (cybersecurity), na teknolojia ya hali ya juu (high-tech). Mfano wa akili zao za vitendo ni maendeleo kama drip irrigation, ambayo inasaidia kilimo katika mazingira yenye ukame.

4. Ustahimilivu wa Kihistoria

Historia ya taifa la Israeli imejaa changamoto kubwa, ikiwa ni pamoja na ukoloni, mateso, na vita. Hata hivyo, Waisraeli wameonyesha ustahimilivu wa kipekee na uwezo wa kubadilika. Mkakati ya kurudi kwa taifa lao baada ya zaidi ya miaka 2,000 ya kutawanyika ulimwenguni (Diaspora) na kufanikisha taifa lenye nguvu mwaka 1948 ni mfano wa akili na uwezo wao wa kinkakati. ZABURI 105:37 *‘Kisha akawatoa watu wa Israeli nchini wakiwa na fedha na dhahabu; wala hakuna hata mmoja wao aliyejikwaa’* (BHN).

Je, Ni Taifa Lenye Akili Sana?

Jibu ni ndiyo, Israeli kwa viwango vingi inaweza kuonekana kama taifa lenye akili. Lakini akili hii ni matokeo ya mchanganyiko wa vipengele vya kiroho, kitamaduni, kielimu, na kihistoria. Mafanikio yao si ajali, bali ni matokeo ya kazi, nidhamu, na maono makubwa. Pia, ni wazi kwamba baraka za Mungu ndiyo chanzo kikuu cha hekima na mafanikio yao.

Ikiwa umekubali na kuamini kwamba wewe ni Mwana wa Mungu, Baraka za Israeli ni zako pia, neno la Mungu linasema *“Bali ninyi ni mzao mteule, ukuhani wa kifalme, taifa takatifu, watu wa milki ya Mungu, mpate kuzitangaza fadhili zake yeye aliyewaita mtoke gizani mkaingie katika nuru yake ya ajabu; ninyi mliokuwa kwanza si taifa, bali sasa ni taifa la Mungu; mliokuwa hamkupata rehema, bali sasa mmepata rehema”* (1Petro 2:9-10).

Hii ni Dhahiri kwamba Mungu ametupa kila kitu, akili, nguvu, uwezo wa kufanya chochote kama wana wa kifalme. Tuna kila sababu ya kutumia akili zetu za Kiroho kufanya mageuzi makubwa katika Nyanja zote za maisha.

YOHANA 14:26

“Lakini huyo msaidizi, huyo Roho Mtakatifu, ambaye Baba atampeleka kwa jina langu, atawafundisha yote, na kuwakumbusha yote niliyowaambia.”

Roho mtakatifu yupo kwetu, yupo ndani yetu, yeye ndiye chanzo cha maarifa, ujuzi na akili yote.

Lolote unalotaka kulitimiza na haujui jinsi ya kufanya mwombe Roho mtakatifu, Yesu amesema yeye atafundisha na kukumbusha yote tafsiri yake nyingine ni kwamba atatupa Akili. **Roho mtakatifu ndiyo chanzo cha akili za Kiroho, kama unajiona mtupu hauna nguvu za Roho Mtakatifu chukua hatua za kuomba ujazo wa Roho Mtakatifu, Usikubali kubaki mkavu!**

SURA YA SITA.

1. BWANA, NISAIDIE KUSHINDA VISHAWISHI VYA UASHERATI, FEDHA NA UMAARUFU.

*Zamani nilikua nadhani kwamba mtu akiokoka anakuwa mkamilifu na mnyoofu asimilia mia moja. Ndio inawezekana kuwa hivyo lakini si jambo rahisi, kutunza utakatifu kunahitaji jitihada za dhati kwa kujitoa kikamilifu kumpinga shetani. **Wokovu ni mwanzo wa safari, siyo mwisho wake.** Kuwa mtakatifu si jambo rahisi, lakini Mungu ametupa silaha za kupambana. Biblia inasema, 'Mpingeni shetani, naye atawakimbia' (**Yakobo 4:7**)*

Vishawishi vya uasherati, fedha na umaarufu ni jambo linalowapata watu wote na vinaweza kuleta madhara makubwa endapo hatutavikwepa. Mungu ameagiza utakatifu, **Mambo ya Walawi 20:26** Nanyi mtakuwa watakatifu kwangu mimi; kwa kuwa mimi BWANA ni mtakatifu nami nimewatenga ninyi na mataifa, ili kwamba mwe wangu. Hii ina maana kwamba kila mkristo ametengwa na Mungu kwa kusudi maalumu linalompa Mungu utukufu, ukiwa kama mwimbaji wa nyimbo za injili, mwombaji, mtoaji, mchungaji, shemasi, mzee wa kanisa na nafasi nyingine, ni vyema kutambua kwamba huduma yako ina jukumu la kumpa Mungu utukufu.

Vishawishi vya uasherati, umaarufu, na fedha ni changamoto kubwa kwa watumishi wa Mungu, na mara nyingi huathiri huduma zao. Vishawishi vya uasherati, umaarufu, na fedha vinaweza kuitwa maadui wakubwa wa huduma kwa sababu vinaathiri moja kwa moja misingi ya kiroho, maadili, na ufanisi wa mtumishi wa Mungu.

Kumbuka Neno la Mungu linasema “*iko njia ione kanayo kuwa sawa machoni pa mtu, Lakini mwisho wake ni njia za mauti (Mithali 14:12)*”. Je, katika huduma yako au maisha yako ya wokovu haukutani na jaribu la uasherati, fedha na kutaka umaarufu? kumbuka, **tatizo si kujaribiwa bali tatizo linaweza kuwa ni kwa namna gani unaitikia katika jaribu lako.**

Katika sura hii nitaeleza jinsi ambavyo vishawahishi hivi ni adui mkubwa wa maisha yetu ya wokovu, na habari njema ni kwamba tutajifunza jinsi ya kukabiliana navyo kwa kufuata misingi ya neno la Mungu na mafundisho ya Yesu Kristo.

Vishawishi vya Uasherati

Uasherati ni tendo la kingono linalofanywa nje ya ndoa au kati ya mwanaume na mwanamke ambao si wanandoa. Kwa maana pana, uasherati unahusisha kila aina ya tabia au mawazo na matendo ya kingono ambayo hayafuati mpango mtakatifu wa Mungu. Uasherati unaweza kuvuruga maisha ya kiroho ya mtumishi wa Mungu na huduma yake kwa Kupoteza Ushuhuda, Wakati mtumishi wa Mungu anapoanguka katika uasherati, watu hupoteza imani naye, pia uasherati mara nyingi hupelekea ndoa kuvunjika, na kusababisha migogoro inayoweza kuathiri huduma, Kwa kuongezea, dhambi ya uasherati hupelekea mtu kujitenga na Mungu, Dhambi ya uasherati huleta mgawanyiko wa kiroho, na hivyo kumzuia mtumishi kupata uongozi wa Mungu. Wengi hujikuta wakihisi aibu na majuto, hali inayoweza kuwalemaza kiakili na kiroho. Kiujumla, unapofanyika, uasherati huvunja mpango wa Mungu wa utakatifu na usafi wa kimwili na kiroho **(1 Wakorintho 6:18-20)**

Umaarufu

Umaarufu ni hali ya mtu kujulikana sana na kufahamika kwa watu wengi kutokana na sifa fulani, matendo, mafanikio, au nafasi aliyopo. Kibiblia, Umaarufu unaweza kuwa neema kutoka kwa Mungu kwa lengo la kutukuzwa jina lake kupitia huduma ya mtu, kama ilivyokuwa kwa Mfalme Daudi, Modekai, Yohana mbatizaji, Elia, Elisha, Samweli, Petro, Paulo na wengine wengi. Hata hivyo, inaweza pia kuwa jaribu kubwa kwa wale wanaotanguliza sifa binafsi badala ya utukufu wa Mungu.

Umaarufu unapopokelewa vibaya pasipo unyenyekevu na kujishusha ili kumpa Mungu utukufu huwa ni mtego mbaya kwa mtumishi wa Mungu, Kugeuza Huduma kuwa Jukwaa la Kijamii badala ya kumtumikia Mungu, mtumishi huanza kutumikia umaarufu wake na kugeuza huduma kuwa njia ya kutafuta heshima ya wanadamu. Umaarufu huleta Kiburi na Kujisifu, huongeza hatari ya mtumishi kujiona kuwa wa pekee, jambo linalosababisha kudhoofisha ushirikiano wake na Mungu na wenzake. *Mtumishi aliyenaswa na umaarufu mara nyingi hupunguza nguvu ya ujumbe wa msalaba kwa hofu ya kupoteza wafuasi.* **Yesu Kristo** alijulikana sana kwa miujiza, mafundisho, na upendo wake. Umaarufu wake ulitumika kwa ajili ya kutangaza injili na kuwaleta watu kwa Mungu (Mathayo 4:24). **Nebukadneza:** Alikuwa maarufu kwa nguvu na utawala, lakini alipotanguliza kiburi, Mungu alimnyenyekesha (**Danieli 4:28-37**).

Tamaa ya Fedha

Ni adui mkubwa sana wa huduma ya Kiroho kwa sababu tamaa ya fedha husababisha kuondoa msisitizo wa mambo ya kiroho na kutanguliza mafanikio ya kidunia, na kufanya huduma kupoteza uaminifu wake. Tamaa ya fedha inaua huduma kwa Kuweka Mambo ya Kidunia Mbele kuliko ya Mungu, Watumishi wanaokumbatia tamaa ya fedha hupunguza juhudi za kiroho na badala yake kujikita kwenye kutafuta mali neno la Mungu linasema katika **1 Timotheo 6:10**, *"Kwa maana tamaa ya fedha ni chanzo cha maovu ya kila aina. Watu wengine, kwa kujitahidi kupata fedha, wamepotoka kutoka imani na kuumiza maisha yao kwa huzuni nyingi."* (Tafsiri ya Kiswahili cha Kisasa). Hili andiko linakumbusha kuwa tamaa ya fedha siyo tu dhambi, bali pia husababisha maovu mengine kama ufisadi, wizi, udanganyifu, na hata kupoteza ushirika wa kiroho na Mungu. Linatoa onyo kwa waamini kutanguliza mambo ya kiroho badala ya kufuatilia mali za dunia kwa tamaa.

Vishawishi hivi vitatu ni maadui wakubwa kwa sababu vinashambulia msingi wa huduma ya kweli. Uasherati huzuia utakatifu wa maisha ya mtumishi wa Mungu, Umaarufu hufisha lengo la huduma (kumtumikia Mungu). Tamaa ya Fedha husababisha huduma ya mtumishi kukosa nguvu za kiroho za kuokoa na kuponya roho za watu badala yake inalenga kutafuta faida binafsi. *Mtumishi wa Mungu anapaswa kujiweka mbali na vishawishi hivi kwa kujijengea nidhamu binafsi, kuimarisha maisha ya maombi, na kujifunza Neno la Mungu,*

Mtumishi Wa Mungu Anayekutana Na Vishawishi Hivi Vitatu Anatakiwa Kufanya Nini Kama Njia Ya Kulinda Utakatifu?

Mtumishi wa Mungu anayekutana na vishawishi vya **uasherati, umaarufu, na tamaa ya fedha** anapaswa kufuata njia za kiroho za kujiponya, kama inavyofundishwa na Biblia.

1. Kukimbia Dhambi na Vishawishi

Mtumishi wa Mungu anatakiwa kuwa na ujasiri wa kuepuka mazingira na tabia zinazochoea vishawishi hivi. Kukimbia ni hatua ya kwanza ya kuokoa utakatifu wako. *"Kimbia zinaa. Dhambi nyingine zote anazofanya mwanadamu ziko nje ya mwili wake; lakini yeye afanyaye zinaa hutenda dhambi dhidi ya mwili wake mwenyewe"* (1 Wakorintho 6:18). **Kwa Tamaa ya Fedha:** Mtume Paulo anamwambia Timotheo: *"Lakini wewe, mtu wa Mungu, yakimbie mambo haya; tafuta haki, utauwa, imani, upendo, subira, na upole"* (1 Timotheo 6:11). Ondoka katika mazingira yanayochochea vishawishi na kataa kushiriki katika mazungumzo, mazoea, au biashara zinazopingana na maadili ya kiroho.

2. Kujitakasa kwa Neno la Mungu

- Neno la Mungu lina nguvu ya kusafisha na kulinda moyo wa mtu dhidi ya tamaa za mwili na ulimwengu. Kusoma na kutafakari Neno la Mungu kila siku husaidia kuimarisha usafi wa kiroho. **Yesu Alisema:** *"Sasa mmekuwa safi kwa sababu ya neno nililowaambia"* (Yohana 15:3).

- Tenga muda wa kila siku wa kujifunza Biblia, kutafakari mafundisho yake, na kuyaweka katika matendo. Daudi katika zaburi anasema *Nimeweka neno lako moyoni mwangu, nisije nikakutenda dhambi*" (Zaburi 119:11).

3. Omba Maombi ya Kujazwa na Roho Mtakatifu

Maombi yanamweka mtumishi wa Mungu katika ushirika wa karibu na Mungu. Roho Mtakatifu hutoa nguvu za kushinda majaribu na tamaa. Neno la Mungu linasema *"Kesheni mwombe, msije mkaingia majaribuni; roho i radhi, lakini mwili ni dhaifu"* (Mathayo 26:41). Omba mara kwa mara kwa ajili ya nguvu za kushinda majaribu, na mwombe Roho Mtakatifu aendelee kujaza maisha yako.

4. Weka Mambo ya Mbinguni Mbele.

Mtumishi wa Mungu anatakiwa kutanguliza lengo la kumtumikia Mungu na kutafuta utukufu wa Mungu, badala ya kutafuta sifa za wanadamu au mali za dunia kama Bwana Yesu Alivyosema: *"Msijikusanyie hazina duniani, ambako nondo na kutu huharibu, na ambako wezi huvunja na kuiba; bali jikusanyieni hazina mbinguni"* (Mathayo 6:19-20). Kumbuka kwamba mali na umaarufu wa dunia ni wa muda tu, lakini thawabu ya mbinguni ni ya milele. Mtume Paulo katika (Warumi 8:6) *"Kwa kuwa mawazo ya mwili ni mauti, lakini mawazo ya roho ni uzima na amani"*

5. Dumu katika Unyenyekevu

Umaarufu unaweza kumshawishi mtu kuwa na kiburi. Mtumishi wa Mungu anatakiwa kudumu katika unyenyekevu kwa kukumbuka kuwa utukufu wote ni wa Mungu.

Tambua kwamba kila mafanikio na nafasi ni neema ya Mungu, na kila wakati rudisha utukufu kwa Mungu **Mithali** inasema: "*Kiburi hutangulia uangamivu, na roho ya kujikweza hutangulia maanguko*" (**Mithali 16:18**).

Kwa kuchukua hatua hizi, kama mtumishi wa Mungu utaweza kushinda vishawishi na kudumu katika wito wako kwa utukufu wa Mungu. Kumbuka kuomba toba ikiwa mara kadhaa umeanguka katika vishawishi hivi, Mungu yupo tayari kukusamehe ikiwa utageuka na kumfuata yeye kikamilifu. **Damu ya Yesu ikufunike unapochukua hatua mpya ya Kiroho ninaamini Mungu atakuwa pamoja na wewe. AMINA.**

2. TUMIA TUNDA LA ROHO KUIMARISHA MAHUSIANO YAKO.

Katika **Wagalatia 5:22-23**, Mtume Paulo anaelezea tunda la Roho kama matokeo ya kazi ya Roho Mtakatifu ndani ya maisha ya Mkristo. Tunda hili lina sehemu tisa: **Upendo, Furaha, Amani, Uvumilivu, Utu wema, fadhili, Uaminifu, Upole, na Kiasi**. Katika sura hii, tutajadili jinsi kila kipengele cha tunda hili linaweza kutumika kuimarisha mahusiano yetu kama wakristo, wafanya kazi wa ofisi moja, wanandoa, wazazi na watoto, vijana, wazee wanawake, wanaume na makundi yote.

Mahusiano ni hali ya ukaribu unaojengwa kati ya watu wawili au zaidi kwa misingi ya mawasiliano, upendo, heshima, ushirikiano na uaminifu. Katika muktadha wa Kikristo, mahusiano yanaweza kufasiriwa kama zawadi kutoka kwa Mungu iliyokusudiwa kuonyesha upendo Wake kwa wanadamu na kutufundisha jinsi ya kuishi kwa mshikamano na watu wengine. Mahusiano yanaweza kuwa ya aina mbalimbali, ikiwa ni pamoja na Mahusiano ya kifamilia Kati ya wazazi na watoto, au kati ya ndugu, Mahusiano ya ndoa, Mahusiano ya urafiki ambayo yanajengwa kwa msingi wa heshima, msaada, na uaminifu wa pande zote, Mahusiano ya kijamii kati ya mtu na jamii kwa ujumla.

Katika Biblia, mahusiano bora yanahusisha upendo wa kweli (**1Wakorintho 13:4-7**), msamaha (**Mathayo 6:14-15**), na kutanguliza wengine mbele yetu wenyewe (**Wafilipi 2:3-4**). Yesu Kristo ni mfano bora wa jinsi ya kuendeleza mahusiano yenye maana kwa kuonyesha upendo wa kujitoa kwa ajili ya wengine (**Mathayo 3:16**).

1. Upendo

Upendo ni msingi wa mahusiano yote mazuri. Katika **1Wakorintho 13:4-7**, Paulo anaelezea upendo kama wenye subira, wenye fadhili, usio na wivu, wala kiburi. Upendo ni msingi wa mahusiano yote yenye maana, na ni sifa ya Mungu inayojidhihirisha kwa ukamilifu katika uumbaji Wake. Katika Biblia, upendo si tu hisia au hali ya moyo bali ni tendo la kujitoa, lenye lengo la kujenga na kusaidia wengine. Biblia inatufundisha aina za upendo ambazo zinaweza kusaidia kuimarisha mahusiano yetu:

- ❖ **Agape;** Huu ni upendo wa kiroho na wa kujitoa bila masharti. Ni upendo wa Mungu kwa wanadamu na unaonyesha uzuri wa upendo wa Mungu kwa viumbe vyake. Mfano: "Kwa maana jinsi hii Mungu aliupenda ulimwengu, hata akamtoa Mwana wake wa pekee..." (**Yohana 3:16**).
- ❖ **Phileo;** Upendo wa kirafiki unaojengwa kati ya watu kupitia urafiki wa kweli, heshima, na msaada wa dhati. Mfano: Upendo kati ya Daudi na Yonathani (**1Samweli 18:1-3**).
- ❖ **Eros;** Upendo wa kimapenzi na kihisia, uliokusudiwa kuonyeshwa ndani ya ndoa kama zawadi ya Mungu. Mfano: Kitabu cha Wimbo wa ulio bora kinaelezea kwa undani upendo wa aina hii.
- ❖ **Torge;** Huu ni upendo wa kifamilia, unaojidhihirisha kati ya wazazi na watoto, au kati ya ndugu wa familia moja. Mfano: Upendo wa Nuhu kwa familia yake wakati wa gharika (**Mwanzo 7**).
Katika maisha ya Kikristo, mara nyingi tunakutana na changamoto za mahusiano na watu wanaotuumiza kwa njia ya maneno, matendo, au mitazamo hasi kama majungu, wivu, lawama, au chuki.

Ingawa inaweza kuwa vigumu lakini tunahimizwa kuonyesha upendo kama sehemu ya tunda la Roho Mtakatifu. Hii ni kwa sababu upendo wa kweli hauzitegemei hisia pekee bali ni uamuzi wa kiroho wa kutii amri ya Kristo. Biblia inatufundisha kwamba Mungu anatupenda hata tunapokosea. Upendo Wake haujabadilika na haufungwi na tabia zetu. "Lakini Mungu amethibitisha pendo lake kwa ajili yetu kwa kuwa Kristo alikufa kwa ajili yetu tulipokuwa tungali wenye dhambi" (**Warumi 5:8**).

Kumpenda mtu ambaye amekuumiza si rahisi, lakini ni njia ya kuonyesha imani na utiifu wetu kwa Mungu. Tunapojifunza kutoka kwa Yesu na kumtegemea Roho Mtakatifu, tunaweza kuonyesha upendo wa kweli hata katika mazingira magumu zaidi. Hatua hizi hazihitaji nguvu zetu pekee bali neema ya Mungu inayofanya kazi ndani yetu. "**Nayaweza mambo yote katika yeye anitiaye nguvu**" (**Wafilipi 4:13**).

2. Furaha

Furaha inayotokana na Roho Mtakatifu haitegemei hali ya nje bali ni hali ya moyo. Katika mahusiano, Shiriki furaha na wapendwa wako kwa kuwa na muda mzuri wa pamoja. *Tazama, jinsi ilivyo vema, na kupendeza, Ndugu wakae pamoja, kwa umoja. Ni kama mafuta mazuri kichwani, Yashukayo ndevuni, ndevu za Haruni, Yashukayo mpaka upindo wa mavazi yake. Kama umande wa Hermoni ushukao milimani pa Sayuni. Maana ndiko BWANA alikoamuru baraka, Naam, uzima hata milele.* (**ZABURI 133: 1-3**). Jenga mazingira yanayofurahisha kwa kucheka pamoja na kusherehekea mafanikio ya kila mmoja. Kuwa chanzo cha tabasamu na matumaini kwa wengine.

Furaha kama tunda la Roho hutufanya kuwa imara hata tunapokutana na majaribu. **Yakobo 1:2-3** inatufundisha kwamba Furaha **si kupuuza maumivu** badala yake, ni kuelewa kwamba majaribu ni fursa ya kukua kiroho na kumtegemea Mungu zaidi.

3. Amani

Amani ya Mungu hutuwezesha kuishi kwa utulivu na wengine. **Mathayo 5:9** inasema, *“Heri wapatanishi, kwa maana wataitwa wana wa Mungu.* Epuka ugomvi wa mara kwa mara na badala yake tafakari kuhusu upendo, ushirikiano na haki. Jifunze kuwa muelewa wa hali za wengine na sababu za kuwa jinsi walivyo, fikiri kwamba wewe unaweza kuwa sababu ya mtu kujipenda na kuyapenda maisha. Furaha kama tunda la Roho ni zawadi kutoka kwa Mungu inayotufanya kuwa imara, hata tunapokabiliana na changamoto. Ni alama ya imani thabiti na ushuhuda wa nguvu za Mungu zinazofanya kazi ndani yetu.

Wakristo tunahimizwa kuonyesha furaha hii ili kuleta nuru ya Kristo kwa ulimwengu unaohitaji tumaini na amani. ***"Furahini katika Bwana sikuzote. Tena nasema, Furahini!"*** (Wafilipi 4:4).

4. Uvumilivu

Uvumilivu ni uwezo wa kustahimili changamoto bila kuvunjika moyo. Elewa kwamba kila mtu ana mapungufu, na jifunze kuvumilia na kusaidiana. Tambua kuwa watu wengine wanahitaji uvumilivu wako tu ili wapige hatua Fulani. Kuwa mvumilivu unapokabiliana na tabia ngumu za watoto au ndugu zako. Usikate tamaa na watu badala yake, waombee na uwatie moyo.

Warumi 5:3-4 inasisitiza Zaidi kuhusu uvumilivu: *"Wala si hivyo tu, bali twajivuna katika dhiki pia, tukijua ya kuwa dhiki huleta saburi; na saburi hufanya uthabiti wa moyo, na uthabiti wa moyo hufanya tumaini."*

5. Utu wema

Utu wema ni tabia ya kuonyesha huruma, upendo, na msaada kwa wengine bila kujali hali zao. Ni matokeo ya kazi ya Roho Mtakatifu ndani ya mtu, inayodhihirika kupitia matendo ya huruma na fadhili. Utu wema ni tabia ya kimungu ambayo inajidhihirisha kwa kuwa na moyo wa huruma kushughulika na mahitaji ya wengine kwa upendo wa dhati, kuweka maslahi ya wengine mbele kwa kuwa tayari kuwasaidia wengine bila kutarajia malipo au faida binafsi, kujitahidi kuleta baraka kwa wengine, kufanya mema kwa wote, hata wale wanaotutendea mabaya.

Utu Wema Ni Kioo cha Yesu Ndani Yetu

Yesu Kristo ni mfano wa kilele wa utu wema. Katika maisha yake ya duniani, alionyesha huruma, alitenda mema, na aliwapenda hata wale waliomchukia. Alisema katika **Yohana 13:34-35**:

"Amri mpya nawapa: Pendaneni kama nilivyowapenda ninyi, vivyo hivyo nanyi mpendane. Kwa hili watu wote watajua ya kuwa ninyi mmekuwa wanafunzi wangu, mkiwa na upendo ninyi kwa ninyi."

Tunapofanya mema kwa wengine, tunadhihirisha kwa vitendo upendo wa Yesu ulioko ndani yetu. Hii huwafanya watu kutambua kwamba sisi ni wafuasi wake wa kweli.

6. Fadhili

Fadhili ni tabia ya kuonyesha upole, huruma, na msaada wa dhati kwa wengine bila kujali hali zao. Ni sehemu ya tunda la Roho inayodhihirisha upendo wa Mungu kwa vitendo vya matendo mema na huruma kwa watu wote. Fadhili huonyesha kazi ya Roho Mtakatifu ndani ya Mkristo kwa kuwafanya wawe wachangamfu, wanyenyekevu, na tayari kuwahudumia wengine kwa upendo wa kweli. **(Luka 10:30-37)** Yesu alisimulia mfano wa Msamaria Mwema kama kielelezo cha fadhili. Katika hadithi hii, Msamaria alimwona mtu aliyejeruhiwa barabarani na akachukua hatua ya kumsaidia, wakati wengine walimpita bila kujali. Aliosha majeraha yake, akamtunza, na hata akamlipia malazi yake. Msamaria hakuangalia kabila, dini, au tofauti za kijamii. Aliamua kuonyesha fadhili kwa vitendo, akiwakilisha upendo wa Mungu kwa jirani.

7. Uaminifu

Uaminifu ni tabia ya kuwa wa mkweli, mwaminifu, na mwenye kutegemewa katika maneno na matendo. Ni sifa ya msingi kwa Wakristo inayodhihirisha uadilifu wa ndani na utii kwa Mungu. Uaminifu ni sehemu ya tunda la Roho kama inavyotajwa katika **Wagalatia 5:22-23**. Uaminifu unahusisha si tu ukweli kwa Mungu, bali pia kwa wengine, na hata kwa sisi wenyewe. Ni msingi wa mahusiano imara na hufanya imani kati ya watu ikue na kudumu. Mahusiano yoyote yenye afya yanategemea uaminifu. Ikiwa watu wanajua kwamba wanaweza kukuamini, wanahisi salama na wanajenga uhusiano wa karibu zaidi. Katika ndoa, uaminifu huimarisha mshikamano na kuzuia mgawanyiko. Katika familia, huchochea upendo na mshikamano wa kizazi hadi kizazi. Katika jamii, huimarisha mshikamano wa kijamii na mshikamano wa kijumuiya.

Uaminifu ni msingi wa kila mahusiano yenye nguvu—iwe ni kati ya wanadamu au kati ya mwanadamu na Mungu. Ni ishara ya kazi ya Roho Mtakatifu ndani ya maisha yetu na ni baraka kubwa tunapodhihirisha tabia hii kwa wengine. Wakristo wanapaswa kuwa mfano wa uaminifu kwa ulimwengu, wakijua kwamba Mungu huwalinda na kuwabariki wale waaminifu.

8. Upole

Upole ni tabia ya kuwa na unyenyekevu, ustahimilivu, na huruma, ikionyesha nguvu inayodhibitiwa kwa hekima na uvumilivu. Ni sehemu muhimu ya tunda la Roho inayodhihirika katika mwenendo wa mtu anayeongozwa na Roho Mtakatifu. Upole sio udhaifu; badala yake, ni nguvu iliyowekwa chini ya udhibiti wa Mungu. Mtu mwenye upole anadhihirisha tabia ya Kristo. Yesu alisema: *"Jifunze kwangu, kwa kuwa mimi ni mpole na mnyenyekevu wa moyo; nanyi mtapata raha nafsi zenu"* (**Mathayo 11:29**).

Upole kama tunda la Roho ni tabia ya kipekee inayomfanya Mkristo aishi maisha yenye amani na yenye ushuhuda wa Kristo. Ni tabia inayohitaji unyenyekevu, nguvu ya kudhibiti hisia, na maisha yanayoongozwa na Roho Mtakatifu. Wakristo wanahimizwa kufuata mfano wa Yesu Kristo na kuishi kwa upole ili kuwahudumia wengine na kumtukuza Mungu. **Yakobo 3:13:** *"Ni nani aliye na hekima na ufahamu kwenu? Na aonyeshe kazi zake kwa mwenendo wake mzuri katika upole wa hekima."*

9. Kiasi

Kiasi ni tabia ya kuweza kujidhibiti na kuishi kwa uwiano mzuri wa kihisia, kimawazo, na kimatendo. Ni uwezo wa kuweka mipaka na kudhibiti tamaa, hisia, na matamano,

huku ukifuata mapenzi ya Mungu badala ya mwongozo wa mwili.

Kiasi inahusisha, udhibiti wa Tamaa, Kuweka mipaka katika tamaa za mwili kama chakula, mali, au raha, Kutawala hasira na kujizuia kulipiza kisasi au kusema maneno ya kuumiza, Kutofanya maamuzi kwa haraka au kwa msukumo wa hisia, Kuweka mapenzi ya Mungu mbele ya tamaa za kibinadamu.

Warumi8:5,inasema:

"Kwa maana wale waufuatao mwili huyafikiri mambo ya mwili, bali wale waufuatao Roho huyafikiri mambo ya Roho." Kwa kutumia tunda la Roho, tunaweza kuboresha mahusiano yetu na kuleta mabadiliko mazuri katika ndoa, familia, marafiki, na jamii. Kila kipengele cha tunda la Roho kinatuwezesha kuishi kwa njia inayompendeza Mungu na kuwabariki watu wanaotuzunguka.

Niliwahi kumsikia mhubiri mmoja akisema "Mahusiano bora hayawezi kujengwa na kukua kwenye kelele na mabishano. Lakini kwa matumizi sahihi ya Tunda la Roho kama jamii ya Kristo, tunaweza kuishi maisha bora yenye mshikamano na furaha ya kweli. Nlianza kufanya majaribio madogo ya kutumia kila tunda la Roho kutegemea na mazingira niliyopo, ninafanya bidii kila siku kuhakikisha nakuwa mtu bora kwa wengine kwa kuongozwa na tunda la Roho."

Kutumia **tunda la Roho** katika maisha ya kila siku huleta mabadiliko makubwa katika mahusiano, tabia, na maisha ya kiroho. Toa msahama, vumilia, wapende wengine, kuwa na kiasi, ishi kwa upole, tafuta kuwa na Amani na watu wote. **Mungu wetu ni Mungu wa Haki anafurahishwa na Umoja wetu Katika Kristo!**

.....

3. MTAKE BWANA NA NGUVU ZAKE.

"Mtakeni Bwana na nguvu zake, Utafuteni uso wake siku zote" (Zaburi 105:4).

Maandiko haya yanatufundisha kwamba kumtaka Bwana siyo tukio la mara moja, bali ni mchakato wa kila siku wa shauku ya dhati ya kuwa karibu naye na kujazwa na nguvu zake. Kumtaka Bwana ni zaidi ya kutamani mkono wake wa baraka; ni safari ya kuingia katika uwepo wake, kuujua moyo wake, na kutembea kwa utiifu kwa mapenzi yake.

Dunia ya leo imejaa changamoto nyingi, na Wakristo wengi wanakimbilia kwa Mungu kwa matarajio ya kutatuliwa matatizo yao haraka. Wanaomba kwa bidii na kumtafuta Bwana kwa ajili ya miujiza, lakini mara miujiza hiyo inapopatikana, hamu yao ya kumtaka Mungu hupoa. Wanamtaka Bwana kama njia ya kupata msaada wa dharura, lakini wanakosa shauku ya dhati ya kujenga uhusiano wa kudumu naye.

Kumtaka Bwana hakumaanishi tu kuomba kwa sababu tunahitaji kitu kutoka kwake. Badala yake, kunamaanisha kumtafuta Yeye kwa sababu ya Yeye ni nani, si kwa sababu ya kile anachoweza kutufanyia. Ni shauku ya dhati ya kumjua, kumpenda, na kumwabudu kwa moyo wa unyenyekevu na shukrani. **Zaburi 27:4** inatufundisha mfano wa shauku hii: *"Neno moja nimelitaka kwa Bwana, nalo ndilo nitakalolitafuta; Nikae nyumbani mwa Bwana Siku zote za maisha yangu, Niutazame uzuri wa Bwana, Na kutafakari hekaluni mwake."*

Lakini ni lazima pia tukiri kwamba kuna hatari kubwa katika kumtaka Bwana kwa nia isiyo sahihi. Wakristo ambao wanamtaka Bwana ili awatendee miujiza tu mara nyingi hukataa kujinyenyekeza, kutubu, na kujifunza neno lake. Wanamtaka Bwana awabadilishie hali zao, lakini hawako tayari kuruhusu Bwana awabadilishe mioyo yao. Tabia hii ni sawa na kumtazama Mungu kama mtumishi wa mahitaji yao, badala ya kumtambua kama Bwana wa maisha yao.

Kumtaka Bwana kwa moyo safi kunahitaji unyenyekevu wa kukubali mchakato wa kujengwa kiroho, hata unapitia nyakati za ukimya na majaribu. Ni mchakato wa kujifunza kuutamani uso wa Mungu badala ya mikono yake.

Katika sura hii, tutajifunza hatua za kumtaka Bwana na kwa moyo wa dhati na jinsi ya kuchota nguvu zake za ajabu kwa maisha yetu, ili tuweze kutembea kwa ushindi na furaha inayotoka kwake.

Umuhimu wa Kuwa na Nguvu za Mungu

Nguvu za Mungu ni msingi wa maisha ya ushindi wa kiroho. Bila nguvu za Mungu, Mkristo anakuwa dhaifu mbele ya majaribu, mashambulizi ya kiroho, na changamoto za kila siku. Paulo anatufundisha katika **Waefeso 6:10**, *"Hatimaye, mzidi kuwa hodari katika Bwana na katika uweza wa nguvu zake."* Hii inaonyesha kwamba nguvu za Mungu zinatuwezesha kusimama imara katika vita vya kiroho na kuishi maisha yanayompendeza Yeye.

Athari za kutokuwa na nguvu za Mungu ni kubwa na zenye hatari

1. Kushindwa Katika Vita vya Kiroho

Bila nguvu za Mungu, Mkristo hana kinga dhidi ya mashambulizi ya adui. Katika **1 Petro 5:8**, tunaonywa kuwa adui yetu, Ibilisi, huzunguka kama simba angurumaye, akitafuta mtu wa kummeza. Bila nguvu za Mungu, hatuwezi kupinga hila zake.

2. Kupoteza Shauku ya Kiroho

Wale wasio na nguvu za Mungu mara nyingi hupoteza hamasa ya maombi, kusoma Neno, na kushiriki katika huduma. Hali hii husababisha baridi ya kiroho na maisha yasiyozaa matunda.

3. Kujikuta Mateka wa Dhambi

Nguvu za Mungu hutuwezesha kushinda dhambi na kuishi maisha matakatifu. **Warumi 8:13** inasema, "*Kwa maana kama tukiishi kwa kufuata mambo ya mwili, mwataka kufa; bali kama mkiyafanya matendo ya mwili kwa Roho, mtaishi.*"

4. Kutokuwa na Ushuhuda Imara

Bila nguvu za Mungu, Mkristo hawezi kushuhudia kwa ujasiri wala kuonyesha maisha yanayoakisi Kristo. **Matendo 1:8** yanatufundisha kwamba tunapokea Roho Mtakatifu, tunapokea nguvu za kuwa mashahidi wake hata mpaka mwisho wa dunia. Kwa hiyo, ni muhimu kumtafuta Mungu kwa dhati ili kujazwa na nguvu zake.

Tunapojifunza kumtaka Bwana kwa moyo safi, tutajifunza pia jinsi ya kuzifungua nguvu zake za ajabu kwa maisha yetu, ili tuweze kutembea kwa ushindi na furaha inayotoka kwake.

Hatua Tano za Mchakato wa Kumtaka Bwana na Nguvu Zake

1. Kutambua Haja Yako ya Mungu

Hatua ya kwanza ya kumtaka Bwana ni kutambua kwamba hatuwezi kufanya lolote bila Yeye. Yesu alisema, *"Pasipo mimi ninyi hamwezi kufanya neno lolote"* (Yohana 15:5). Kutambua udhaifu wetu na kumwendea Mungu kwa unyenyekevu ni msingi wa safari yetu ya kiroho.

2. Kutafuta Uso wa Mungu kwa Maombi na Toba

Maombi na toba ya dhati huleta usafi wa moyo na uwepo wa Mungu maishani mwetu. **2 Mambo ya Nyakati 7:14** inasema, *"Ikiwa watu wangu, walioitwa kwa jina langu, watajinyenyekeza na kuomba, na kunitafuta uso wangu, na kuziacha njia zao mbaya; basi nitasikia kutoka mbinguni, na kuwasamehe dhambi yao, na kuponya nchi yao."*

3. Kujifunza na Kutafakari Neno la Mungu

Neno la Mungu ni njia kuu ya kumjua Yeye na kupokea nguvu zake. **Zaburi 119:105** inasema, *"Neno lako ni taa ya miguu yangu, na mwanga wa njia yangu."* Kujifunza Neno hutuongoza katika njia za haki na hutupa nguvu za kiroho.

4. Kujazwa na Roho Mtakatifu

Roho Mtakatifu ni chanzo cha nguvu za Mungu. Yesu aliwaambia wanafunzi wake, *"Lakini mtapokea nguvu, akiisha kuwajilia juu yenu Roho Mtakatifu; nanyi mtakuwa mashahidi wangu..."* (Matendo 1:8). Ni muhimu kumwomba Mungu atupe Roho wake ili tupate nguvu za kutimiza mapenzi yake.

5. Kutenda kwa Imani na Utiifu

- Kumtaka Bwana na nguvu zake kunahitaji hatua za imani na utiifu. **Yakobo 2:17** inasema, *"Vivyo hivyo imani, isipokuwa ina matendo, imekufa nafsini mwake."* Tunapomtafuta Bwana kwa dhati, tunapaswa kutii maongozi yake na kutumia nguvu zake kwa kushuhudia na kuishi maisha matakatifu.

Kumtaka Bwana na nguvu zake ni safari ya kipekee inayotuletea uzima wa milele, amani, na furaha ya kweli. Usikate tamaa unapokutana na changamoto; endelea kumtafuta kwa moyo safi. **Zaburi 34:8** inatuhimiza, *"Onjeni mwone ya kuwa Bwana yu mwema; heri mtu yule anayemtumaini."* Ukaribu na Bwana unaleta uzuri wa maisha ambao hauwezi kupatikana mahali pengine. Mtafute kwa bidii, na utaona utukufu wake ukidhihirika maishani mwako.

Maombi ya Kumuomba Msomaji.

Ee Mungu mwenye nguvu, ninaomba kwa ajili ya msomaji wa kitabu hiki. Nakushukuru kwa upendo na neema zako ambazo zimewaleta kusoma mafundisho haya. Bwana, fungua macho ya rohoni ya kila msomaji ili wapate kukuona kwa undani na kuyajua mapenzi yako. Wape hekima na ufahamu wa kutembea katika njia zako na kujazwa na Roho Mtakatifu.

Bariki maisha yao, familia zao, na kazi za mikono yao. Bwana, ondoa vikwazo vyote vinavyoweza kuwazuia kukutaka na kukutafuta kwa bidii. Wape nguvu za kushinda changamoto za maisha, na uwajaze na furaha ya wokovu wako.

Ee Baba, ninawaweka mikononi mwako. Waongoze katika hatua zao zote, na wafanye kuwa mashahidi wako waaminifu. Katika jina la Yesu Kristo, aliye Mwokozi wetu, ninaomba na kuamini. Amina

Shukrani kwa Mungu.

Kwa unyenyekevu na moyo wa shukrani, namrudishia Mungu utukufu wote kwa kunipa mafunuo, hekima, na mada za muhimu za kulifundisha Kanisa lake. Si kwa nguvu zangu wala kwa uwezo wangu, bali kwa Roho wa Bwana niliweza kuandika kitabu hiki kuanzia mwanzo mpaka mwisho. *"Sifa, na heshima, na utukufu, na uweza una yeye aketiye juu ya kiti cha enzi, na Mwanakondoo, hata milele na milele"* (Ufunuo 5:13).

Ee Bwana, Jina Lako Litukuzwe Milele Yote. Amina.

REJEA

1. Dr, Ngenzi. L. (2024). *Nyakati Zetu*. Inland Publishers.
2. Hinn, B. (2005). *Going deeper with the Holy Spirit*. Clarion Call Publishing.
3. Munroe, M. (Speaker). (2023, November 15). *Dr. Myles Munroe: Chosen ones are usually broke* [Video]. YouTube.
<https://www.youtube.com/watch?v=aeCHTx-9IUu>.
4. Omartian, S. (1995). *The power of a praying parent*. Harvest House Publishers.
5. Omartian, S. (2002). *The power of a praying woman*. Harvest House Publishers.
6. Peale, N. V. (1952). *The power of positive thinking*. Prentice Hall.
7. Sorge, B. (2001). *Secrets of the secret place: Keys to igniting your personal time with God*. Oasis House.
8. Sumrall, L. F. (1988). *Victory and dominion over fear: Destroying your deadliest enemy*. Sumrall Publishing.



MWL. DISMAS KAPINGU ni mwana Theolojia, mwalimu na muhubiri wa injili ya Yesu Kristo. Ni msomi na mbobezi katika maswala ya Elimu, Theolojia, na Saikolojia ya Ushauri wa Kikristo (Christian counseling Psychology).

Hiki ni Kitabu cha kwanza ambacho kimeandikwa kwa kuzingatia misingi ya kikristo na uthabiti wa Neno la Mungu kwa lengo la kutia moyo, kufundisha na kuyafumbua mambo mengi ambayo yanahusu maisha ya kila siku ya kiroho na kimwili.

Ni matumaini yangu kwamba, unaposoma kitabu hiki utapata maarifa mapya, msukumo wa kiroho na tumaini jipya lisilotetereka kwa Mungu. Uwe na safari njema katika kusoma kitabu hiki na Mungu wa Mbinguni akubariki sana.

ISBN 978-9912-42-517-8



9 789912 425170

Publisher: Teleroma publisher
Kihonda - Morogoro
Email: romanusmapunda5@gmail.com
TEL: 0768403171

The author: Dismas kapingu
Tel: 0659 671 633
kapingudismasjk@gmail.com